



# ԶՄԻՄՈՒՆ





ԼԳ  
ՏԱՐԻ



# ԷԶՄԻԱԾԻՆ



ՊԱՇՏՈՆԱԿԱՆ  
ԱՄՍԱԳԻՐ  
ՀԱՅՐԱՊԵՏԱԿԱՆ  
ԱԹՈՌՈՒՈՅ  
Ս. ԷԶՄԻԱԾՆԻ

Խոկրեւքեր - Խոյեւքեր

1976





# ՀԻՄՆԱԿ

ՀԻՄՆԱԿ  
ԿՆՆՆՆՆՆ  
ԿՆՆՆՆՆՆ  
ԿՆՆՆՆՆՆ  
ԿՆՆՆՆՆՆ

Հ Ր Ա Մ Ա Ն Ա Ի


**Տ. Տ. ՎԱԶԳԵՆԻ ԱՌԱՋՆՈՅ**

ՎԵՀԱՓԱՌ ԵՒ ՍՐԲԱԶՆԱԳՈՅՆ ԿԱԹՈՂԻԿՈՍԻ  
ԱՄԵՆԱՅՆ ՀԱՅՈՑ



ԿՆՆՆՆՆՆ - ԿՆՆՆՆՆՆ


1970





ՀՈՐԵՆԹԱՐ ՎԵՀԱՓԱՌԻ ՀԱՅՐԱՊԵՏԸ

# Փ Ա Ռ Ք Մ Ե Ծ Ս Ա Օ



ՎԵՀԱՓԱՌԻ ՀԱՅՐԱՊԵՏԻ ԽՈՍՔԸ ՎԵՀԱՐԱՆՈՒՄ ԻՐ  
ԳԱՀԱԿԱԼՈՒԹՅԱՆ ՔՍԱՆԱՄՅԱԿԻՆ ՆՎԻՐՎԱԾ  
ՀԱՆԴԻՍԱՎՈՐ ՆԻՍՏԻ ԺԱՄԱՆԱԿ

(27 սեպտեմբերի 1976 թ.)

ԶԱտված փնտրելու ճանապարհի վրա Մենք գտանք սուրբ Էջմիածինը և Տիրոջ ողորմությամբ 1955 թ. սեպտեմբերի 30-ին Մայր տաճարի մեջ հայոց սուրբ եկեղեցին Մեր համեստ անձը կոչեց հայրապետության պաշտոնին: Այդ օրը Փրկչի Իջման սեղանի առաջ Մենք կատարեցինք հետևյալ ուխտը.

«Տէր Աստուած հարցն մերոց. լեր ինձ օգնական առնել զկամս Քո և ուղղես զգնացս իմ ի ճանապարհս Քո արդարութեան. լեր ինձ օգնական և մարտակից վասն շինութեան և անասանութեան սրբոյ եկեղեցոյս Հայաստանեայց, վասն լուսաորութեան և հոգոյ մխիթարութեան հաւատացեալ ժողովրդեան հայոց և վասն բարօրութեան հայրենեաց մերոց: Եւ Քեզ փառք յաիտեանս, ամէն»:

Այդ օրից անցան ահա քսան և մեկ տարիներ: Տարիներ աղոթքի, տարիներ լարված աշխատանքի, տարիներ տարակուսանքների, երբեմն ծանր մտահոգությունների, տարիներ հաջողությունների:

Անցնող տարիների ընթացքում Մայր Աթոռիս իրագործումների համար նախ գոհություն երկնային նախախնամության, որի օգնականությունը զգացինք տևապես: Նաև արտագին շնորհակալություն Մեզ գործակից Մեր հոգևոր եղբայրներին ու աշխարհական անձանց, հատկապես Մայր Աթոռիս արքայապետ Գերագույն հոգևոր խորհրդին և ճարտարապետների ու արվեստ-

տագետների հանձնաժողովին, մեր առատաձեռն բարերարներին և համայն մեր հավատացյալ հարազատ ժողովրդին, որ ի Հայաստան և ի սփյուռու աշխարհի: Երախտագիտությունն նաև մեր հայրենի բարեխնամ կառավարության, որի հարգալիր ու հոգատար վերաբերմունքը միշտ վայելել ենք և շարունակում ենք վայելել Մայր Աթոռու և անձամբ Մենք:

Մեզ համար այս անկրկնելի պահին, քարի սրտերից քիսած ջերմ խոսքերը ձեր, ուղղյալ Մեր անձին, կմղեն զՄեզ խոնարհ հոգիով ընդունիլ զանոնք, վկայաբերելով մեծ առաքյալի խոսքը՝ «Ինքն Աստուած և Հայր մեր և Տէր մեր Յիսուս Քրիստոս՝ ուղղեսցէ զճանապարհս մեր սո ձեզ: Եւ զձեզ ինքն Տէր բազմապատիկն և առանէս արասցէ սիրով ընդ միմեանս և առ ամենեսին՝ որպէս և մեր ի ձեզ» (Ա. Թեա. Գ 11—12):



Վեհափառ Հայրապետը կարդում է Իր շնորհակալության խոսքը հանդիսավոր միասի ժամանակ

Պարտինք Մեր անկեղծ գոհունակությունը հայտնել մեր հայրենի պետության բարձր պաշտոնատար հարգարժան տիար Սարգիս Գասպարյանին, որի խոսքերը մխիթարական եղան Մեզ և Մայր Աթոռիս համար: Մեր խորագգաց շնորհակալությունն ենք հայտնում նաև խոսք առնող՝ մեր մայր եկեղեցու հոգևոր եղբայրներին և մեր քույր եկեղեցիների բարձրապատիվ ներկայացուցիչներին՝ ի գլուխ Ս. Պիմեն, Ս. Դավիթ և Ս. Բասիլիոս Մար Թոմա Սրբազան Պատրիարքներին, որոնց ներկայությունը այստեղ և նրանց արտահայտած մտքերն ու զգացումները մի անգամ ևս փայլուն վկայությունը հանդիսացան Քրիստոսի եկեղեցու միասնության և քրիստոնեական տիեզերական եղբայրության:

Քսան և մեկ տարիների հովվապետական Մեր գործունեության հանգրվանին, Մենք տակավին զգում ենք զՄեզ աշխատելու Մեր ուժերի լիության մեջ և այսօր, 1976-ի սեպտեմբերի 27-ին, ձեր բոլորի և մեր համայն հավատացյալ ժողովրդի առաջ վերանորոգում ենք Մեր ծառայության ուխտը՝ շարունակելու Մեզ վստահված առաքելությունը՝ նվիրված հայ ժողովրդի կյանքի հոգևոր շինության և մեր սուրբ եկեղեցու պայծառության, թե՛ մեր մայր երկրում՝ Սովետական Հայաստանում, թե՛ հայ սփյուռքի ամբողջ տարածքի վրա: Վերանորոգում ենք Մեր ուխտը շարունակելու Մեր առաքելությունը՝ նվիրված մեր հայրենի պատմական վանքերի և սրբատեղիների վերաշինության, Մեր առաքելությունը՝ նվիրված մեր եկեղեցու ներքին միության ամրապնդման, Մեր առաքելությունը՝ նվիրված հոգևոր կրթության գործին, նպատակ ունենալով մեր եկեղեցին օժտելու հավատավոր, լուսամիտ ու նվիրյալ երիտասարդ սպասավորներով:

Նաև վերանորոգում ենք Մեր ուխտը, նույն հետևողականությամբ շարունակելու Մեր առաքելությունը՝ նվիրված հայրենիք-սփյուռք հարաբերությունների առավել ամրապնդման՝ եկեղեցական գետնի վրա, Մեր առաքելությունը՝ նվիրված արտասահմանի մեր հավատացյալ ժողովրդի կրոնական, կրթական ու մշակութային կյանքի է՛լ ավելի կազմակերպման ու զարգացման: Եվ վերջապես ի Քրիստոս սիրով Մեր նվիրական պարտքը պիտի նկատենք մեր եկեղեցու և Մայր Աթոռիս հետզհետե առավել ծավալուն մասնակցությունը միջեկեղեցական էկումենիկ գործունեության և խաղաղության միջեկեղեցական ու միջազգային շարժման:

Մենք, այսօրվա սպասավորներս մեր մայր եկեղեցու, ժամանակավոր անցորդներ մեր ժողովրդի բազմադարյան պատմության ճանապարհի վրա, կոչված ենք կենդանի ու գործարար կապը հանդիսանալու անցյալի ու ապագայի միջև: Հայաստանյայց եկեղեցին հայ ժողովրդի եկեղեցին է, նրա մայրըն ու դաստիարակը և պահպան հրեշտակը բոլոր ժամանակներում: Հայ եկեղեցին նաև հետ այսու միշտ սրբությամբ պիտի պահպանի իր հավատացյալների հոտը մեկ ու անբաժան ու անաղարտ, իր ուղղափառ դավանությամբ, իր ազգային պատմականորեն նվիրագործված ավանդություններով, իր նվիրապետական կազմակերպությամբ ու ինքնազուլիս ղեկավարությամբ: Հայ ազգը, չորրորդ դարի սկզբից քրիստոնեությունը պետական կրոնք ընդունելուց ի վեր, ունի մեկ անբաժան մայր եկեղեցի՝ Հայաստանյայց առաքելական եկեղեցին, ունի մեկ գերագույն Աթոռ՝ Ամենայն Հայոց Հայրապետությունը ի ս. Էջմիածին: Քրիստոնեական հավատքի վավերականությունը, պատմականությունը և կենդանությունը մեր ժողովրդի գիտակցության մեջ երաշխավորված են ու խորհրդանշված միմիայն մեր ազգային մայր եկեղեցու և աստվածակառույց սուրբ Էջմիածնով, Մայր Աթոռիս՝ մեր եկեղեցու մյուս երեք նվիրապետական-տեղական Աթոռների հետ միության, հաղորդակցության և եղբայրական գործակցության պայմաններում:

Ե դարի պատմագիր Եղիշե վկայում է, թե՛ քրիստոնեական հավատքը հայոց մեջ երբեք չի մտնվել դրսից վերցրած մի զգեստի: Այդ վկայությունը ճշմարիտ է նաև հետագա դարերի համար մինչև մեր օրերը:

Մեր եկեղեցու և ազգի պատմության վերջին մոտ երկու հազար տարիների ընթացքում, սուրբ Ավետարանի լույսի ճառագայթումը ու արտահայտությանց բոլոր ձևերը եղել են ու մնացել ստեղծագործորեն ինքնուրույն: Հայ գիրն ու լեզուն, հայ հոգևոր գրականությունն ու քանդակագործությունը, հայ դասական ճարտարապետությունն ու քանդակագործությունը, միջնա-

դարյան նկարչությունն ու երաժշտությունը, շողանալամ են Քրիստոսի Ավետարանի լույսով ու հանդիսանում են նույնքան վավերականորեն ազգային արժեքներ, ինչքան քրիստոնեական: Հայաստանյայց առաքելական եկեղեցին՝ սուրբ Ավետարանի ոգին ու քրիստոնեական մտածողությունն ու զգայնությունը վավերականորեն արտահայտող ինքնատիպ ոճերից մեկն է հանդիսանում համաքրիստոնեական պատմության հորիզոնին վրա: Այդ ժառանգությունը մենք պետք է պահպանենք և պիտի պահպանենք, որովհետև առանց նրան՝ քրիստոնեությունը պիտի դառնար նվազ հարսզատ հայոց հոգիներին:

Այսպես է, որ Էկումենիկ հարաբերությանց ճանապարհին, մնալով մեկտեղ համախոհ եկեղեցիների միության իդեալին և «Աստուծո ժողովուրդ» համաքրիստոնեական մեծ գաղափարին, Հայաստանյայց եկեղեցին ինչպես հազար և հինգ հարյուր տարիներ շարունակ, մնալու է աներեր իր ավանդական կեցվածքին ու մտածելակերպին վրա, իբրև հոգևոր դաստիարակ ու առաջնորդ իր հոտին, հայ ժողովրդի բոլոր զավակներին անխտիր, որոնք բնակվում են Սովետական Հայաստանում և նույնքան թվով և ավելին՝ երկրագնդի տասնյակ այլ երկրներում և, որոնք տարբեր պայմաններում ապրելով հանդերձ, կոչված են պահպանելու իրենց գոյությունը և հոգևոր առաքելությունները իբրև եկեղեցական համայնքներ՝ կրոնական, կրթական և մշակութային գործունեությամբ:

Մենք հավատում ենք Էկումենիկ ոգու խորացմանը, Մենք հավատում ենք Էկումենիկ շարժման զարգացմանը, Մենք հավատում ենք սուրբ Ավետարանով աշխարհի ոգեկան ու բարոյական կյանքը բարեշրջելու հրամայականին, եկեղեցիների առավել մերձեցումով ու նպատակալույս գործակցությամբ:

Հակառակ իրար հակասող ու շփոթեցուցիչ բազում երևույթների, կյտրհիճք թե մարդկային աշխարհը անհրաժեշտորեն պիտի ընթանա դեպի բարոյական նոր հավասարակշռություն, դեպի ընկերային առավել արդար հասարակարգ, դեպի ազգությունների միջև առավել փոխըմբռնում, դեպի վերացումը ազգայնական հիվանդագին դրսևորումների և ազգամիջյան թշնամությունների, դեպի ստեղծումը տևական խաղաղ հարաբերությունների և շինարար գործակցությանց պետությունների միջև:

Մեր մտածումն է, որ մենք՝ եկեղեցիների պատասխանատու սպասավորներս, Էկումենիկ մեր գործունեության ճանապարհին, առաջնորդված Քրիստոսի Ավետարանի լույսով, մեր աղոթքներով ու մեր կենդանի գործով պետք է ձգտենք բոլորս ձեռք-ձեռքի տված, մեր նպաստը բերելու մարդկային աշխարհի ոգեկան, բարոյական հեղաշրջման փրկարար գործին, առանց հակադրվելու ընկերային-քաղաքական զարգացումների ընթացքին, այլ միշտ ու ամեն տեղ հանդիսանալով միության օղակ, փոխըմբռնման հաշտարար գետին և անպայմանավոր սիրո առաքյալներ արդի և գալիք ժամանակների մեջ:

«Ձի սէր ոչ երբէք անկանի»:

«Ձի Աստուած սէր է» և «Խաղաղութեան Աստուած»:

Հայաստանյայց եկեղեցին ի գլուխ ունենալով սուրբ Էջմիածինը, հանուն Քրիստոսի սիրո և խաղաղության Ավետարանի, գիտակից աշխարհի ժողովուրդների լայն զանգվածների դարավոր երազանքներին և հավատարիմ իր սեփական ազգին, անցյալում քանի-քանի անգամներ նահատակված ու հերոսացած հայ ժողովրդի նվիրական զգացումներին ու գերագույն շահե-



րին, պիտի շարունակի նաև հետ այսու տիվ և գիշեր իր աղոթքը բարձրացնելու առ Աստված վասն խաղաղության ամենայն աշխարհի, քույր եկեղեցիների հետ միատեղ իր գործոն մասնակցությունը բերելու ի խնդիր արդարության, ազատության և խաղաղության աստվածառաք պատվիրանների կենսագործման մեր օրերում:

Ավետարանական առաքելության խոր գիտակցությամբ տոգորված, մեր սուրբ եկեղեցին ջերմ եռանդով, հառաջիկա գարնան իր մասնակցությունը պիտի բերի խաղաղության համաշխարհային կրոնական համագումարին, որը տեղի պիտի ունենա Մոսկվայում, նախաձեռնությամբը ռուսաց պրավոսլավ եկեղեցու հովվապետ՝ Նորին Սրբություն Պիմեն Սրբազան Պատրիարքի:

Աշխարհի ժողովուրդների բոլոր ազնիվ իղձերի իրականացման գերագույն գրավականը՝ նրանց խաղաղ գոյակցության և համերաշխ գործակցության իրավիճակի պահպանումն է ու ամրապնդումը, այնպես որ այլևս հնարավոր չդառնան պատերազմները աշխարհավեր ու մահաափյուռ:

«Տուր մեզ Տէր գխաղաղութիւն Քո. զի եկեալ պահեսցէ զմեզ անխոռվս և աներկիտս ի տուէ և ի գիշերի»:

Այո, նաև հայ ժողովուրդը, մեռելներեն հարություն առած մեր ազգը, իր նորաստեղծ արդի ազգային պետականությամբ, կենարար օդի ու ջուրի չափ կարիքն ունի խաղաղ, ապահով ու շինարար կյանքի, ի կենսագործումն իր բոլոր արդար երազանքների, ի կենսագործումն իր Է՛լ ավելի պայծառ ու երջանիկ ապագայի, սովետական եղբայրացած ազգությունների մեծ ու անբաժան միության մեջ:

Իբրև ժողովուրդ ու եկեղեցի, ամեն անգամ որ խոսում ենք խաղաղ, ապահով ու շինարար կյանքի մասին, չենք կարող մեր երախտապարտ զգացումները չարտահայտել ռուս մարդասեր ժողովրդի նկատմամբ, որ նախանամական դեր կատարեց 1828-ին և 1920-ին, վերջնական բնաջնջումից փրկելով դարեր շարունակ ավերված ու մարտիրոսացած Հայաստանը: Այս պատմական ճշմարտությունը Մենք հիշատակում ենք այսօր, մանավանդ, որ 1828-ին, Արևելյան Հայաստանը փրկելու և Ռուսաստանին միացնելու գործում բախտորոշ եղավ հերոսական գործունեությունը Մեր երջանկահիշատակ նախորդներից՝ Ներսես Ե կաթողիկոսի, որի անմոռաց անունը մի անգամ ևս պիտի փառավորենք 1978 թվին, երբ համազգային ռեկոնցիւմով պիտի նշվի հարյուրհիսունամյակը վերոհիշյալ պատմական ակտի:

Մեր գահակալության քսան և մեկերորդ տարեդարձի այս հանդեսը, Մենք կնկատենք ոչ թե նվիրված Մեր անձին, այլ Հայոց Հայրապետական Աթոռ սուրբ Էջմիածնին և նրա գործունեությանը: Եթե Մայր Աթոռիս իրագործումների այդ շրջանը զուգադիպեց Մեր գահակալության տարիներին, ապա Մենք է, որ գոհություն պետք է տանք բարին Աստուծուն, որ լուսավորեց ու զորացրեց Մեր տկար անձը կատարելու համար Իր կամքը: Մենք պարտինք նաև շնորհակալ լինել բոլոր նրանց, հոգևորական և աշխարհական անձանց, ովքեր Մայր Աթոռում՝ ազնիվ, անձնվեր ու հավատարիմ Մեր գործակիցները եղան այս քսան և մեկ տարիների ընթացքում: Մեր օրհնությունը բոլորին:

Այս հանդիսավոր պահին չենք կարող Մեր խոսքը ավարտել առանց Մեր հոգու հայացքը սկետելու դեպի երբեմնի երջանիկ երկիրը՝ Լիբանան, որ ահա մոտ երկու տարիներից ի վեր մատնված է ողբերգական կացության, իբրև հետևանք քաղաքացիական արյունալի հակամարտությունների՝ մահմեդական ու քրիստոնյա արաբ եղբայրական համայնքների միջև:

Խղճի պարտք ենք համարում մի անգամ ևս Մեր ջերմագին աղոթքը դեպի երկինք առաքել, որ Աստուծո ողորմությանը շուտով վերջ գտնի աղետալի այդ վիճակը և փրկարար խաղաղությունը իջնի Լիբանանի ու նրա աստվածասեր ժողովրդի վրա, որի ծոցում ապրում են նաև բազմահազար հավատացյալները Հայաստանյայց եկեղեցու, այս օրերին նրանք էլ տազանապյալ ու կարոտյալ դրության մեջ, որոնց պարտինք մեր եղբայրական նյութական և բարոյական օգնությունը շարունակել, որի համար Մենք կամենում ենք վերստին մեր հայրապետական կոչը ուղղել սփյուռքի մեր բոլոր հայ եկեղեցական համայնքներին:

Արդ, այս հանդեսը երջանիկ առիթ է Մեզ համար ծունկի եկած աղոթելու, հավատքով ու եռանդով աղոթելու, որ Տերը հավետ անասան ու ծաղկյալ պահի առաքելական մեր մայր եկեղեցին, ու հավետ պահապան և մարտակից մնա, մեր Մայր Աթոռ սուրբ Էջմիածնին, բոլոր ժամանակների հավատքի պունը և լույսի աղբյուրը մեր հավատավոր ժողովրդի:

Հայ ժողովուրդ, ժողովուրդ մեր սիրեցյալ, ցնձա և ուրախ եղիր, «զի Աստուած ընդ մեզ է»․ ամեն:





**ՀՍՍՀ ՄԻՆԻՍՏՐՆԵՐԻ ՍՈՎԵՏԻՆ ԱՌԸՆԹԵՐ ՀԱՅ ԵԿԵՂԵՑՈՒ ԳՈՐԾԵՐԻ ԽՈՐՀՐԴԻ ՆԱԽԱԳԱՀ ՊՐԵՍ. ՍԱՐԳԻՍ ԳԱՍՊԱՐՅԱՆԻ ՈՂՋՈՒՅՆԻ ԽՈՍՔԸ**

Թույլ տվեք Հայաստանի կառավարության, հայ եկեղեցու գործերի խորհրդի և անձամբ իմ կողմից ջերմորեն շնորհավորել Ձեզ Ձեր գահակալության 20-րդ տարեդարձի առթիվ:



Հայկական ՍՍՀ Մինիստրների սովետին առընթեր հայ եկեղեցու գործերի խորհրդի նախագահ տիար Սարգիս Գասպարյանը ողջույնի խոսք արտասանելիս

Այս հեղինակավոր ժողովում այսօր լսեցինք Գերագույն հոգևոր խորհրդի ամփոփ զեկուցումը Ձեր քսանամյա ազգային-եկեղեցական գործունեության մասին: Այն ամենը, ինչ մենք լսեցինք և ինչ մենք գիտենք մոտիկից, գալիս է մի անգամ ևս հավաստելու, որ անցած երկու տասնամյակների Ձեր արգասավոր գործունեության ընթացքում Դուք ղեկավարվեցիք

հայ ժողովրդի ու մեր վերածնված հայրենիքի գերագույն շահերով: Քաջ տեղյակ լինելով մեր ժողովրդի ողբերգական ու միաժամանակ հերոսական պատմությանը, Դուք գործեցիք այն գիտակցությամբ, որ երեք հազար տարվա պատմություն ունեցող մեր հնամենի ու քաղաքակիրթ ժողովուրդը, պատմական անօրինակ փորձություններից, մաքառումներից ու հերոսապատմական հետո, մեր պատմության նորագույն շրջանում, երբ կանգնած էր ժողովուրդների ցանկից իսպառ ջնջվելու ահավոր վտանգի առջև, վերստին վերագտավ իրեն, ոտքի կանգնեց, մեջքը շտկեց, առասպելական Մհերի պես դուրս եկավ իր միայնության քարանձավից և, ունկնդրելով ազգային ու սոցիալական արդարության ձայնին, հաստատորեն ու աներեր հավատով մտավ Սովետական Միության ազատագրված ժողովուրդների մեծ, ամրակուռ ընտանիքի մեջ:

Այժմ հասակ է առել ու ծաղկել մեր հինավուրց Հայաստանը: Ուժեղ է նա իր լեռներով, իր դաշտերով, իր այգեստաններով, իր ժամանակակից արդյունաբերությամբ, մշակույթով, իր գիտությամբ, բայց մանավանդ իր ժողովրդով, քանզի մենակ չէ նա այժմ, այլ իրավահավասար անդամը Սովետական մեծ Միության, որն այժմ աշխարհի ամենատաջադեմ ու ամենահեղինակավոր պետությունն է:

Եվ Դուք, Ձերդ Սրբություն, գործեցիք այս գիտակցությամբ ու բերեցիք Ձեր նպատակն այս գիտակցությամբ:


Ու գիտենք, որ առաջիկայում էլ պիտի գործեք այն գիտակցությամբ, որ ուր էլ լինենք, ինչ էլ անենք, պիտի աչքի լույսի պես պահենք և ամրապնդենք մեր հինավուրց ու նոր երկիրը, մեր ժողովրդի լավագույն զավակների երազանքը, նրանց երազանքը, ովքեր մաքառեցին ու ընկան ազատության ճանապարհին, որպեսզի հավերժ ապրի ու հարստևի մեր հայրենիքը, մեր ժողովուրդը:

Այսօր, շրջապատված հարյուրավոր երևելի մարդկանցով, որոնք եկել են մեծարելու Ձեզ, կարող եք երջանիկ զգալ Ձեզ այն գիտակցությամբ, որ անցած տարիների ընթացքում անդադրում գործեցիք՝ հանուն սփյուռքի հայության ու վերածնված և բարգավաճող հայրենիքի միասնության, գործեցիք առանց խտրության ու խտրականության, առանց հատվածականության, իբրև Շայրագույն Պատրիարք և կաթողիկոս Ամենայն Հայոց:

Որպես ժամանակակից քրիստոնյա աշխարհի ամենաճանաչված դեմքերից մեկը, Դուք գործեցիք ժամանակակից մարդկությանն առավել հուզող հարցերի գիտակցությամբ և այդ գիտակցությամբ անդադրում քաջալերեցիք խաղաղության, ժողովուրդների բարեկամության ու խաղաղ համագործակցության ջանքերը: Մոսկվայում, Բեռլինում, Պրագայում կամ այլուր, բոլոր համաշխարհային համաժողովներում ու կոնգրեսներում Դուք լսելի դարձրիք հայ ժողովրդի, Սովետական Միության բոլոր ժողովուրդների խաղաղ ապրելու, խաղաղ կառուցելու, խաղաղ ստեղծագործելու ձայնը:

Ավարտելուց առաջ իմ խոսքը, թույլ տվեք կրկին հավաստիացնելու, որ Հայաստանի կառավարությունը բարձր է գնահատում Ձեր գործունեությունը, և չափազանց ուրախ եմ, որ այժմ Դուք առաջվա պես առողջ եք ու ամուր, լի եռանդով ու կորովով: Սրտանց կամենում եմ Ձեզ, Ձերդ Սրբություն, երկար տարիների քաջառողջ կյանք, երջանկություն ու բարօրություն: Կամենում եմ Ձեր բոլոր գործերի ու նպատակների իրականացում:

Կրկին ընդունեցեք մեր անկեղծ ողջույնը և լավագույն մաղթանքները:



**ՍՍՀՄ ՄԻՆԻՍՏՐՆԵՐԻ ՍՈՎԵՏԻՆ ԱՌԸՆԹԵՐ ԿՐՈՆՆԵՐԻ  
ԳՈՐԾԵՐԻ ԽՈՐՀՐԴԻ ՆԱԽԱԳԱՀ ՊՐՆ. ՎԼԱԴԻՄԻՐ  
ԿՈՒՐՈՅԵԴՈՎԻ ԾՆՈՐՀԱՎՈՐԱԿԱՆ ՀԵՌԱԳԻՐԸ**

Սովետական Միության Մինիստրների սովետին առընթեր կրոնների գործերի խորհրդի և անձամբ իմ կողմից սրտանց շնորհավորում եմ Ձեզ՝ հայ եկեղեցու Ղեկավարիդ, Ձեր քսանամյա շործունեության առթիվ:

Որպես հայ եկեղեցու հեղինակավոր պետ, Դուք, Ձերդ Սրբություն, հրակալական հեղինակություն եք նվաճել ամբողջ աշխարհի հավատացյալ հայերի կողմից և հանդիսացել մայր երկրի մեծ հայրենասեր, հայտնի Ձեր հասարակական ակտիվ գործունեությամբ՝ հանուն խաղաղության և ժողովուրդների միջև բարեկամության ամրապնդման:

Ձեր ազնիվ հայրենասիրական և խաղաղասիրական գործունեությունն արժանանում է սովետական հասարակայնության և սովետական կառավարության բարձր գնահատանքին:

Կամենում եմ Ձեզ քաջառողջություն և նոր հաջողություններ՝ ի բարություն մեր հայրենիքի:

Հ ա Ր Գ Ա Ն Ք՝

**ՎԼԱԴԻՄԻՐ ԿՈՒՐՈՅԵԴՈՎ**

**ՆԱԽԱԳԱՀ ՍՈՎԵՏԱԿԱՆ ՄԻՈՒԹՅԱՆ ՄԻՆԻՍՏՐՆԵՐԻ  
ՍՈՎԵՏԻՆ ԱՌԸՆԹԵՐ ԿՐՈՆՆԵՐԻ ԳՈՐԾԵՐԻ  
ԽՈՐՀՐԴԻ**

Մոսկվա,

27 սեպտեմբեր 1976 թ.





# Գերագույն հոգևոր խորհուրդ

ԳԵՐԱԳՈՒՅՆ ՀՈԳԵՎՈՐ ԽՈՐՀՐԴԻ ԶԵԿՈՒՑԱԳԻՐԸ  
ՎԵՀԱՓԱՌԻ ՀԱՅՐԱՊԵՏԻ ՔՍԱՆԱՄՅԱ ԳՈՐԾՈՒՆԵՌՈՒԹՅԱՆ  
ՄԱՍԻՆ

(Կարդացված տ. Կոմիտաս արքեպ. Տեր-Ստեփանյանի կողմից,  
27 սեպտեմբերի 1976 թ.)

1975 թվականի հոկտեմբերին լրացավ Տ. Տ. Վազգեն Ա Ամենայն Հա-  
յոց Հայրապետի գահակալության 20-ամյակը:

Այսօր, հոբելյանական այս հանդիսավոր ցիստի առիթով, հանուն Մայր  
Աթոռ ու Էջմիածնի Գերագույն հոգևոր խորհրդի, ինձ վրա նվիրական պար-  
տականություն է դրված՝ համառոտակի, բայց ամբողջական ձևով ներկայաց-  
նել Նորին Սրբության գահակալության անցնող քսան տարիների ընթացքում  
Նրա ծախլած եկեղեցական, միջեկեղեցական, մշակութային, շինարարա-  
կան, հայրենասիրական ու խաղաղասիրական գործունեության պատկերը:

Հոբելյար Հայոց Հայրապետը ծնվել է 1908 թվականի սեպտեմբերի  
20-ին Ռումինիայի մայրաքաղաք Բուխարեստում, արհեստավորի բարե-  
պաշտ ընտանիքում: Իր միջնակարգ կրթությունն ստացել է Բուխարեստում:  
1931—1936 թվականներին սովորել և ավարտել է Բուխարեստի համալսա-  
րանի գրականության և փիլիսոփայության ֆակուլտետի մանկավարժության  
բաժինն ու այնուհետև նվիրվել կրթական ու հրապարակագրական աշխա-  
տանքների:

1943 թվականի սեպտեմբերի 30-ին ընդունել է հոգևոր կոչում և ընտրը-  
վել Ռումինիայի հայոց հոգևոր առաջնորդ: 1943 և 1944 տարիներին հետևել  
է Բուխարեստի աստվածաբանության ֆակուլտետի դասընթացներին:

1951 թվականին եպիսկոպոս է ձեռնադրվել Մայր Աթոռ ու Էջմիածնում  
և մինչև 1955 թվականը վարել Ռումինիայի թեմի առաջնորդական պաշ-  
տոնը:

1955 թվականի սեպտեմբերի 30-ին սուրբ Էջմիածնում գումարված ազ-  
գային-եկեղեցական ժողովը տ. Վազգեն եպիսկոպոս Պալճյանին ընտրում է  
Ամենայն Հայոց կաթողիկոս:

Նույն թվականի հոկտեմբերի 2-ին Էջմիածնի Մայր տաճարում հայ եկեղեցու 12 արքեպիսկոպոսների և եպիսկոպոսների ձեռքով կատարվում է Նրա կաթողիկոսական ձեռնադրության, օծման և ապա գահակալության հանդիսավոր արարողությունը:

Տ. Տ. Վազգեն Ա Վեհափառ Հայրապետը ս. Գրիգոր Լուսավորչի պատմական Աթոռի վրա բազմեց խոր հավատով, հոգևոր-ազգային առաքելության պայծառ գիտակցությամբ:



Տ. Կոմիտաս արքեպ. Տեր-Ստեփանյանը զեկուցագիրն ընթերցելիս

Հանձին Տ. Տ. Վազգեն Ա Հայրապետի Հայաստանյայց առաքելական ս. եկեղեցին ունեցավ իր աստվածառաք Հովվապետը, Որն Իր սուրբ Աջը տարածեց բովանդակ հայության վրա ի Հայաստան և ի սփյուռս աշխարհի ու Իր հոգևոր, ազգային-հայրենասիրական առաքելությունը կատարեց անմնացորդ նվիրումով և բոլորանվեր սիրով դեպի իր Աթոռը, դեպի հայ եկեղեցին և դեպի իր ժողովուրդն ու հայրենիքը:

Անցնող քսան տարիների ընթացքում Հայոց Հայրապետն Իր բարձր անձնավորությունը գրոց հիշատակության արժանի իրագործումներով նույնացրեց Մայր Աթոռի և հայոց վերածնված աշխարհի երազանքների հետ: Նրա ոգեշնչող անձնավորությունից ճառագայթող լույսը ջերմացրել է բովանդակ հայության սիրտը և անքակտելի կերպով կապել Մայր Աթոռ ս. Էջմիածնի ու հայոց մայր երկրի հետ:

Հոբելյար Հայոց Հայրապետը, Իր ոտքերն ամրորեն դրած հայրենի հողի վրա, պայծառացրեց, ծաղկեցրեց Մայր Աթոռ ս. Էջմիածինը: Նա Իր մեծ ու բարի սրտով հասավ նաև սփյուռքին՝ հովվապետական Իր այցելությունների ժամանակ ամեն տեղ Իր հետ տանելով ս. Էջմիածնի պատգամն ու

օրհնությունը և հայրենիքի կենսարար շունչն ու Արարատյան աշխարհի հայրենական քաղցրությունները: Այդ պատգամն ու օրհնությունն անցնող քսան տարիների ընթացքում ակնուրթի հայության գիտակցության մեջ դարձան բյուրեղացած հավատ, ջերմացնող ապրում և ստաջնորդող ոգի:

«Մայր Աթոռ ս. Էջմիածին, այսօր է՝ և հավետ պիտի ըլլա, ինչ որ եղած է ի սկզբանե, այսինքն՝ վե՛մ հավատքի, լո՛ւյս հոգիներու և պաշտպա՛ն հայրենյաց», գրում է Հայոց Հայրապետը:

Վեհափառ Հայրապետի գահակալության քսանամյա բեղուն շրջանն ընդգրկեց գործունեության բազում բնագավառներ: Այժմ համառոտակի ուզում ենք կանգ առնել Նորին Սրբության այդ բազմակողմանի գործունեության հիմնական երեսների վրա:

Վեհափառ Հայրապետն Իր գահակալության առաջին իսկ օրերից Իրեն հատուկ գործիմացությամբ և եռանդով ձեռնամուխ եղավ ստեղծելու խաղաղ և առողջ հիմքերի վրա դրված վանական հոգևոր կյանք ու մթնոլորտ: Այդ նպատակով Մայր Աթոռում կազմվեց երեսուն հողվածներից բաղկացած վանական-միաբանական մի կանոնադրություն, որպեսզի ս. Էջմիածինն իրապես դառնա «կրոնական հաստատություն մը, ուր ի Քրիստոս սիրով միաբանած հոգևորականներ ապրին համայնական կյանքով, ուխտած ըլլալով անձնվիրաբար ծառայելու Հայաստանյայց առաքելական եկեղեցիին և Մայր Աթոռ ս. Էջմիածնին, ժուժկալության, աղքատության ու անպաշտան հնազանդության հայրապետահաստատ կանոններուն համաձայն», գրում է Վեհափառ Հայրապետը:

Այսօր, այս երջանիկ հոբելյանի հանգրվանին, ուրախ ենք արձանագրելու, որ Հայոց Հայրապետը կարողացավ Մայր Աթոռի երիտասարդ միաբաններին ներշնչել հոգևոր կոչման և ազգային առաքելության զգացում, ս. Էջմիածնի համար ապրելու և գործելու գաղափարական գեղեցկություն:

Վեհափառ Հայրապետի գահակալության շրջանում Նրա սուրբ Աջով եպիսկոպոսական աստիճան են ստացել հետևյալ 36 եպիսկոպոսները.

1. տ. Ծնորհք արքեպիսկոպոս Գալստյան (պատրիարք Կ. Պոլսի հայոց) .
2. տ. Հայկազուն արքեպիսկոպոս Աբրահամյան.
3. տ. Սերովբե արքեպիսկոպոս Մանուկյան.
4. տ. Հայրիկ արքեպիսկոպոս Ասլանյան.
5. տ. Ասողիկ արքեպիսկոպոս Ղազարյան.
6. տ. Պսակ արքեպիսկոպոս Թումայան.
7. տ. Կոմիտաս արքեպիսկոպոս Տեր-Ստեփանյան.
8. տ. Բաբգեն արքեպիսկոպոս Ապատյան.
9. տ. Թորգոմ արքեպիսկոպոս Մանուկյան.
10. տ. Ծահե արքեպիսկոպոս Աճեմյան.
11. տ. Վաչե արքեպիսկոպոս Հովսեփյան.
12. տ. Վարդան եպիսկոպոս Տեր-Սահակյան.
13. տ. Եզնիկ եպիսկոպոս Ազնավորյան.
14. տ. Պարզև եպիսկոպոս Վրթանեսյան.
15. տ. Ծավարշ եպիսկոպոս Գույումճյան.
16. տ. Զգոն եպիսկոպոս Հակոբյան.
17. տ. Գնել եպիսկոպոս Ծերեճյան.
18. տ. Բաբգեն եպիսկոպոս Վարժապետյան.
19. տ. Հուսիկ եպիսկոպոս Սանթրոյան.
20. տ. Եղիշե եպիսկոպոս Սիմոնյան,



21. տ. Մաշտոց եպիսկոպոս Թաշիրյան.
22. տ. Վահան եպիսկոպոս Տերյան.
23. տ. Տիրայր եպիսկոպոս Մարտիրյան.
24. տ. Հակոբ եպիսկոպոս Վարդանյան.
25. տ. Զավեն եպիսկոպոս Չինչինյան.
26. տ. Գարեգին եպիսկոպոս Գազանճյան.
27. տ. Ծահան եպիսկոպոս Սվաճյան.
28. տ. Գյուտ եպիսկոպոս Նազգաշյան.
29. տ. Արսեն եպիսկոպոս Բերբերյան.
30. տ. Նարեկ եպիսկոպոս Ծաքարյան.
31. տ. Գևորգ եպիսկոպոս Սերադարյան.
32. տ. Հմայակ եպիսկոպոս Ինդրյան.
33. տ. Արիս եպիսկոպոս Ծիրվանյան.
34. տ. Ներսես եպիսկոպոս Պոզապալյան.
35. տ. Կյուրեղ եպիսկոպոս Գաբիկյան.
36. տ. Դավիթ եպիսկոպոս Սահակյան:

Եպիսկոպոսաց սույն ցանկից վախճանվել են.

1. տ. Հայկազուն արքեպիսկոպոս Աբրահամյան.
2. տ. Վարդան եպիսկոպոս Տեր-Սահակյան.
3. տ. Եզնիկ եպիսկոպոս Ազնավորյան.
4. տ. Պարզե եպիսկոպոս Վրթանեսյան.
5. տ. Ծավարշ եպիսկոպոս Գույումճյան.
6. տ. Մաշտոց եպիսկոպոս Թաշիրյան.
7. տ. Եղիշե եպիսկոպոս Սիմոնյան:

Վեհափառ Հայրապետը, ինչպես տեսնում ենք, հայ եկեղեցին օծուեց նորասպասկ իշխանավորներով՝ հանուն հայ եկեղեցու առաքելության բարձրացման նաև մե՛ր օրերին և ի պայծառություն մեր ժողովրդի հոգևոր սպասի:

Վեհափառ Հայրապետն Իր գահակալության ընթացքում բախտավոր եղավ Իր շուրջն ունենալու, որպես Գերագույն հոգևոր խորհրդի և Վերստուգիչ հանձնաժողովի անդամներ, որպես մերձավոր գործակիցներ, թե՛ հայ եկեղեցու բարձրաստիճան հոգևորականներ և թե՛ հայրենաբնակ վաստակաշատ, անվանի մտավորականներ, որոնք իրենց սրտագին մասնակցությունը բերեցին Հայոց Հայրապետի եկեղեցաշեն ու հայրենանվեր իրագործումներին:

Գերագույն հոգևոր խորհրդի համալրված ներկա կազմն է հետևյալը.

Տ. Սերովբե արքեպ. Մանուկյան.

Տ. Կոմիտաս արքեպ. Տեր-Ստեփանյան.

Տ. Ծահե արքեպ. Աճեմյան.

Տ. Հուսիկ եպ. Սանթրոյան.

Դոկտ.-պրոֆ. Առաքել Առաքելյան.

Ակադեմիկոս, դոկտ.-պրոֆ. Արարատ Ղարիբյան.

Դոկտ.-պրոֆ. Սարգիս Մելիքսեթյան.

Դոցենտ Հովհաննես Թովուզյան:

Գերագույն հոգևոր խորհրդի նիստերին մասնակցում են նաև, խորհրդակցական ձայնով, ի պաշտոնե, Մայր Աթոռի դիվանապետ տ. Արսեն եպ. Բերբերյանը, «Էջմիածին» ամսագրի խմբագիր Արթուր Հատիտյանը և Միջ-

եկեղեցական հարաբերությունների բաժնի ընդհանուր քարտուղար Պարգև Շահբազյանը:

Վեհափառ Հայրապետի գահակալության տարիներին Գերագույն հոգեվոր խորհրդին առընթեր գործել է միշտ վերստուգիչ հանձնաժողով, որի կազմում են այժմ.

Տ. Նարեկ եպս. Շաքարյան.

Եփրեմ Ալեքսանյան.

Բարսեղ Թաշճյան:

Վերջերս Վեհափառ Հայրապետի կարգադրությամբ Գերագույն հոգևոր խորհրդին առընթեր կազմվեց նաև Իրավագիտական խորհրդատու մարմին՝ հետևյալ կազմով.

Դոկտ. Վազգեն Հակոբյան.

Դոցենտ Մակիչ Ուզունյան.

Դոկտ.-պրոֆ. Գևորգ Խոլոպյան:

Վերջին քսան տարիների ընթացքում շինարարական աշխատանքները ղեկավարել է, Վեհափառ Հայրապետի հրավերով, Մայր Աթոռին առընթեր Ճարտարապետների գիտական հանձնաժողովը, որի կազմում են.

Դոկտ.-պրոֆ. Վարազդատ Հարությունյան (նախագահ).

Ակադեմիկոս, մկարիչ Գրիգոր Խանջյան.

Դոկտ.-պրոֆ. Կարո Ղաֆադարյան.

Դոկտ.-պրոֆ. Կոստանդին Հովհաննիսյան.

Ճարտարապետ Բաղդասար Արզումանյան.

Ինժեներ Կոստանդին Ալթունյան.

Ճարտարապետ Արծրուն Գալիկյան:

Կարևոր նշանակություն ունեցան նաև Վեհափառ Հայրապետի գահակալության տարիներին Մայր Աթոռում զանազան առիթներով գումարված ազգային-եկեղեցական և եպիսկոպոսաց ժողովները:


Վեհափառ Հայրապետն Իր ուշադրությունը կենտրոնացրեց նաև ներքին թեմերի վերակազմակերպման աշխատանքների վրա: Նրա անմիջական հսկողության և տարած հետևողական աշխատանքների շնորհիվ կարելի եղավ առավել կազմակերպված, բնականոն և արդյունավետ կյանք ստեղծել ներքին բոլոր թեմերում:

Այսօր Հայաստանի սահմաններից ներս ունենք երկու պատմական թեմեր՝ Արարատյան և Ծիրակի, որոնք իբրև կենտրոն ունեն Երևան և Լեհի-նական քաղաքները: Հայաստանի սահմաններից դուրս ունենք Վրաստանի, Ադրբեջանի և Ռուսաստանի թեմերը:

Բոլոր թեմերն ունեն իրենց թեմակալ առաջնորդները, բոլորն էլ Մայր Աթոռի երիտասարդ միաբաններ, ունեն իրենց թեմական խորհուրդներն ու եկեղեցական վարչությունները, որոնք հավատավոր և նվիրյալ քահանաների համագործակցությամբ ղեկավարում են թեմերի եկեղեցական, հոգևոր կյանքը՝ Վեհափառ Հայրապետի օրհնության ներքո:

Ինչպես Մայր Աթոռում, այնպես էլ ներքին թեմերում, Վեհափառ Հայրապետի նախաձեռնությամբ, հաստատվել է վարչա-տնտեսական կարգ ու կարգապահություն, որ գործադրվում է ճշգրտությամբ և բարեխղճությամբ: Մրանով էլ բացատրվում է Մայր Աթոռի և ներքին թեմերի ֆինանսական եկամուտների աճը:

Վեհափառ Հայրապետի գահակալության շրջանում ավելի քան երեք



ՎԵՆԱԾԱՆՈՐ ՀԱՅՐԱՊԵՏԸ ՀՈԲԵՆՑԱՆԱԿԱՆ ՀԱՆՐԱՊԵՏՈՒԹՅՈՒՆՆԵՐԻՆ ՆԵՐԿԱՔՈՒՅՐ ԵԿԵՂԵՑԻՆԵՐԻ ՀՈԳԵՎՈՐ ՊԵՏԵՐԻ ԵՎ ՀԱՅ ԵԿԵՂԵՑԻՆԻ ՆՎԻՐԱՊԵՏԱԿԱՆ ԱԹՈՐՆԵՐԻ ԳԱՀԱՎԱՆՆԵՐԻ, ԹԵՄԱԿԱՄԱՆ ԱՐԱՑՆՈՐԴՆԵՐԻ ՈՒ ԱՅՈՒ ՀՈԳԵՎՈՐՈՒԿԱՆ ՆԵՐԱՍԱՑՈՒՑԻՉՆԵՐԻ ՀԵՏ

ՀԱՅԱՍՏԱՆԻ ԱՊՈՍՏՈՒՆՆԵՐԻ  
 1984 Ն. Գ. ԴԵՑ. 15



ՀԱՅՈՑ ՀԱՅՐԱՊԵՏԸ, Տ. ՊԻՄԵՆ ՍՐԲԱՅԱՆ ՊԱՏՐԻԱՐԿԸ ԵՎ Տ. ԴԱԼԻԹ Ե ՊԱՏՐԻԱՐԿ-  
ԿԱԹՈՂԻԿՈՍԸ ՀԱՆԳԻԹԱՎՈՐ ՆԻՍՏԻ ԺԱՄԱՆԱԿՆԿ ՎԵՅԱՐԱՆԻ ՊԱՆԿԻՈՒՄ

ամրապնդվել, սերտացել է կապը Մայր Աթոռի և հայ եկեղեցու նվիրապետական սյուս Աթոռների ու արտասահմանյան թեմերի միջև:

Մայր Աթոռի և մեր ազգային եկեղեցական թեմերի փոխհարաբերությունը Վեհափառ Հայրապետին շահագրգռող կենտրոնական խնդիրներից մեկն է եղել, որովհետև այդ փոխհարաբերությամբ էլ բնորոշվել է Հայաստանյայց եկեղեցու մեկությունը և մեր ազգային-եկեղեցական կյանքի միասնությունը:


Այսօր, և մանավա՛նդ այսօր, Հայաստանյայց առաքելական եկեղեցին, Մայր Աթոռ ու Էջմիածնի գլխավորությամբ և նրա սիրախնամ թեմերի անմիջական գործակցությամբ, հոգևոր, ազգային, հայրենասիրական մեծ ու վճռական առաքելություն ունի կատարելիք հայ ժողովրդի կյանքում:

Հայ եկեղեցու արտասահմանյան թեմերն են. Ատրպատականի թեմ (կենտրոն՝ Թավրիզ), Թեհրանի թեմ (կենտրոն՝ Թեհրան), Սպահանի թեմ (կենտրոն՝ Նոր Ջուղա), Եգիպտոսի թեմ (կենտրոն՝ Կահիրե), Արևմտյան Իլիրոպայի թեմ (կենտրոն՝ Փարիզ), ԱՄՆ-ի արևելյան թեմ (կենտրոն՝ Նյու-Յորք), ԱՄՆ-ի արևմտյան թեմ (կենտրոն՝ Լոս-Անջելոս), Հարավային Ամերիկայի թեմ (կենտրոն՝ Բուենոս-Այրես), Իրաքի թեմ (կենտրոն՝ Բաղդադ), Հնդկաստանի թեմ (կենտրոն՝ Կալկաթա), Ավստրալիայի և Նոր Զելանդիայի թեմ ( կենտրոն՝ Սիդնեյ), Ռումինիայի և Բուլղարիայի միացյալ թեմեր (կենտրոններ՝ Բուխարեստ և Սոֆիա), Հունաստանի թեմ (կենտրոն՝ Աթենք) և Անգլիայի հայրապետական պատվիրակությունը:

Արտասահմանի մեր թեմերը նույնպես ունեն իրենց թեմակալ առաջնորդները՝ բոլորն էլ Մայր Աթոռի միաբաններ, անձնդիր և քաջ հովիվներ, ունեն թեմական կազմակերպություններ, համաձայն իրենց կանոնագրությունների: Թեմակալ առաջնորդներն ու թեմական կազմակերպությունները չափազանց շնորհակալ գործ են կատարում սփյուռքի պայմաններում մեր ժողովրդի հոգևոր, ազգային կյանքում, Մայր Աթոռ ու Էջմիածնի հոգևոր իշխանության և օրհնության ներքո:

Վեհափառ Հայրապետն Իր գահակալության առաջին իսկ օրերից հղացավ, կազմեց և գործադրության դրեց հայրենի մեր բազմաթիվ վանքերի և եկեղեցիների վերականգնման ու վերանորոգման մեծ ծրագիրները, որոնք քալլ առ քալլ կենսագործվեցին:

Վեհափառ Հայրապետի հրավերով Մայր Աթոռին առընթեր կազմված հայ անվանի ճարտարապետներից բաղկացած ճարտարապետական հանձնաժողովը գիտական հեղինակությամբ, ինքնաբուխ նվիրումով և մեծ սիրով իր վրա վերցրեց Մայր Աթոռի, պատմական վանքերի և եկեղեցիների շինարարական ու վերանորոգչական աշխատանքների ընդհանուր վերահսկողությունը՝ մարմին տալու համար շինարար և շինող Հայրապետի ծրագրերին: Այդ աշխատանքների շնորհիվ է, որ այսօր Մայր Աթոռը ստացել է իր արժանի շուքն ու բարեզարդությունը, փառավոր տեսքը: Այդ շինարարական աշխատանքների շնորհիվ է, որ վերանորոգվեցին կամ վերակառուցվեցին և վերազարդարվեցին առաջին հերթին Մայր տաճարը, Նոր Վեհարանը, Հին Վեհարանը, միաբանական սեղանատունը, Ղազարսպատը, մայրավանքի ողջ շրջափակը, որտեղ և կառուցվեց ուխտի և աղոթքի Հայ նահատակաց հուշարձանը, վերակառուցվեցին նաև մեր հայրենի արքավայրերը՝ վանքեր և եկեղեցիներ, ինչպիսիք են ս. Հովհաննիսեն, ս. Գայանեն, ս. Ծողակաթը, Խորվիրապը, ս. Գեղարդ վանքը, Օշականի ս. Մեսրոպ Մաշտոց եկեղեցին, Բջնու և Միսիանի եկեղեցիները, Դարավազյազի ս. Խաչը, Երևանի ս. Զո-



րավոր եկեղեցին, Լեհինականի, Կիրովականի, Ստեփանավանի, Մոսկվայի, Թրիխսիի, Բաքվի, Ռուստվի հայոց եկեղեցիները:

Ծինարարական այս ձեռնարկումների մեջ հիշատակության արժանի գործ հանդիսացավ Արագածի լանջերին, Բյուրական գյուղում, «Հայկաշէն» Հայրապետանցի կառուցումը, որի հողամասը 1969 թվականին հայրենի իշխանությունը սիրով տրամադրեց Հայոց Հայրապետին:

Այստեղ մասնավոր կարևորությամբ պետք է արձանագրել նաև Երևանի առաջնորդանիստ ս. Սարգիս եկեղեցու հիմնական վերակառուցումը, որն իր հայեցի ոճով համահնչուն է դարձել մեր մայրաքաղաքի ճարտարապետական կերպարին:

Ծորջ քսան տարի է, որ առանց ընդհատման այսպես շարունակվել են շինարարական, վերանորոգչական աշխատանքները Վեհափառ Հայրապետի նախաձեռնությամբ, Հայրապետ, Որի «կյանքի նպատակն իսկ է եղել» վերաշինությունը մեր պատմական կոթողների, որպեսզի «երազր անգամ մը ևս իրականություն դառնա», որովհետև Հայոց Հայրապետը քսան տարի է, «սկսած է շինել, ինչ որ անցյալի մեջ չար ձեռքեր քանդեցին դարեր և դարեր շարունակ»:

Ծինարարական վերոհիշյալ աշխատանքների զգալի մասը կատարվել է արտասահմանից ստացված նյութական հատկացումներով և բացառիկ նվիրատվություններով:

Այստեղ առաջին հերթին պետք է հիշել Մայր Աթոռի հանգուցյալ մեծ բարերար Գալուստ Կյուլպենկյանին և նրա արդար անունը կրող «Գալուստ Կյուլպենկյան» հիմնարկությունը, Հայ բարեգործական ընդհանուր միությունը, ինչպես նաև առանձին անհատ բարերար հավատացյալներ, որոնք իրենց նյութական հատկացումներով օժանդակեցին Վեհափառ Հայրապետի շինարարական լայն ծրագրերի իրականացմանը: Երախտագիտությամբ պետք է հիշել Մայր Աթոռի հետևյալ բարերարների անունները.

#### **Միացյալ Նահանգներից**

Ալեքս Մանուկյան, Հայկ Գալուբճյան, Էդվարդ Մարտիկյան, Պետրոս և Հմայակ Սարաֆյաններ, Տատոյր Տատոյան, Հերրի Թաթոսյան, Ստեփան Տեր-Գրիգորյան, Հերրի Բըրտ Մովսիսյան, Հովակիմ Մուրադյան:

#### **Ֆրանսիայից**

Նորհան Ֆրենկյան, Արծրուն Զրբաշյան, Մուշեղ Ծիերճյան, Նապոլեոն Պուլյուքյան, Գևորգ Պագըրճյան, Կարպիս Զրբաշյան, Կարպիս Ծնգըտըրյան, Մուշեղ Պետրոսյան:

#### **Անգլիայից**

Սարգիս Բյուրքճյան, Հոփսիսիմե Ռոզ-Թրիք, Պետրոս Ալեքսանյան, եղբայրներ Գևորգ և Հովհաննես Բյուրքճյաններ, Կարո Գրիգորյան, Գևորգ Թահուս, Թորոս Պարսամյան:

#### **Իտալիայից**

Երվանդ Հյուսիսյան, Ստեփան Սրապյան, եղբայրներ Հայկ և Թորգոմ Ղազարոսյաններ ու Օննիկ Մանուկյան:

#### **Արգենտինայից**

Եղբայրներ Հովհաննես և Սարգիս Տիարպեքիրյաններ, Գևորգ Սարաֆյան, Տիգրան Մյուրեքյան, Կոպեռնիկ Սաֆարյան:

#### **Ադիս-Աբեբայից**

Սարտիրո Տարագճյան և Լևոն Երզնկացյան:

**Հայեպից**

Սուրեն Գալենտեր:

**Սիդնեյից**

Հարություն Ակիմյան:

**Ժնևից**

Կարապետ Ղազարյան:

**Բեյրութից**

Գեղամ Տանձիկյան, Սարգիս Սարգիսյան, Երվանդ Դեմիրջյան և Կրոնասեր տիկնանց միություն:

**Վիեննայից**

Ազատ Վարդյան:

**Բրազիլիայից**

Գառնիկ Բազարյան:

Մեր շնորհակալությունն ենք հայտնում նաև այն բազմահարյուր հավատացյալներին, թե՛ ներքին թեմերից և թե՛ արտուրքից, որոնք թեև համեստ, բայց իրենց սրտաբուխ նվերներով սատարեցին և Էջմիածնի պայծառությանը:

Վեհափառ Հայրապետի գործունեությունը Մայր Աթոռում ընդգրկում է ընդարձակ հորիզոններ: Նրա ջանքերով կազմակերպվեցին Մայր Աթոռի դիվանատունն ու տնտեսական-ֆինանսական բաժինները, որոնց բարեկարգ գործունեությունը տվեց իր բարի պտուղները: Նորին Սրբությունն իր անմիջական հսկողության ներքո հաստատեց խնայողության ռեժիմ և գործիմացությամբ հետևեց Մայր Աթոռի բյուջեի գործադրությանը՝ ուշադիր լինելով, որ Մայր Աթոռի յուրաքանչյուր կուպեկը ծառայի իր նպատակին:

Վեհափառ Հայրապետի նախաձեռնությամբ Մայր Աթոռում բացվեցին ատաղձագործարանը, ոսկերչական և երկաթագործական արհեստանոցները, ասեղնագործության աշխատանոցը, դերձակատունը, մոմածուլարանը, սըրբազան նկարչության վերանորոգման արվեստանոցը, Մայր Աթոռի փոխարական միջոցների կենտրոնը (գարած)՝ 28 ավտոմեքենաներով: Այսպիսով, Մայր Աթոռը քսան տարիների ընթացքում դարձավ տնտեսա-ֆինանսական մի լուրջ հաստատություն՝ իր բազմաճյուղ և ընդարձակ գործունեությամբ: Բավական է արձանագրել, որ այսօր Մայր Աթոռի պաշտոնեական, արհեստավորների և աշխատավորության թիվը 160 է:

Որպեսզի կարողանանք թվերով արտահայտել Մայր Աթոռի ֆինանսական կացությունը, անհրաժեշտ ենք համարում արձանագրել այստեղ, որ 1975 թվականին Մայր Աթոռի եկամուտը եղել է 765 հազար ռուբլի, 1956 թվականի 240 հազար ռուբլու դիմաց:

Մայր Աթոռի եկամուտների գլխավոր աղբյուրներն են եղել մասնավորապես Մայր Աթոռը, Արարատյան հայրապետական թեմը և ս. Գեղարդ վանքը: Մայր Աթոռը զգալի եկամուտներ է ունեցել նաև Լեհիստանի, Վրաստանի և Ադրբեջանի թեմերից:

Մայր Աթոռի ընթացիկ ծախսերի բյուջեն հարյուր տոկոսով փակվել է վերոհիշյալ ներքին եկամուտներով: Մայր Աթոռի շինարարական բացառիկ ծրագրերը միայն իրականացվել են արտասահմանի մեր բարերարների կարևոր նվիրատվություններով:

Որպես ենք նաև հայտնելու, որ վերջին քսանմեկ տարիների ընթացքում արտասահմանից ստացված մեծագումար և փոքրագումար նվիրատվությունների շնորհիվ այսօր Մայր Աթոռը «Ունիոն դե բանկ Սուխ» դրամատան

մեջ ունի մի կարևոր անձեռնմխելի գումար, որի տոկոսները Մայր Աթոռն օգտագործում է տարեկան իր բյուջեն հավասարակշռելու համար:

Վեհափառ Հայրապետի գահակալության շրջանում հոգևոր ճեմարանը դարձավ Նրա հայրապետական սրտին մոտիկ և հարազատ հաստատությունը: Հայոց Հայրապետն է գլխավորել միշտ հոգևոր ճեմարանի դասախոսական կազմը: Հոգևոր ճեմարանի աշխատանքները տվեցին իրենց բարի արդյունքները: Անցնող քսան տարիների ընթացքում հոգևոր ճեմարանը սովել է 68 շրջանավարտներ, որոնցից 56-ն ընդունել են հոգևոր կոչում: Այսօր Մայր Աթոռում և ներքին ու արտասահմանյան թեմերում պաշտոնավարում են հոգևոր ճեմարանից շրջանավարտ 5 եպիսկոպոսներ, 16 վարդապետներ, 17 սարկավազներ և 18 քահանա հայեր:

Վեհափառ Հայրապետը հայ եկեղեցու վերականգնման աշխատանքներում և հայ ժողովրդի կրոնա-քարոչական դաստիարակության գործում պատասխանատու դեր է վերապահել Մայր Աթոռի պաշտոնատեղիք «Էջմիածին» ամսագրին, որը Նրա գահակալության օրոք ևս, ավելի քան քսան տարի, անընդմեջ հրատարակվում է:

Ամսագիրը Հայոց Հայրապետության կենդանի խոսքն է՝ ուղղված անխտիր Մայր Աթոռի հարազատ բոլոր զավակներին:

«Էջմիածին» ամսագիրը հանդիսացել է Հայոց Հայրապետի քսան տարիների գահակալության սրտատույ ճիգերի, կառուցումների, հաջողությունների կենդանի օրագրությունը: Ամսագրի առաջին էջերը միշտ զարդարել են հայրապետական կոնդակները, կրոնաշունչ և հայրենաթույր պատգամներն ու ելույթները, հովվապետական ուղևորությունների նկարագրությունները: Ամսագրի էջերում շոշափված և լուսաբանված են մեր ազգային-եկեղեցական կյանքի բազմաթիվ ու բազմապիսի հարցերը:

1960 թվականին Մայր Աթոռն օժտվեց իր սեփական տպարանով, որը սրտագին նվերն էր ԱՄՆ-ի հայոց թեմի: Այդ տպարանում հրատարակվում են «Էջմիածին» ամսագիրը, Մայր Աթոռի այլ հրատարակություններ, այդ թվում՝ Մայր Աթոռի օրացույցը: Հրատարակվել են նաև այբումներ, «Արարատ» և «Էջմիածին» ամսագրերի մատենագիտությունները, Հայոց Հայրապետի արտասահմանյան ինն ուղևորությունների գրքերը, «Վազգեն Ա Հայրապետ Հայոց» շարքի երեք հատորները և այլ հրատարակություններ:

Այստեղ ամենայն կարևորությամբ և երախտագիտությամբ պետք է արձանագրել Մայր Աթոռի տպարանից 1969 թվականին արևելահայերեն նոր թարգմանությամբ լույս տեսած «Չորս Ավետարաններ»-ի և «Գործք առաքելոց»-ի հրատարակությունը 10.000 օրինակ տպաքանակով և ապա 1975 թվականին Նոր Կտակարանի արևելահայերեն ամբողջական թարգմանության հրատարակությունը՝ դարձյալ 10.000 օրինակ տպաքանակով:

Վեհափառ Հայրապետի հրամանով Մայր Աթոռում արևմտահայ գրական լեզվով թարգմանվեց նույնպես Նոր Կտակարանն ամբողջությամբ, որը շուտով տպագրության կհանձնվի Երուսաղեմի հայոց սրբոց Հակոբյանց վանքի տպարանում:

Վեհափառ Հայրապետի նախաձեռնությամբ և հսկողությամբ կատարված հրատարակչական մեծ նվաճում էր նաև հայերեն և օտար լեզուներով «Հայկական եկեղեցիներ» (1970 թ.) և «Հայկական խաչքարեր» (1973 թ.) գեղարվեստական բարձր ճաշակով տպագրված այբումների հրատարակությունը՝ յուրաքանչյուրը 12.000 օրինակ տպաքանակով:

Վեհափառ Հայրապետի գահակալության տարիներին Մայր Աթոռում



մեծ հանդիսությամբ և համազգային շուքով կատարվեցին եկեղեցական, մշակութային, ազգային հիշարժան մեծ իրադարձությունների հոբելյանները, ինչպիսիք էին՝ 1962 թվականին և Մետրոպ Մաշտոցի ծննդյան 1600-ամյակը, Կ. Պոլսի պատրիարքության հաստատման 500-ամյակը, 1965 թվականին՝ Ապրիլյան եղեռնի 50-ամյակը, 1966 թվականին՝ Ոսկանյան Աստվածաշնչի հրատարակության 300-ամյակը, 1968 թվականին՝ Սարդարապատի հերոսամարտի 50-ամյակը, նույն թվականին՝ Երևանի հիմնադրության 2750-ամյակը, 1969 թվականին՝ Կոմիտաս վարդապետի ծննդյան 100-ամյակը, 1970 թվականին՝ Սոաքել վարդապետ Դավրիժեցու մահվան 300-ամյակը, Ներսես Աջոտակեցու ծննդյան 200-ամյակը, Խրիմյան Հայրիկի և հայր Ղևոնդ Ալիշանի ծննդյան 150-ամյակները, 1971 թվականին՝ Մայր Աթոռի տպարանի հաստատման 200-ամյակը, 1973 թվականին՝ և Ներսես Ծնորհայի Հայրապետի մահվան 800-ամյակը, 1975 թվականին՝ Ամենայն Հայոց Հայրապետության կիլիկյան շրջանի 600-ամյա պատմության փառքի ոգեկոչումը և այլ հոբելյաններ:

Վեհափառ Հայրապետի մշակութային գործունեության մեջ կարևոր տեղ է գրավում նաև Մայր տաճարին առընթեր եկեղեցական արվեստի թանգարանների կազմակերպումն ու հարստացումը, ձեռագրերի, հնատիպ գրքերի, սրբանկարների, հին դրամների, հայկական ասեղնագործությունների, եկեղեցական արծաթե սպասների, գորգերի և հնագիտական ու գեղարվեստական մեծ արժեք ներկայացնող այլ իրերի ձեռքբերումը և պահպանումը:

Վեհափառ Հայրապետի 20-ամյա բեղմնավոր գործունեության մեջ առանձին տեղ է գրավում աշխարհի խաղաղության պահպանման և ամրապրնդման գործին կամ խաղաղության դատին՝ Նրա բերած մասնակցությունը:

Խաղաղության ի նպաստ Նորին Սրբության կատարած աշխատանքները լիովին համապատասխանում են մեր սուրբ եկեղեցու ոգուն, մեր ժողովրդի և հայոց վերածնված հայրենիքի կենսական շահերին: «Քրիստոնեությունը էապես սիրո և խաղաղության մի առաքելություն է մարդկային կյանքի և հասարակության մեջ, իսկ Քրիստոս ինքը՝ Իշխան արդարության և Արեգակ արդարության: Հետևաբար ի՞նչ կա ավելի հարազատ Քրիստոսի եկեղեցու և Հայոց Հայրապետի համար, քան աշխարհի խաղաղության դատի պաշտպանությունը և ամրապնդումը բարեկամության՝ ազգերի և պետությունների միջև... խաղաղությունը կյանքի առողջ և ստեղծարար ուժերի ներդաշնակորեն զարգացող գոյավիճակն է արդարության լույսի տակ: Մեր օրերում, երբ մարդու հանճարը թռիչք է առած նվաճելու համար նյութական տիեզերքը ամբողջ մինչև արև՝ աղբյուրը լույսին, ինչքա՞ն հրաշալի պիտի լիներ տեսնել հաղթանակը նույն մարդու բարոյական հանճարին, նվաճումը արդարության և խաղաղության լույսին, որ դարեր առաջ շողաց հավատքի և հույսի բարձունքներից՝ աշխարհին բերելով պատգամը Աստուծո. «Յերկիր խաղաղութիւն, ի մարդիկ հաճութիւն», պատգամում է Հայոց Հայրապետը:

Անցնող քսան տարիների ընթացքում ահա այս հավատով և ոգով Հայոց Հայրապետն Իր ձայնը բարձրացրեց միջազգային համաժողովների և համագումարների բեմերից՝ Երևանում, Մոսկվայում, Պրագայում, Հելսինկիում և Բեռլինում՝ ի խնդիր խաղաղության, ի խնդիր զինաթափման, ի խնդիր ժողովուրդների բարեկամության և պետությունների խաղաղ գոյակցության:

Միջազգային այդ բեմերից Հայոց Հայրապետը, խոսելով խաղաղության մասին, չէր մոռանում նաև հիշել ու դատապարտել 20-րդ դարի սուսցին ցեղասպանությունը՝ հայկական Ապրիլյան եղեռնը, որին զոհ գնաց շուրջ երկու միլիոն հայություն, ցեղասպանություն, որը դուռ բացեց հետագա զարհուրելի այլ ցեղասպանությունների:

Հայոց Հայրապետը 1962 թվականին Իր խաղաղասիրական գործունեության համար պարգևատրվեց Ստոկհոլմի Խաղաղության պաշտպանության կոմիտեի «Ժողիտ Կյուրի» պատվանշանով:

Վեհափառ Հայրապետի գաճակալության տարիներին շարունակվեցին պահպանվել և առավել սերտացվեցին հայ եկեղեցու և քույր եկեղեցիների միջև քրիստոնեական եղբայրական կապերն ու համագործակցությունը մեր նախնայաց ոգով և օրինակով:

Արդի ժամանակներում եկեղեցական կյանքը հատկանշվում է միջեկեղեցական հարաբերությունների աշխուժացման, եկեղեցիների մերձեցման, համագործակցության և հանուն ապագա եկեղեցական միության կատարված շնորհակալ ճիգերով:

Հանրահայտ է հայ եկեղեցու ավանդական լայնախոհությունը և հարգանքը դեպի քույր եկեղեցիները: Այս ոգով մեր եկեղեցին Հայոց Հայրապետի գաճակալության քսան տարիների ընթացքում, Նրա հրահանգով և օրհնությամբ, մասնակցեց ԱՄՆ-ի ազգային եկեղեցիների համաժողովին (1957 թ.), Եկեղեցիների համաշխարհային խորհրդի երրորդ (1961 թ., Նյու-Դելհի), չորրորդ (1968 թ., Ուիսալա) և հինգերորդ (1975 թ., Նայրոբի) համագումարներին, համաօրթոդոքս եկեղեցիների Հոդոնսի ժողովին (1962 թ.), Վատիկանի երկրորդ ժողովին (1963—1965 թթ.) Մոնրեալի Հավատո և կարգի չորրորդ ժողովին (1964 թ.), Արևելյան ուղղափառ հինգ եկեղեցիների պետերի Ադիս-Աբեբայի համագումարին (1965 թ.) և այլն:

1962 թվականին Հայաստանյայց առաքելական եկեղեցին Հայոց Հայրապետի նախաձեռնությամբ անդամակցեց Եկեղեցիների համաշխարհային խորհրդին: Վերջին քսան տարիների ընթացքում քույր եկեղեցիների պետերի և Հայոց Հայրապետի միջև կատարվեցին փոխայցելություններ Էկումենիկ ոգով, որոնք առավել ևս սերտացրեցին հայ եկեղեցու եղբայրական կապերը քույր եկեղեցիների հետ: Այս ոգով Մայր Աթոռ այցելեցին, ի գլուխ եկեղեցական պատվիրակությունների, ռուս պրավոսլավ եկեղեցու պետեր՝ Նորին Արքայություններ Ս. Ալեքսի և Ս. Պիմեն Պատրիարքները, վրաց օրթոդոքս եկեղեցու պետեր՝ Նորին Արքայություններ Ս. Մելքիսեդեկ Գ, Ս. Եփրեմ Բ և Ս. Դավիթ Ե Արքազան Պատրիարք-կաթողիկոսները, Ռումինիայի Նորին Արքայություն Ս. Ժուստինիան Պատրիարքը, Բուլղարիայի Նորին Արքայություններ Ս. Կիրիլ և Ս. Մաքսիմ Պատրիարքները, Վատիկանի Քրիստոնյաների միության քարտուղարության նախագահ Նորին Գերագանցություն կարդինալ Ժան Վիլբրանդսը, Կ. Պոլսի Տիեզերական Պատրիարքության ներկայացուցիչ Էմիլիանոս Դիմիտրիադիս միտրոպոլիտը, ղպտի ուղղափառ եկեղեցու Պատրիարք Նորին Արքայություն Ամբա Ծեմուդա Գ-ը, Ալեքսանդրիայի և համայն Աֆրիկայի հույն ուղղափառ եկեղեցու Պատրիարք Նորին Արքայություն Նիկոլաոս Զ-ը, Լիբանանի հայ կաթողիկե համայնքի Պատրիարք Նորին Ամենապատվություն Իզնատիոս Պետրոս Պաթանյուսը, Եկեղեցիների համաշխարհային խորհրդի գլխավոր քարտուղարներ դոկտ. Վիսենտ Լուֆթը և դոկտ. Էոժեն Բլեյկը, անգլիկան, մալաբար և եթովպական քույր եկեղեցիների բարձրաստիճան պատվիրակություններ, ԱՄՆ-ի եկեղե-

ցիների ազգային խորհրդի նախագահ դոկտ. Միլլերը, Հեսսեն Նասսաու նահանգի (ԳՖՀ) ավետարանական-լուծարական համայնքի նախագահ դոկտ. Մարտին Նիմյուլլերը, ինչպես նաև Միջին Արևելքի հայ ավետարանական համայնքների նախագահ վերապատվելի Հովհ. Ահարոնյանը և բազմաթիվ այլ բարձրաստիճան եկեղեցականներ:

Այս տարիներին Հայոց Հայրապետը եղբայրական ջերմ հարաբերություններ հաստատեց նաև կրոնական այլ համայնքների հոգևոր պետերի, այդ թվում՝ Անդրկովկասի և Ադրբեջանի մուսուլմանների կրոնական վարչության պետ Ծելյու-Ուլ Իսլամ Հաքիմզադե Դեթիրովի, Միջին Ասիայի Ծելյու-Ուլ-Իսլամ Բաբախանովի, ինչպես նաև Հորդանանի, Դամասկոսի մահմեդական կրոնապետների հետ:

Իր հերթին Հայոց Հայրապետը պաշտոնական այցելություններ տվեց ռուս պրավոսլավ եկեղեցուն, վրաց օրթոդոքս եկեղեցուն, անգլիկան, ռոմին, բուլղար, դպտի, մալաբար և այլ քույր եկեղեցիների հոգևոր պետերին:

Այստեղ մասնավոր կարևորությամբ ցանկանում ենք արձանագրել հայ առաքելական և ռուս պրավոսլավ եկեղեցիների եղբայրական հարաբերությունների սերտացումն ու երկու հավատացյալ ժողովուրդների դարավոր խորհրդակցության ամրապնդումը Վեհափառ Հայրապետի գահակալության օրերին: Հայոց Հայրապետը ռուսաց պատրիարքության սիրալիր հրավերով զանազան առիթներով այցելեց Մոսկվա, Ջագորսկ և Կիև, ռուս պրավոսլավ եկեղեցու կրոնական կենտրոնները, և սրտագին հանդիպումներ ունեցավ երջանկահիշատակ Ս. Ալեքսի Պատրիարքի և այժմյան Պատրիարք Նորին Սրբություն Ս. Պիմենի հետ:

Այստեղ գոհունակությամբ արձանագրում ենք նաև Երուսաղեմի հայոց տ. Եղիշե պատրիարքի այցելությունը 1974-ին Ամենայն Հայոց Հայրապետի հետ Մոսկվա, Ջագորսկ և Կիև, ինչպես նաև Կ. Պոլսի հայոց տ. Ծնորք պատրիարքի այցելությունը Մոսկվա և Ջագորսկ՝ սրտագին հրավերով Ս. Պիմեն Սրբազան Պատրիարքի:

Բացառիկ նշանակություն ունեցավ 1961 թվականին Հայոց Հայրապետի հանդիպումը Կ. Պոլսում Տիեզերական Պատրիարք Նորին Սրբություն Աթենագորասի հետ: Պատմական-եկեղեցական կարևոր նշանակություն ունեցավ նաև հոռոմեական կաթոլիկ եկեղեցու պետ Նորին Սրբություն Պողոս Զ Պապի հրավերով Հայոց Հայրապետի այցելությունը Վատիկան 1970 թվականին՝ հայ եկեղեցու նվիրապետական մյուս Աթոռների գահակալներից և բարձրաստիճան հայ հոգևորականներից բաղկացած մեծ շքախմբով:

Միջեկեղեցական հարաբերությունների զարգացման տեսակետից պատմական մեծ իրադարձություններ հանդիսացան նաև Վեհափառ Հայրապետի այցելությունները մալաբար եկեղեցու կենտրոն (Քոթայամ, 1963 թ.), եթովպական եկեղեցու կենտրոն (Ադիս-Աբեբա, 1965 թ.), ապա անգլիկան եկեղեցու կենտրոն (Լամբեթ պալատ, 1956 և 1975 թթ.), Ե. Հ. Խ.-ի կենտրոն (Ժնև, 1963 թ.), այնուհետև Նրա հանդիպումները Միլանի, Վենետիկի, Փարիզի, Մարսելի, Լիոնի, Վիեննայի, Պորտուգալիայի կարդինալ արքեպիսկոպոսների և քույր եկեղեցիների այլ բարձրաստիճան հոգևորականների հետ:

Հայ եկեղեցու և քույր եկեղեցիների միջև հարաբերությունները կանոնավորելու և էլ ավելի սերտացնելու համար Վեհափառ Հայրապետի նախաձեռնությամբ Մայր Աթոռում 1969 թվականին ստեղծվեց Միջեկեղեցական

հարաբերությունների հատուկ բաժին, որը ձեռնհասորեն կատարում է իր առջև դրված պարտականությունները:

Հայաստանյայց առաքելական եկեղեցու պատմական առաքելություններից մեկն է եղել հայ եկեղեցու միության պահպանումը և Էջմիածնի օրհնության ներքո: Այս ոգին է իշխել ու տիրապետել մեր եկեղեցական ողջ կյանքի ընթացքում: Այդ նույն ոգով է առաջնորդվել նաև մեր հոբելյար Հայրապետն Իր գահակալության քսան տարիների ընթացքում:

Սփովել ենք աշխարհով մեկ, բայց միացած ենք և Էջմիածնի խորհրդով և աստվածային օրհնությամբ:

Ավա՛ղ, սակայն, 1956 թվականից սկսած հայ եկեղեցու ծոցում դրսևորվեցին Անթիլիասի կիլիկյան Աթոռի կողմից հակակառնական և կենտրոնախույս ձգտումներ և կատարվեցին ռոնձգություններ Մայր Աթոռի տիրախնամ թեմերից ներս: Ստեղծվեց եկեղեցական ծանոթ տազնապը:

Հայոց Հայրապետը, սակայն, առաջնորդված հայ եկեղեցու միության ոգով և հայ ժողովրդի գերագույն շահերի գիտակցությամբ, քանի՜-քանի՜ անգամներ, որպես գերագույն Պետը հայ եկեղեցու, համերաշխության և սիրո ձեռք մեկնեց Անթիլիասի Աթոռին, որպեսզի հայ եկեղեցու ծոցից վերանա եկեղեցական երկփեղկումն ու պառակտումը:

Այս նպատակով 1963 թ. հոկտեմբերին Հայոց Հայրապետը Երուսաղեմի հայոց պատրիարքարանում մասնավոր տեսակցություն ունեցավ Անթիլիասի Աթոռի տիրապետի գահակալի հետ, և կայացավ ցանկալի ողջագործումը՝ հուրախություն մեր եկեղեցու և համայն հայ ժողովրդի, որ ի Հայաստան և ի սփյուռու աշխարհի:

Այդ թվականներից մինչև այսօր թե՛ քանիվ և թե՛ գործով Հայոց Հայրապետն «արթուն կերպով հսկել է», որպեսզի ողջագործումի այդ ոգին «արմատանա մեր եկեղեցական և ազգային կյանքեն ներս և դառնա կենսաբեր ու պտղատառ»: Բայց, դժբախտաբար, Հայոց Հայրապետի սիրու և միության հորդորները մնացին ցարդ «ձայն քարթառոյ յանապատի», և Անթիլիասի եկեղեցական ու ազգային ղեկավարության մտայնության և գործելու եղանակի մեջ տեղի չունեցավ ոչ մի փոփոխություն: Աղոթում ենք և սպասում, որ մի օր Անթիլիասը գիտակցի իր սխալն ու վերադառնա հայ եկեղեցու միության կանոնական ու պատմությամբ նվիրագործված սկզբունքների՝ պահելով մասնավոր իր տեղն ու առաքելությունը հայ եկեղեցու նվիրապետության կառույցի մեջ:

Վեհափառ Հայրապետի գահակալության շրջանում Նրա ձեռնարկած հայրապետական ուղևորությունները, դեպի մեր ներքին և արտասահմանյան թեմերը, նոր էջ բացեցին հայ եկեղեցու բազմադարյան պատմության մեջ:

1956—1976 տարիներին հովվապետական ուղևորությունները հանդիսացան կարևոր իրադարձություններ հատկապես արտասահմանի հայության եկեղեցական, ազգային կյանքի համար:

Հայոց Հայրապետն արտասահմանում Իր հավատացյալ և հայրենասեր զավակների կողմից գտավ փառահեղ և արտագին ընդունելություն: Սփյուռքի հայությունն զգաց, որ սուրբ Էջմիածինն ինչպես միշտ, նաև այսօր հանդիսանում է հայոց հավատքի ծաշոակերտ բերդը և այն հոգևոր ու անքակտելի կամուրջը, որ կապում է ի սփյուռու աշխարհի ցրված հայությունն իր կրոնական կենտրոնին և իր մայր հայրենիքին:

Հովվապետական այս ուղևորությունների ժամանակ Հայոց Հայրապետն այցելեց մեր նվիրապետական մյուս Աթոռները՝ Անթիլիաս, Երուսաղեմ և

Կ. Պոլիս, եղավ թեմական մեր գրեթե բոլոր կենտրոններում, Գանգեսի ափերից մինչև Բոսֆորի ափերը, մինչև Ատլանտյանի և Խաղաղականի ափերը՝ բաշխելու Ավետարանի լույսը, ս. Էջմիածնի աստվածային օրհնությունը և վկայելու, թե մեկ է Հայաստանյայց առաքելական եկեղեցին և անբաժանելի, ինչպես ինքը՝ հայ ժողովուրդը, և թե բոլոր հայերը հարազատ գավակներն են Մայր Աթոռ ս. Էջմիածնի:

Այստեղ կարևորությամբ պետք է արձանագրենք Երուսաղեմի հայոց ամենապատիվ տ. Եղիշե սրբազան պատրիարք հոր սիրալիր հրավերով Հայոց Հայրապետի երկրորդ այցելությունը 1975 թ. հունիսին, «յուլատ և լերկրպագություն Սուրբ Տեղեաց», միաժամանակ կատարելու համար օծումը Երուսաղեմի ս. Հարության պատմական մեծ տաճարի հայկական մասի վերանորոգված վերնատան եկեղեցու, խորանների և խաչքարերի, ինչպես նաև նախագահելու սրբոց Հակոբյանց վանքում Ալեքս և Մարի Մանուկյանների իշխանական նվիրատվությամբ կառուցված ընծայարանի և Ժառանգավորաց վարժարանի նոր շենքի բացման հանդիսությունը:

Արտասահմանում կատարած Իր ուղևորությունների ժամանակ Հայոց Հայրապետը պաշտոնական հանդիպումներ ունեցավ զանազան երկրների պետական մի շարք բարձրաստիճան անձնավորությունների հետ, ինչպես օրինակ՝ ՍՍՀՄ Մինիստրների սովետի նախագահ մարշալ Նիկոլայ Բուզազին (1956 թ.), ՍՍՀՄ Մինիստրների սովետի նախագահի տեղակալ Ալեքսեյ Կոսիգին (1960 թ.), Ֆրանսիայի հանրապետության պրեզիդենտներ Ռեյնե Կոտի (1956 թ.) և Ժորժ Պոմպիդուի (1970 թ.), Հնդկաստանի հանրապետության պրեզիդենտ դոկտ. Բադհակրիշնանի, Հնդկաստանի վարչապետ Զավահալայ Ներուի (1963 թ.), Եթովպիայի կայսր Հայլե Սելասիեի (1965 թ.), Եգիպտոսի Սրաբակյան Հանրապետության պրեզիդենտ Գամալ Աբդել Նասերի (1956 թ.), Հորդանանի Հուսեյն Բ թագավորի (1963 և 1975 թթ.), Իսրայելի հանրապետության պրեզիդենտ Էֆրայիմ Գուսերի (1975 թ.), Լիբանանի հանրապետության պրեզիդենտ Կամիլ Շամունի (1956 թ.), Միավորված ազգերի կազմակերպության ընդհանուր քարտուղար Ու-Տանի (1968 թ.), Արգենտինայի հանրապետության պրեզիդենտ գեներալ Կառլոս Օնգանիայի (1968 թ.), Բրազիլիայի հանրապետության պրեզիդենտ մարշալ Կոստա Միլվայի (1968 թ.) Կերեկի (Կոնադա) վարչապետ Դանիել Ջոնսոնի (1968 թ.), Ավստրիայի հանրապետության պրեզիդենտ Ֆրանց Յոնասի (1961 թ.), Պորտուգալիայի հանրապետության պրեզիդենտ ծովակալ Ամերիկո Թոմուսի և վարչապետներ Անտոնիո Օլիվեյրա Սալզարի ու Մարչելլո Կանտանոյի (1961, 1970 թթ.), Թուրքիայի հանրապետության պրեզիդենտ գեներալ Ջեմալ Գյուրսելի (1961 թ.), Բուլղարիայի ժողովրդական Հանրապետության Պետական խորհրդի անդամ գեներալ Իվան Միխայլովի (1975 թ.) և Վրաստանի, Ադրբեջանի Մինիստրների սովետների նախագահների հետ զանազան առիթներով:

Մխիթարական է նաև հաստատել, որ գահակալության Իր քսան տարիների ընթացքում Հայոց Հայրապետը միշտ վայելել է բարյացակամ ու հարգալից վերաբերմունքը Հայաստանի բարեխնամ կառավարության: Նորին Սրբությունը եկեղեցական զանազան հարցերի սունչությամբ բազմիցս այցելել է Հայաստանի Գերագույն սովետի նախագահության նախագահներին և ՀՍՄՀ Մինիստրների սովետի նախագահներին:

Այս հանդիսավոր պահին պարտականությունն ունենք մեր խորագրաց երախտագիտությունն ու անկեղծ շնորհակալությունը հայտնելու մեր հայրե-

նի բարեխնամ կառավարությանը, ինչպես նաև Սովետական Միության կառավարությանը և կրոնների գործերի խորհրդին՝ վերջին բաան տարիների ընթացքում ս. Էջմիածնի և նրա Գահակալի գործունեությանն ակատմամբ նրանց ցուցաբերած հույժ բարյացակամ ու լայնախոհ վերաբերմունքի և բարոյական օժանդակության համար:

Սույն բաանամյակը լուսավոր և խոստումնալից մի հանգրվան է Հայոց Հայրապետի բեղմնավոր գործունեությանն ճանապարհի վրա: Մեր երախտագիտության առարկա է դառնում բաան տարիների վրա պատարագված Նրա կյանքը, որ ճշմարտապես եղավ պայծառ հավատքի, անդուլ աշխատանքի, հոգևոր, մշակութային և շինարար իրագործումների մի բեղուն շրջան:

Գերագույն հոգևոր խորհուրդս, հանուն բովանդակ հայ ժողովրդի, իր որդիական սերն ու հավատարմությունն է հայտնում դեպի մեր հավատի բազմադարյան կենտրոն Մայր Աթոռ ս. Էջմիածինը, որ ամեն հայ մարդու սրտում իր ամուր խարիսխն ունի, և դեպի նրա արժանավոր Գահակալը, որ իր մաքուր ձեռքերի մեջ է պահում հայրապետական իշխանության գավազանը՝ դեպի հայ եկեղեցին ու հայ ժողովուրդն ունեցած իր պարտքի և կոչման խորունկ գիտակցությամբ. «Զի այսպիսի իսկ և վայել էր մեզ Քահանայապետ սուրբ, անմեղ, անարատ» (Եբր. է 26):

Հորեղյար և սիրելի Հայրապետ մեր, թող պայծառ, խաղաղ և արևոտ լինեն Ձեր կյանքի հետագա տարիները՝ լի աստվածային օրհնությամբ, շքրջապատված մեր ժողովրդի պաշտամունքի հասնող սիրով, որպեսզի դեռ երկա՛ր ու երկա՛ր տարիներ շարունակեք մնալ Լուսավորչի Գահի վրա՝ կարողանալ իրագործելու համար Ձեր եկեղեցաշեն ու հայրենանկեր բոլոր անավարտ մնացած ծրագրերը՝ հանասասնություն Մայր Աթոռ ս. Էջմիածնի, ի պայծառություն Հայաստանյայց առաքելական եկեղեցու, ի բարօրություն հայրենյաց և ի մխիթարություն հավատացյալ ժողովրդի:



## Հ Ա Ղ Ո Ր Դ Ա Գ Ր Ո Ւ Թ Յ Ո Ւ Ն

Սույն թվականի սեպտեմբերի 25-ից մինչև հոկտեմբերի 5-ը սուրբ Էջմիածնում տեղի ունեցան սրբալույս մեռուցի օրհնության և Տ. Տ. Վազգեն Առաջին Ամենայն Հայոց կաթողիկոսի գահակալության քսանամյակին նվիրված հանդիսություններ:

Այս առթիվ Մայր Աթոռ Էին ժամանել Երուսաղեմի հայոց ամենապատիվ տ. Եղիշե պատրիարքը, Կոստանդնուպոլսի հայոց ամենապատիվ տ. Շնորհք պատրիարքը, հայ եկեղեցու բոլոր թեմակալ առաջնորդներն ու թեմերի պատգամավորները, Մայր Աթոռի բարերարներ, ինչպես նաև բազում հրավիրյալներ և բազմահազար ուխտավորներ:

Հանդիսություններին մասնակցելու համար ս. Էջմիածին Էին ժամանել նաև բույր եկեղեցիների հոգևոր պետեր և ներկայացուցիչներ:

Ռուս պրավոսլավ եկեղեցու պատվիրակությանը գլխավորում էր Մոսկվայի և համայն Ռուսաստանի Պատրիարք Նորին Սրբություն Տ. Պիմենը, վրաց օրթոդոքս եկեղեցու պատվիրակությանը՝ Նորին Սրբություն Տ. Դավիթ Ե Պատրիարք-կաթողիկոսը, Հնդկաստանի մալաբար եկեղեցու պատվիրակությանը՝ Նորին Սրբություն Բասիլիոս Մար Թոմա Մատթեոս Ա կաթողիկոսը:

Կաթոլիկ եկեղեցու պետ Ն. Ա. Պողոս Զ Պապին ներկայացնում էր կարդինալ Ժան Վիլբրանդսը, Քենտրբերիի արքեպիսկոպոսին՝ Լոնդոնի եպիսկոպոս Ջերալդ Ալեքսանդր Էլիսոնը, Երուսաղեմի հույն պատրիարքությանը՝ միտրոպոլիտ Գերմանոս Մամալիսը, Երուսաղեմի ֆրանչիսկյան միաբանությանը՝ Մատրիլիո Սակկի վարդապետը:

Սեպտեմբերի 25-ին, երեկոյան, Մայր տաճարում տեղի ունեցավ կիրակամբարի ժամերգություն և հոգևոր համերգ, որին ներկա եղան բույր եկեղեցիների պատվիրակությունները, հայ հոգևորական և աշխարհական պատգամավորներ, ինչպես նաև մեծ թվով ուխտավորներ:

Սեպտեմբերի 26-ին, կիրակի օրը, առավոտյան ժամը 10-ին, Մայր տաճարում հանդիսավոր սուրբ պատարագ մատուցեց Կ. Պոլսի հայոց պատրիարք տ. Շնորհք արքեպիսկոպոսը: Ս. պատարագի ընթացքում քարոզեց Հայոց Հայրապետը և ողջունեց ներկայությունը Մայր Աթոռի հոգևորական և աշխարհական բոլոր հյուրերի:

Ապա Մայր տաճարում ողջունվի և շնորհավորանքի խոսք ասաց նաև Տ. Պիմեն Սրբազան Պատրիարքը:

Պատարագից հետո հոգևոր պետերը առաջնորդվեցին Մայր տաճարի բակի արևմտյան մասում այս առթիվ պատրաստված պատվանդան:

Ժամը 12-ին Վեհափառ Հայրապետը, զգեստավորված, ողնկցությամբ Երուսաղեմի և Կ. Պոլսի հայոց պատրիարքների և տասներկու թեմակալ արքեպիսկոպոսների ու եպիսկոպոսների, ինչպես նաև քույր եկեղեցիների հոգևոր պետերի, առաջնորդվեց Մայր տաճարի զանգակատան առջև պատրաստված բեմ՝ կատարելու սրբալույս մեռուհի օրհնությունը:

Մայր տաճարի ամբողջ շրջափակը լցված էր տասնյակ հազարավոր ուխտավորներով, հավատացյալներով և հյուրերով:

Ժամը 12-ին սկսվեց մեռուհի օրհնության արարողությունն ըստ հայ եկեղեցու դարավոր կարգի և կանոնի:

Մեռուհի օրհնության արարողությանը ներկա էր նաև ՀՍՍՀ Միևհատրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը:

Արարողության վերջում Վեհափառ Հայրապետը քարոզեց հայ ժողովրդի համար սրբալույս մեռուհի ունեցած հոգևոր նշանակության մասին:

Մեռուհի օրհնության արարողությունից հետո հանդիսավոր մեծ թափուրով Ամենայն Հայոց Հայրապետը, քույր եկեղեցիների հոգևոր պետերը, ողջ հոգևորականությունը և թեմերի ներկայացուցիչներն առաջնորդվեցին Վեհաքանի գահասարահ, ուր Արևմտյան Եվրոպայի հայրապետական սյաստվիրակ և Ֆրանսիայի հայոց առաջնորդ տ. Սերովբե արքեպիսկոպոսը շնորհավորեց Հայոց Հայրապետին սրբալույս մեռուհի օրհնության ուրախ առիթով:

Գահասարահում ներկա էր նաև տիար Սարգիս Գասպարյանը:

Հանդիսության ավարտին օրհնության խոսքով հանդես եկավ Ամենայն Հայոց Հայրապետը:

Սեպտեմբերի 27-ին, երկուշաբթի օրը, առավոտյան ժամը 10-ին, Վեհաքանի հանդիսության դահլիճում տեղի ունեցավ հոբելյանական հանդիսություն՝ նվիրված Ամենայն Հայոց կաթողիկոս Վազգեն Առաջինի գահակալության քսանամյակին:

Հանդիսությանը ներկա էին քույր եկեղեցիների հոգևոր պետերն ու ներկայացուցիչները, ինչպես նաև Երուսաղեմի և Կ. Պոլսի հայոց ամենապատիվ պատրիարքները, հայ եկեղեցու բոլոր թեմակալ առաջնորդները, թեմերի պատգամավորները, Մայր Աթոռի բարերարները և բազում այլ հյուրեր՝ 350 հոգի:

Հանդիսությանը Սովետական Հայաստանի կառավարությունը ներկայացնում էր ՀՍՍՀ Միևհատրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը:

Հանդիսության բացումը կատարեց Հոբելյանական կենտրոնական հանձնաժողովի նախագահ տ. Եղիշե սրբազան պատրիարքը:

Հոբելյար կաթողիկոսի քսանամյա գործունեությանը նվիրված Գերագույն հոգևոր խորհրդի զեկուցագիրն ընթերցեց տ. Կոմիտաս արքեպիսկոպոսը:

Այս առթիվ Գերագույն հոգևոր խորհրդի անունից Ամենայն Հայոց կաթողիկոս Վազգեն Առաջինին նվիրվեց ոսկեծույլ և ականակոտ «Հայրապետական արծիվ» շքանշանը:

Ապա ՀՍՍՀ Միևհատրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը հանդես եկավ ողջույնի և շնորհավորանքի խոսքով:

Այնուհետև ողջույնի և շնորհավորանքի խոսքերով հանդես եկան տ. Թևոհր



պատրիարքը՝ հանուն հայ եկեղեցու նվիրապետական Աթոռների և բոլոր թեմերի, Տ. Պիմեն Պատրիարքը՝ հանուն ռուս պրավոսլավ եկեղեցու և Սինոդի, Տ. Դավիթ Ե Պատրիարք-կաթողիկոսը՝ հանուն վրաց օրթոդոքս եկեղեցու, Տ. Բասիլիոս Մար Թոմաս Մատթեոս Ա կաթողիկոսը՝ հանուն մալաբար եկեղեցու, կարդինալ Ժան Վիլբրամոսը՝ հանուն Պողոս Զ Պապի և հռոմեական կաթոլիկ եկեղեցու, Ջերալդ Ալեքսանդր Էլիսոն եպիսկոպոսը՝ հանուն անգլիկան եկեղեցու, Գերմանոս Մամալիս միտրոպոլիտը՝ հանուն Երուսաղեմի հույն պատրիարքության, Մատրիլիո Սակկի վարդապետը՝ հանուն Երուսաղեմի կաթոլիկ ֆրանչիսկյան միաբանության:

Երևանի ս. Մեսրոպ Մաշտոցի անվան ձեռագրաց Մատենադարանի տնօրինության և գիտական խորհրդի անունից ողջույնի խոսք ասաց նույն հաստատության տնօրեն ակադեմիկոս Լևոն Խաչիկյանը:

Սփյուռքահայության հետ մշակութային կապի կոմիտեի նախագահ Վարդգես Համազասպյանը, հանուն կոմիտեի, նույնպես ողջունեց և շնորհավորեց Հայոց Հայրապետին:

Հանդիսության ժամանակ ընթերցվեցին նաև ողջույնի և շնորհավորանքի հեռագրեր: Ջերմապես ընդունվեց ՍՍՀՄ Միևհատրների սովետին առընթեր կրոնների գործերի խորհրդի նախագահ Վ. Ա. Կուրյելովի շնորհավորական հեռագիրը:

Հայոց Հայրապետի գահակալության քսանամյակը հեռագրով շնորհավորել էին նաև Հ. Բ. Ը. Միության ցկյանս նախագահ Ալեքս Մանուկյանը և անվանի երաժիշտ-կոմպոզիտոր Արամ Խաչատրյանը:

Հանդիսության ավարտին շնորհակալության և երախտագիտության ջերմ խոսքով հանդես եկավ Ամենայն Հայոց կաթողիկոսը:

Ժամը 16-ին Երևանի «Արմենիա» հյուրանոցի ռեստորանում Հոբելյանական կենտրոնական հանձնաժողովը, ի պատիվ Հայոց Հայրապետի և բոլոր հյուրերի, կազմակերպեց պաշտոնական ճաշկերույթ, որին ներկա եղան 270 հոգի:

Սեպտեմբերի 28-ին, երեքշաբթի օրը, առավոտյան ժամը 10-ին, Վեհափառ Հայրապետի գլխավորությամբ, բոլոր հոգևոր պետերը, պատգամավորներն ու հյուրերն այցելեցին Ծիծեռնակաբերդի Հայ Առհատակաց հուշարձան: Այս առթիվ հուշարձանին գեղեցիկ ծաղկեպսակներ գետնեցին Վեհափառ Հայրապետը, Տ. Պիմեն Պատրիարքը և Տ. Դավիթ Ե Պատրիարք-կաթողիկոսը:

Նահատակաց հուշարձանի հավերժական կրակի շուրջ հայ և քույր եկեղեցիների հոգևոր պետերը, հայ հոգևորականությունը և բոլոր պատգամավորները միասնաբար աղոթեցին հայ Առհատակների հոգիների խաղաղության համար:

Ժամը 11-ին քույր եկեղեցիների հոգևոր պետերն ու ներկայացուցիչները Հայոց Հայրապետի գլխավորությամբ այցելեցին ս. Մեսրոպ Մաշտոցի անվան ձեռագրաց Մատենադարան և ծանոթացան հայ մշակույթի գանձերի հնագույն նուշներին:

Ժամը 12.30-ին Հայոց Հայրապետի գլխավորությամբ Տ. Պիմեն Պատրիարքը և Տ. Դավիթ Ե Պատրիարք-կաթողիկոսը պաշտոնական այցելություն սովեցին ՀՍՍՀ Միևհատրների սովետին առընթեր հայ եկեղեցու գործերի խորհուրդ:

Ժամը 15-ին «Արմենիա» հյուրանոցում ՀՍՍՀ Միևհատրների սովետին առընթեր հայ եկեղեցու գործերի խորհրդի նախագահ Սարգիս Գաապարյա-

նը, հանուն հայրենի կառավարության և եկեղեցական խորհրդի, ճաշկերույթ տվեց՝ ի պատիվ Հայոց Հայրապետի և Նրա հարգարժան հյուրերի:

Երեկոյան ժամը 20-ին Վեհափառ Հայրապետը հյուրականի «Հայկաշէն» հայրապետանոցում տվեց հրաժեշտի ընդունելությունը քույր եկեղեցիների հոգևոր պետերի և պատվիրակությունների պատվին:

Սեպտեմբերի 29-ին, չորեքշաբթի օրը, Տ. Պիմեն Պատրիարքը, Տ. Դավիթ Ե Պատրիարք-կաթողիկոսը, կարդինալ Վիլլբրանդը, Ջերալդ Էլիսն Էպիսկոպոսը, Գերմանոս Մամալիս միտրոպոլիտը, իրենց շքախմբի անդամներով, հրաժեշտ տվեցին Ամենայն Հայոց կաթողիկոսին, Մայր Աթոռին և մեկնեցին լավագույն տպավորություններով:

Սեպտեմբերի 30-ին, հինգշաբթի օրը, ժամը 13-ին, Վեհափառ Հայրապետի նախագահությամբ կատարվեց Վեհարանի բակում կանգնեցված և Հայոց Հայրապետի 20-ամյա գործունեությանը նվիրված հոբելյանական խաչքարի հանդիսավոր բացումը:

Այնուհետև հարգարժան հյուրերը Վեհարանում դիտեցին գեղարվեստական բարձր ճաշակով հորինված հայոց Մետրոպոլիտանի ապարդիտակերտները, որ պատրաստվել էր Հայոց Հայրապետի պատվերով՝ Իր հոբելյանի առթիվ:

Ժամը 17-ին Վեհարանում, Վեհափառ Հայրապետի նախագահությամբ, գումարվեց եպիսկոպոսաց խորհրդակցական ժողով, որին մասնակցեցին տ. Եղիշե, տ. Ծնորհք սրբազան պատրիարքները, թեմակալ առաջնորդները և հանդիսությանը ներկա եպիսկոպոսները՝ 20 հոգի:

Եպիսկոպոսաց սույն խորհրդակցական ժողովը որոշեց առաջիկա տարի, աշնանը, հրավիրել եպիսկոպոսաց ժողով, որը Երուսաղեմի հայոց ամենապատիվ տ. Եղիշե պատրիարքի հրավերով գումարվելու է Երուսաղեմի սրբոց Հակոբյանց վանքում:

Հոկտեմբերի 3-ին, կիրակի օրը, առավոտյան ժամը 10-ին, կատարվեց լոնդոնաբնակ Գևորգ և Հովհաննես Գյուրքեճյան եղբայրների նվիրատվությամբ Երևանի վերակառուցված ս. Սարգիս առաջնորդանիստ եկեղեցու նավակատիքն ու օծումը՝ ձեռամբ Արարատյան թեմի առաջնորդական փոխանորդ տ. Կոմիտաս արքեպիսկոպոսի:

Օրվա հանդիսության առթիվ քարոզեց Վեհափառ Հայրապետը:

Նույն օրը, ժամը 15-ին, Երևանի «Անի» հյուրանոցում, Արարատյան թեմի առաջնորդական փոխանորդի և թեմական խորհրդի կողմից, ի պատիվ հյուրերի, կազմակերպվեց հրաժեշտի ընդունելություն և Սարգիս եկեղեցու օծման առիթով:

Հոկտեմբերի 4—5 օրերին հոգևորական և աշխարհական բոլոր պատգամավորները հրաժեշտ տվեցին Հայոց Հայրապետին, Մայր Աթոռին և մեկնեցին շնորհակալ տպավորություններով:

Սեպտեմբերի 25-ից հոկտեմբերի 5 օրերը Մայր Աթոռի մեր օրերի պատմության մեջ հանդիսացան անմոռանալի օրեր, որոնք վերածվեցին մեր հավատքի կենտրոն և Էջմիածնի, նրա արժանավոր Գահակալի, մեր վերածընված մայր հայրենիքի շուրջ, հալ ժողովրդի համախմբվածության, սիրո, հավատարմության համազգային մի սրբազան տոնի:

ՀՌԲԵՆԱՆԱԿԱՆ ԿԵՆՏՐՈՆԱԿԱՆ ՀԱՆՁՆԱԺՈՂՈՎ

Մայր Աթոռ և Էջմիածին,

4 հոկտեմբերի 1976 թ.



**ՀԱՆԴԻՍՈՒԹՅՈՒՆՆԵՐ ՄԱՅՐ ԱԹՈՌՈՒՄ՝ ՍՐԲԱԼՈՒՅՍ  
ՄԵՌՈՆԻ ՕՐՀՆՈՒԹՅԱՆ ԵՎ ՎԵՀԱՓԱՌԻ ՀԱՅՐԱՊԵՏԻ  
ԳԱՀԱԿԱԼՈՒԹՅԱՆ ՔՍԱՆԱՄՅԱԿԻ ԱՌԻԹՈՎ**

**ԺԱՄԱՆՈՒՄ ՊԱՏԳԱՄԱՎՈՐՆԵՐԻ ԵՎ ՀՅՈՒՐԵՐԻ**

1976 թվականի սեպտեմբերի 25-ից հոկտեմբերի 5-ը պատմական և հիշարժան օրեր հանդիսացան մեր եկեղեցական և ազգային ժամանակակից պատմության մեջ ու մի ուշագրավ հանգրվան **Մայր Աթոռ ս. Էջմիածնի և Վեհափառ Հայրապետի** եկեղեցաշեն, հայրենամարտի գործունեության ճանապարհի վրա՝ ոգևորիչ արդյունքներով:

1975 թվականի հոկտեմբերին լրացավ Հայոց Հայրապետի գահակալության քսանամյակը:

Մայր Աթոռի **Գերագույն հոգևոր խորհուրդը** որոշեց 1976 թվականի աշնանը համազգային հանդիսությամբ նշել հիշարժան այդ իրադարձությունը և այս առթիվ ս. Էջմիածնում կատարել նաև սրբալույս **մեռոնի օրհնությունը**:

Հայոց Հայրապետի գահակալությունը մեր եկեղեցու ներկա պատմության ժամանակաշրջանում մի նոր էջ բացեց հայ եկեղեցու և Մայր Աթոռ ս. Էջմիածնի տարեգրության մեջ հոգևոր, եկեղեցական, մշակութային, շինարարական, հայրենասիրական ու խաղաղասիրական խանդավառ իրագործումներով, ինչպես նաև միջեկեղեցական հարաբերությունների սերտացման և ամրապնդման ուղղությամբ:

Անցնող քսան և մեկ տարիների ընթացքում Հայոց Հայրապետի բարձր անձնավորությունը հույնացել է Մայր Աթոռի և Հայոց վերածնված աշխարհի հետ: Նրա ոգեշնչող անձնավորությունից ճառագայթող լույսն է, որ ջերմացրել է ողջ հայության սիրտը որ ի հայրենիս և ի սփյուռու աշխարհի և անքակտելի կերպով կապել սուրբ Էջմիածնի և հայոց մայր երկրի հետ:

**Սեպտեմբերի 21-ից** սկսած մինչև **25-ը Մայր Աթոռ** ծամանեցին Երուսաղեմի հայոց ամենապատիվ տ. Եղիշե պատրիարքը, Կ. Պոլսի հայոց ամենապատիվ տ. Շնորհք պատրիարքը, Արևմտյան Եվրոպայի հայրապետական պատվիրակ և Ֆրանսիայի հայոց առաջնորդ տ. Սերովբե արքեպիսկոպոս Մանուկյանը, ԱՄՆ-ի հայոց արևելյան թեմի առաջնորդ տ. Փորզոմ արքեպիսկոպոս Մանուկյանը, ԱՄՆ-ի հայոց արևմտյան թեմի առաջնորդ տ. Վաչե արքեպիսկոպոս Հովսեփյանը, Հարավային Ամերիկայի հայրապետական պատվիրակ և Արգենտինայի հայոց առաջնորդ տ. Բաբգեն արքեպիսկոպոս Ապատյանը, Իրաքի հայոց առաջնորդ տ. Ասողիկ արքեպիսկոպոս Ղազարյանը, Ավստրալիայի և Նոր Զելանդիայի հայոց առաջնորդ տ. Գարեգին եպիսկոպոս Գազանճյանը, Ռումինիայի և Բուլղարիայի հայոց թեմերի առաջնորդ տ. Տիրայր եպիսկոպոս Մարտիրոսյանը, Անգլիայի հայրապետական պատվիրակ և Լոնդոնի հայոց հոգևոր տեսուչ տ. Ներսես եպիսկոպոս Պողոսյանը, Եգիպտոսի հայոց առաջնորդական փոխանորդ տ. Ներսես Ծ. վարդապետ Փապուճյանը, Դամասկոսի հայոց առաջնորդ տ. Ոսկան Ծ. վարդապետ Գալբակյանը՝ ի գլուխ եկեղեցական և աշխարհական պատգամավորների:


Ներքին թեմերից հույնապետ հանդիսություններին մասնակցում էին եպիսկոպոսաց դասը՝ ի գլուխ պատգամավորությունների. Արարատյան հայրապետական թեմի առաջնորդական փոխանորդ տ. Կոմիտաս արքեպիսկոպոս Տեր-Ստեփանյանը, Ծիրակի թեմի առաջնորդ տ. Նարեկ եպիսկոպոս Ծաքարյանը, Վրաստանի թեմի առաջնորդ տ. Գևորգ եպիսկոպոս Սերայդարյանը, Ադրբեջանի թեմի առաջնորդ տ. Հուսիկ եպիսկոպոս Սանթրոսյանը, ս. Գեղարդ վանքի վանահայր տ. Վահան եպիսկոպոս Տերյանը և Մայր Աթոռի դիվանապետ տ. Արսեն եպիսկոպոս Բերբերյանը:

Հրավիրյալների թվում էին՝ Փարիզում հայրապետական պատվիրակի փոխանորդ տ. Գյուտ եպիսկոպոս Նազաշյանը, Մարսելում հայրապետական պատվիրակի փոխանորդ տ. Հակոբ եպիսկոպոս Վարդանյանը, Կանադայի հայոց առաջնորդական փոխանորդ տ. Արիս եպիսկոպոս Ծիրվանյանը, Ավստրիայի հայոց հոգևոր հովիվ տ. Մեսրոպ Ծ. վարդապետ Գրիգորյանը, Իտալիայի հայոց հոգևոր հովիվ տ. Ծիրայր վարդապետ Թաշճյանը և Հնդկաստանի հայոց հոգևոր հովիվ տ. Հակոբ քահանա Գյոկչյանը:

Հանդիսություններին մասնակցելու համար ս. Էջմիածին էին ծամանելու ան քույր եկեղեցիների հոգևոր պետեր և ներկայացուցիչներ:

Ռուս պրավոսլավ եկեղեցու պատվիրակությանը գլխավորում էր Մոսկվայի և համայն Ռուսաստանի Նորին Սրբություն Պիմեն Պատրիարքը, վրաց օրթոդոքս եկեղեցու պատվիրակությանը՝ Նորին Սրբություն Տ. Դավիթ Ե Պատրիարք-կաթողիկոսը, հնդիկ մալաբար եկեղեցու պատվիրակությանը՝ Նորին Սրբություն Բասիլիոս Մար Թոմա Մառթեոս Ա կաթողիկոսը:

Հոռմեական կաթոլիկ եկեղեցու պետ Նորին Սրբություն Պողոս Զ Պապին ներկայացնում էր կարդինալ Ժան Վիլբերանդսը, անգլիկան եկեղեցուն և Բենդրեբերիի Տ. Ֆրեդերիկ Կոզան արքեպիսկոպոսին՝ Լոնդոնի եպիսկոպոս տ. Զերայդ Ալեքսանդր Էլիստը, Երուսաղեմի հունաց պատրիարքու-



ՄԱՐԱԿՆԻՑՈՒ ՄԵՐՈՒՆԻ ՕՐՀՆՈՒԹԱՆԿ ԱՐԿԵՐՈՒԹՅՈՒՆԻՆ ՄԻ ԿՈՂ



թյանը՝ տ. **Գերմանոս Մամախա միտրոպոլիտը**, Երուսաղեմի ֆրանչիսկյան միաբանությանը՝ կուստոդ տ. **Մաուրիլիո Սակկի վարդապետը**:

Երևանի օդանավակայանում հոգևորական և աշխարհական բոլոր պատգամավորները, ինչպես նաև քույր եկեղեցիների հոգևոր պետերն ու ներկայացուցիչները դիմավորվեցին հանդիսավորությամբ և ջերմորեն՝ հաճախ Վեհափառ Հայրապետի գլխավորությամբ:

Հայոց Հայրապետի և Մայր Աթոռի հարգելի հյուրերին Երևանի օդանավակայանում ողջունեց և բարի գալուստ մատթեց հայրենի կառավարության և ՀՍՄՀ Մինիստրների սովետին առընթեր հայ եկեղեցու գործերի խորհրդի անունից խորհրդի նախագահ պրն. **Սարգիս Գասպարյանը**:

Բոլոր հոգևորական պետերն ու պատգամավորներն օդանավակայանից հանդիսավորապես առաջնորդվեցին Մայր Աթոռ և Իջման ւտրք սեղանի առաջ կատարեցին իրենց ուխտն ու աղոթքը:

Հայոց Հայրապետը Մայր տաճարում ջերմորեն ընդունեց **Տ. Պիմեն Արքեպան Գատրիարքին, Տ. Գավիթ Ե Գատրիարք-կաթողիկոսին և Տ. Բասիլիոս Մար Թոմա Մատթեոս Ա կաթողիկոսին**:

Մայր տաճարում Հայոց Հայրապետը և քույր եկեղեցիների հոգևոր պետերը փոխանակեցին բարիգալուստ և ողջույնի ճառեր:

#### ԿԻՐԱԿԱՄՏԻ ԺԱՄԵՐԳՈՒԹՅՈՒՆ ԵՎ ՀՈԳԵՎՈՐ ՀԱՄԵՐԳ ՄԱՅՐ ՏԱՃԱՐՈՒՄ

**Սեպտեմբերի 25-ին, շաբաթ օրը**, երեկոյան ժամը 18-ին, քույր եկեղեցիների հոգևոր պետերը և հայ եկեղեցու նվիրապետական Աթոռների գահակալները, արքեպիսկոպոսներն ու եպիսկոպոսները, վարդապետներն ու բախանա հայրերը, Հայոց Հայրապետի գլխավորությամբ, եկեղեցական թափորով և ուխտավորների ու հավատացյալների խումներամ բազմությամբ առաջնորդվեցին Մայր տաճար՝ ներկա լինելու կիրակամոտի հանդիսավոր ժամերգությանը:

Հավարտ ժամերգության, ի պատիվ հոգևոր պետերի, պատգամավորների և ուխտավորների, տրվեց հոգևոր համերգ՝ Մայր տաճարի երգչախմբի կատարմամբ՝ գեղարվեստական ղեկավարությամբ խմբավար **Խորեն Մելխանեջյանի**:

Համերգի մեներգերը կատարում էր սիրված երգչուհի **Լուսինե Զաքարյանը**, իսկ երգեհոնի բաժինը՝ երգեհոնահար **Լևոն Աբրահամյանը**:

Համերգի ծրագրում կային «Խորհուրդ խորին»-ը, «Հասուն հատուն»-ը, «Քրիստոս պատարագեալ»-ը, «Գովես Երուսաղեմ»-ը, Բորդիանակու «Կոնչերտո»-ն, Չայկովսկու «Տէր ողորմես»-ն, «Հրեշտակային» հունական տաղը և Ա. Ծարպանտիեի «Լաուդատե Դոմինում»-ը:

Հոգևոր համերգի ավարտին հնչեց նաև վեհ ու հանդիսավոր «Հայրապետական ձոն»-ը, որ ստեղծագործել էր երգչախմբի վաստակավոր ղեկավար **Խորեն Մելխանեջյանն** ի պատիվ Հայոց Հայրապետի՝ Նրա գահակալության քսանամյակի առիթով:

Ժամը 20-ին քույր եկեղեցիների հոգևոր պետերն ու ներկայացուցիչները, ինչպես նաև հայ հոգևորականները, Վեհափառ Հայրապետի գլխավորությամբ, ընթերցեցին Մայր Աթոռի միաբանական սեղանատանը:

## ՀԱՆԳԻՍԱՎՈՐ ՍՈՒՐԲ ՊԱՏԱՐԱԳ ՄԱՅՐ ՏԱԾԱՐՈՒՄ

**Սեպտեմբերի 26. Կիրակի: Տոն Վարագա ս. Խաչի:**

Ժամը 10-ին Մայր տաճարում հանդիսավոր սուրբ պատարագ մատուցեց Կ. Պոլսի հայոց տ. Ծնորհք սրբազան պատրիարքը: Սուրբ սեղանին ապաստարկում էին տ. Գևորգ Ծ. վրդ. Կարախչյանը, տ. Ներսէս Ծ. վրդ. Փայունյանը, տ. Վիգեն, տ. Խաժակ վարդապետները և Մայր Աթոռի սարկավագների խումբը:

Ժամը 11-ին Վեհափառ Հայրապետը, քույր եկեղեցիների հոգևոր պետերը և ողջ հայ հոգևորականությունը եկեղեցական թափորով, Մայր տաճարի զանգերի տոնական ու զվարթ դողանջների ներքո, մայրավանքի շրջափակում հավաքված տասնյակ հազարավոր ուխտավորների և հավատացյալների խանդավառ արտահայտությունների ներքո, առաջնորդվեցին Մայր տաճար:

Մայր տաճարի աջակողմյան և ձախակողմյան դասերում, իրենց դիրքի և աստիճանի համեմատ, առանձին գահերի վրա, տեղ էին գրավել հոգևոր պետերը: Եկամյալանի սուրբ պատարագի երգեցողությունը կատարում էր Մայր տաճարի երգչախումբը:

«Հայր մեր»-ից առաջ սուրբ Սեղան բարձրացան Վեհափառ Հայրապետը և Տ. Պիմեն Պատրիարքը:

Տ. Պիմեն Սրբազան Պատրիարքը Մայր Աթոռում սրբալույս մեռոնի օրհնության ստիթով ներկաներին ողողեց ողջույնի և շնորհավորանքի հետևյալ ջերմ խոսքը.

Տ. ՊԻՄԵՆ ՊԱՏՐԻԱՐԷԻ ՈՂՋՈՒՅՆԻ ԽՈՍՔԸ ՄԱՅՐ ՏԱԾԱՐՈՒՄ  
(Կիրակի օրը, սեպտեմբերի 26-ին)

Զերդ Սրբություն,

ի Տեղ սիրեցյալ Սրբազան Ծայրագույն Պատրիարք և կաթողիկոս Ամենայն Հայոց Վազգեն Առաջին.

Ամենապատիվ Հովվապետներ,

Հարգարժան Հայրեր, եղբայրներ և քույրեր,

Հարգելի հյուրեր.

Մենք եկել ենք այստեղ, հնադարյան, բայց միշտ գեղեցիկ Էջմիածին սրբավայրը՝ բաժանելու համար Հայաստանյայց առաքելական սուրբ եկեղեցու ուրախությունը Ամենայն Հայոց Ծայրագույն Պատրիարք և կաթողիկոս Վազգեն Առաջինի հայրապետական գործունեության 20-ամյակի առիթով:

Եկել ենք նաև ներկա լինելու մեր հայ եղբայրների ու քույրերի հետ միասին, որոնք այնքան մոտ են մեզ հավատով ու քրիստոնեական կյանքով, մեռնօրհնության սրբազան արարողությանը:

Համուն ռուս պրովոպալա եկեղեցու, նրա հոգևոր դասի և հավատացյալ ժողովրդի Մենք ջերմորեն ողջունում ենք Զերդ Սրբությանը և սրտագին աղոթում, որպեսզի ամենաողորմածն Աստված պարգևի Ձեզ բազում արգասավոր տարիներ՝ նույն հաջողությամբ գլխավորելու համար եղբայրական հայ առաքելական եկեղեցին:

Այսօր նորից, ինչպես մի քանի տարիներ առաջ, Մենք խորին հուզմունքով մտանք Մայր Աթոռ սուրբ Էջմիածնի տաճար, որը կենդանի վկան

է մեծ, տաղանդավոր և ջերմասիրտ հայ ժողովրդի հինավուրց պատմության, մի ժողովուրդ, որն անցել է բազմադարյան փշոտ ճանապարհ և այժմ ձեռք բերել ծաղկուն կյանք մեր մեծ ու սիրեցյալ հայրենիքի ժողովուրդների եղբայրական ընտանիքում, որի բարօրությանը մենք նվիրում ենք մեր ընդհանուր աղոթքներն ու ջանքերը:

Այսօր Մենք գտնվում ենք այստեղ, ձեր մեջ, վկայելու Աստուծո օգնականությամբ պահպանված մեր հոտի մեծ սերը Ձեր և հայ եկեղեցու սիրեցյալ զավակների նկատմամբ, որպեսզի մեկ անգամ ևս ընդգծվեն մեր երկու եկեղեցիների ու ժողովուրդների միջև եղած սերտ կապերը:

Ողորմությամբ միակ Աստուծո և սուրբ Երրորդության Մենք ուրախ ենք հայտնելու, որ մեր եկեղեցական հարաբերությունները երբեք չեն մթազնվել անվատահույսության և անհասկացողության զգացումներով:

Հայ առաքելական եկեղեցին և ռուս պրավոսլավ եկեղեցին, ղեկավարվելով քրիստոնեական պարտքի գիտակցությամբ, սիրո և եղբայրության զգացումով գործել և գործում են հանուն քրիստոնեության՝ առաջնորդելով Աստուծո ժողովուրդը, դաստիարակելով իրենց հուտը հավատի և բարեպաշտության ոգով:

Մեր եկեղեցիները նշանակալից ուշադրություն են նվիրում եկեղեցական միության հարցերին ինչպես աստվածաբանական խնդիրները խորապես ուսումնասիրելու, այնպես էլ զանազան միջոցառման հանդիպումներին մեր ներկայացուցիչների մասնակցության միջոցով:

Տեղին է այստեղ նշել, որ օրթոդոքս եկեղեցիները և արևելյան հին (ոչ քաղկեդոնական) եկեղեցիները ամենայն անկեղծությամբ ձգտում են գտնել ուղիներ, որոնք տանելի դեպի կատարյալ միություն ի Քրիստոս: Նրանց այդ ձգտումը արտահայտվում է աստվածաբանական երկխոսությունների միջոցով: Մենք աղոթում ենք և հավատում, որ Տիրոջ օգնականությամբ մեր ջանքերը հաջողություն կունենան՝ վերականգնելու 15 դար առաջ եկեղեցիների՝ ի հաղորդության եղած և ապա ընդհատված հարաբերությունները, որով և կկարողանանք միաստեղ մոտենալ Հաղորդության սուրբ սկիհին՝ փառաբանելով մեր Հովվապետին և մեր Տեր Հիսուս Քրիստոսին, որը հանդիսանում է միակ, սուրբ, ընդհանրական և առաքելական եկեղեցու Գլուխը:

Խոսելով համատեղ գործունեության մասին, Մենք ընդգծում ենք մեր երկու եկեղեցիների ձգտումը՝ գործունե կերպով մասնակցելու այն բարի ջանքերին, որոնք նպաստում են միջազգային լարվածության թուլացման, խաղաղության պահպանման և ամրապնդման գործին, ինչպես նաև մեր բազմազգ մեծ պետության բարօրությանը:

Խաղաղությունը ընտանիքում՝ ընտանեկան կյանքի երջանկության և բարեկեցության հիմքն է. խաղաղությունը ամբողջ աշխարհում՝ բոլոր ժողովուրդների երջանկության ու բարօրության հիմքն է: Դա մի հնարավորություն է բոլոր եկեղեցիների համար հանգիստ և արդյունավետ կերպով իրագործելու իրենց առաքելությունը երկրի վրա: Մեծ է խաղաղության ջատագովներին խոստացված պարգևը, «որովհետև նրանք Աստուծո որդիներ պիտի կոչվեն» (Մատթեոս Ե 9): Մենք գոհունակությամբ նշում ենք, որ մեր երկու եկեղեցիների ապաստվորներն ու հավատացյալները միական են իրենց ցանկության մեջ՝ մասնակցելու աշխարհի վրա օրհնյալ ու բաղձալի խաղաղության ստեղծման գործին: Մենք հավատում ենք, որ կգա ժամանակ, երբ մարդիկ, ի կատարումն Եսայի մարգարեի խոսքերի, «իրենց սուրերը խոփե-



րի և իրենց նիզակները մանգաղների պիտի վերածեն. ազգը ազգի վրա սուր պիտի չվերցնի, և պիտի չսովորեն պատերազմել» (Եսայի Բ 4):

Այս նշանակալից օրը, աղոթելով այս սուրբ տաճարում, Մենք եռանդագին խնդրում ենք երկնավոր Հորը, որ սուրբ Գրիգոր Լուսավորչի հովանու ներքո եղող Հայաստանյայց առաքելական եկեղեցին իր իմաստուն Հովվապետի՝ Ծաղրազուն Գատրիարք-կաթողիկոս Նորին Սրբություն վազգեն Առաջինի ղեկավարությամբ առավել ամրանա և ծաղկի՝ բազմապատկելով հոգևոր արժեքները, արմատավորելով հավատը, բարեպաշտությունը, սերը և խաղաղությունը:

Թող Աստուծո Օրհնությունը միշտ լինի Հայաստանյայց առաքելական սուրբ եկեղեցու բարեպաշտ զավակների վրա: Թող Աստված գորացնի Ձեր Սրբության ուժերը՝ շարունակելու համար Ձեր օգուտաշատ հովվապետական գործունեությունը երկար և երկար տարիներ:

Թող մեր Տեր Հիսուս Քրիստոսի շնորհները, առավածային սերը և սուրբ Հոգու գորությունը լինի բոլորիս հետ:

Հայոց Հայրապետը, արտահայտելով Մայր Աթոռ ս. Էջմիածնի, ողջ հայ եկեղեցու և բովանդակ հայ ժողովրդի նորախոյունն այս հանդիսավոր առիթով, ողջունեց բոլոր հյուրերի ներկայությունը՝ ի դեմս Տ. Պիմեն Պատրիարքի, այսա բարոզեց օրվա հանդիսության հոգևոր նշանակության մասին և ասաց.

#### ՎԵՀԱՓԱՌ ՀԱՅՐԱՊԵՏԻ ԽՈՍՔԸ ՄԱՅՐ ՏԱՃԱՐՈՒՄ

(Կիրակի օրը, սեպտեմբերի 26-ին)

Ձեր Սրբություն, սիրեցյալ եղբայր Մեր ի Քրիստոս.

Այսօր մեր եկեղեցու համար, մեր համայն ժողովրդի համար պատմական մի օր է, սուրբ օր, որովհետև պատրաստվում ենք այս սուրբ պատարագով օրհնել մեռու մեր բարեպաշտ ժողովրդի համար:

Այս սրբազան պահին Դուք գալիս եք ոչ միայն Մեր կողքին լինելու ու Մեզ հետ նորախանգու և աղոթելու, այլ նաև բերում եք Ձեր արտից բխած քաղցր մաղթանքները՝ ողոյս մեր ս. եկեղեցուն, մեր ժողովրդին և անձամբ Մեր անձին: Եվ ներկայացնում եք Մեզ, իբրև թանկագին նվեր, մեր Տիրոջ և Փրկչի սրբանկարը: Մենք հանուն մեր եկեղեցու և ժողովրդի՝ հայտնում ենք Մեր խորագգաց շնորհակալությունը այն բոլոր բարիքների համար, որ Դուք շնորհում եք մեզ:

Դուք Ձեր խոսքում շատ գեղեցկահյուս կերպով ոգեկոչեցիք՝ սիրո կապերը մեր երկու եկեղեցիների և ժողովուրդների միջև: Իրապես՝ ռուս պրավոսլավ եկեղեցու և Հայաստանյայց առաքելական եկեղեցու հարաբերությունները դարերի պատմություն ունեն և սկիզբ են առնում տակավին Կիևյան Ռուսաստանի օրերից, երբ քրիստոնեության լույսը ծագեց ռուս հավատավոր ժողովրդի հոգու մեջ: Դարերի ընթացքում այդ բարեկամությունը առավել անեց և ծաղկեց, և Մենք, մեր օրերին մանավանդ, երջանիկ ենք առավել ամրապնդված տեսնելու դրանք: Այս վերջին 20 և ավելի տարիների ընթացքում չկա հայ եկեղեցու և մանավանդ ս. Էջմիածնի համար մի հանդիսավոր պահ, մի կարևոր իրադարձություն, որին ներկա եղած չլինեն ռուս եկեղեցու պատրիարքները կամ նրանց բարձր ներկայացուցիչները: Նույնպես և Մենք, անձամբ իբրև հայ եկեղեցու Գլուխ և կամ Մեր ներկայացուցիչները միշտ եղբայրական սիրով ներկա ենք եղել և մասնակցել ռուս

պրավապալ եկեղեցու կարևոր հանդիսություններին Մոսկվայում, Չագորսկում, Լենինգրադում կամ Կիևում:

Մեր երկու եկեղեցիների գործակցությունը առավել շեշտվում է նաև խաղաղության պայքարի ասպարեզում: Մենք միշտ միասին ենք եղել բարձր հնչեցնելու համար Քրիստոսի խաղաղարար խոսքը ամբողջ աշխարհում: Վատահ ենք, որ նաև հետ այսու մենք նույն աղոթքով և նույն աշխատանքով միասին պիտի լինենք:

Ահավասիկ Մենք անհամբեր պաասում ենք, որ առաջիկա գարունը բացվի, որպեսզի հայ եկեղեցու մի պատվիրակությամբ ներկա լինենք Մոսկվայում Ձեր գլխավորած խաղաղության համաշխարհային կրոնական համագումարին:


Ձեզ լիակատար հաջողություն ենք մաղթում, սիրեցյալ եղբայր, նաև երկար, երջանիկ և խաղաղ տարիներ Ձեր սուրբ առաքելության ճանապարհի վրա:

Թող Աստված օրհնի մեր երկու եկեղեցիների անքակտելի եղբայրությունը և գործակցությունը. ամեն:

Հավարտ ս. պատարագի ողջ հոգևորականությունը, Վեհափառ Հայրապետի գլխավորությամբ, Մայր տաճարից առաջնորդվեց Վեհարան, որտեղ կազմվեց հանդիսավոր մեծ թափոր:

Հայոց Հայրապետն Իր գահակալության քսանմեկերորդ տարում մեծաշուք հանդիսավորությամբ, չորրորդ անգամ լինելով, պիտի կատարեր սրբալույս մեռոնի օրհնություն, որով մի անգամ ևս պիտի փառավորվեր Մայր Աթոռ ս. Էջմիածինը, պաշտոնաճար Հայաստանյայց առաքելական եկեղեցին և մխիթարվեր համայն ժողովուրդը հայոց:





## ՕՐՀՆՈՒԹՅՈՒՆ ՍՐԲԱԼՈՒՅՍ ՄԵՌՈՆԻ

Սրբալույս մեռոնի օրհնությունը հայ հավատացյալ ժողովրդի սրտին խոսող նվիրական արարողություններից մեկն է: Դարեր ամբողջ մեռոնը հայ ժողովրդի համար հանդիսացել է իղ ցնծութեան, զգեստ լուսաոր, սրբութիւն հոգւոց և մարմնոց, շնորհ հոգևորական, պահապան կենաց, կնիք արդարութեան, զէն հաաստոյ, ոգոյ փրկութիւն, ցնծութիւն սրտից, ուրախութիւն յախտենական, լուսաորութիւն մտաց, ճառագայթ հոգւոց, փարատիչ ցառոց, պահապան շրթանց, անեցումն տղայոց, պարարումն ծերոց, ձեռնադրիչ նուիրելոց և պսակ հաաստացելոց (Կանոն սրբալույս մեռոնի օրհնութեան):

Աշնանային պայծառ, զվարթ և արևաշող օր է: Պատգամավորների, ուխտավորների աշխարհախումբ բազմությունը, ավելի քան քառասուն հազար հոգի՝ սփյուռքից, հայոց քաղաքամայր Երևանից, մեր հանրապետության զանազան շրջաններից և հարևան եղբայրական հանրապետություններից եկած, հոգեկան մեծ հրճվանքով, ազգային հպարտության քաղցր զգացումներով ներկա եղալ սրբալույս մեռոնի օրհնությանը, որը կատարվեց բացօթյա, Մայր տաճարի արևմտյան մասում, զանգակատան առաջ հատուկ պատրաստված բեմի վրա:


Առաջին անգամ այս սուրբ հողի վրա, այս սրբազան միջնուղորտում, հավանաբար 303 թվականին, ս. Գրիգոր Լուսավորիչն էր, որ օրհնել էր սրբալույս մեռոնը Արշակունի Տրդատ Գ հայոց արքայի կնքահայրությամբ: Այնուհետև, դարերի ընթացքում ս. Լուսավորչի հաջորդները միշտ օրհնել են սրբալույս մեռոնը, որպեսզի երբեք ու երբեք հայ եկեղեցում և հայ հոգիների մեջ «չպակսի ձեթը մաքուր իր կանթեղին, հոգիներեն՝ սրբազան հուր»:

Եվ ահա այսօր էլ հայ ուխտավորներն աշխարհի բոլոր ծագերից եկել են ս. Էջմիածին ու մայր հայրենիք՝ իրենց հետ բերելով բյուր կարոտներ,



ԳԻՐԿԱՆԻ ԱՆՏԻՔՆԵՐԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ

ՀԱՅԿԱՆԻ ԱՆՏԻՔՆԵՐԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ ԿԵՆՏՐՈՆԻ



ՍՐԱՍՊՈՒԹՅԱՆ ՄԵՐՈՒՆԻ ՕՐՀՆՈՒԹՅԱՆԸ ՆԵՐԿԱՆ ՀԱՎԱՏՆԱԳՅԱՆՆԵՐԻ ԲԱԶՄՈՒԹՅՈՒՆԸ

համբույր, երազ ու պաշտամունք, կրոնական և հայրենասիրական հույզ ու ապրում:

Սուրբ Էջմիածինը բոլորին կանչել է իր հովանու ներքո, իր մայրական գորովագույթ գիրկը՝ իր մեռոնաբույր օրհնությունն ու աղոթքը բաշխելու բովանդակ հայությունը:

Քառասուն օրեր առաջ Մայր Աթոռում սկսվել էր սրբալույս մեռոնի պատրաստությունը: Մեռոնի արծաթաձուլյ մեծ կաթսան, լցված ձիթապտղի անարատ յուղով, բալասանով ու անուշահոտ ծաղիկների յուղով, դրվել էր Ավագ սեղանի առաջ ամենօրյա «աղօթիւք և երգօք հոգևորօք» և ծածկվել «եօթն շղարշովք»:

Սրբալույս մեռոնի օրհնության առիթով Հայոց Հայրապետի թանկագին ու մտերիմ բարեկամ Բուդղարիայի **Տ. Մաքսիմ Սրբազան Պատրիարքն** ուղարկել էր հարյուր գրամ վարդի ընտիր և բուրումնավետ յուղ, որն այլ ծաղիկների յուղերի հետ խառնվում է օրհնվելիք մեռոնի մյուս նյութերին:

Եկեղեցական մեծահանդես թափորը սկիզբ առավ Վեհարանից և ձգվեց դեպի Մայր տաճարի առաջ պատրաստված բեմ:

Քահանայապետական լրիվ զգեստավորման մեջ թափորը գլխավորում էր **Վեհափառ Հայրապետը՝** շրջապատված **տ. Եղիշե և տ. Ծնորհք** սրբազան պատրիարքներով, որոնք նույնպես հանդիսավոր կերպով զգեստավորված էին իրենց դիրքի և պաշտոնի համաձայն, ինչպես նաև զգեստավորված տասներկու արքեպիսկոպոսներով և եպիսկոպոսներով, որոնք մասնակցելու էին սրբալույս մեռոնի օրհնության արարողությանը:

Թափորին մասնակցում էին նաև հանդիսությունների հրավիրված քույր եկեղեցիների հոգևոր պետերը, այդ թվում՝ **Տ. Պիմեն Սրբազան Պատրիարքը, Տ. Դավիթ Ե Պատրիարք-կաթողիկոսը, Տ. Բասիլիոս Մար Թոմա Մատթեոս Ա կաթողիկոսը, կարդինալ Ժան Վիլլբրանդը և Զերադդ Ալեքսանդր Էլիսան եպիսկոպոսը:**

Մյուս հոգևորականները, պատգամավորներն ու հյուրերը տեղ էին գրավել Հին Վեհարանի առաջ այս առթիվ պատրաստված մասնավոր բեմի վրա:

Թափորի առջևից ընթանում էին կարմրազգեստ, ջլապինդ երկու շաթիրները՝ արծաթագույն գավազաններով: Նրանց հետևում էին ջահակիրները: Թափորի կենտրոնական մասում երկու վարդապետներ կրում էին խաչվառն ու հայրապետական գավազանը, իսկ երկու սարկավազներ՝ սուրբ մեռոնի կաթսայի ոսկեթել երիզներով բանված սպիտակաթույր շղարշը: Սրանց հետևում էին սրբալույս մեռոնի օրհնության կնքահայրերը՝ **Գևորգ Թահտան (Լոնդոն), Հովակիմ Մուրադյանը (Նյու-Յորք), Բաֆֆի Պագրճյանը (Փարիզ)**՝ երեքն էլ գեղեցիկ շապիկներ հագած:

Այնուհետև թափորին մաս էր կազմում եկեղեցականների դասը, այսինքն՝ զգեստավորված տասներկու արքեպիսկոպոսների և եպիսկոպոսների շքախումբը՝ մասունքներով, արծաթապատ Ավետարաններով և այլ սրբություններով:

Մեռոնօրհնության ժամանակ, ըստ հայ եկեղեցու ավանդական կարգ ու կանոնի, օգտագործվում են աստվածամուղ սուրբ Գեղարդը, Կենաց սուրբ Փայտը, սուրբ Գրիգոր Լուսավորչի Աջը, սուրբ Թադեոս առաքյալի Աջը, սուրբ Բարթողիմեոս առաքյալի Աջը, սուրբ Հակոբ Մծբնա Հայրապետի Աջը, սուրբ Անդրեաս առաքյալի Աջը, արծաթապատ սուրբ Ավետարաններ, սուրբ մեռոնի մերանը, բալասանի անոթ-սրվակը և այլ սրբություններ:

«Հրաշափառ Աստուած» շարականի վեհ հնչյունների տակ, Տրդատյան կամարակապ դրան միջով եկեղեցական թափորի շքերթը բարձրանում էր զանգակատան առաջ հարդարված բեմ-սեղանի վրա: Նույն պահին վեհ ու հաղթական թեղաց «Ուրախ լեր» շարականը, որը հոգեկան անկատում բերկրյաձքի և խնդության հույզերով համակեց արարողությանը ներկա հազար-հազար հավատացյալների և ուխտավորների սրտերը:

Արդարև, այսօր ուրախ է Մայր Աթոռ ս. Էջմիածինը՝ «մայր՝ որդուվք բերկրեալ»:

Ամենուրեք լո՛ւյս, վեհություն՝ ու ցնծություն՝ ուն:

Բեմի վրա Հայոց Հայրապետը բազմեց «յայտոռ, և երկոտասան եպիսկոպոսունք կալով շրջապատ առաջի, ունելով ի ձեռս իրեանց զսուրբ նշանն Կենաց և զԱջ սրբոյ Լուսատրչին և զճշխարս սրբոց և մեռոնաշիջ մի լցեալ հին մեռոնա» և կատարեց «գլխորհրդածութիւն սրբոյ մեռոնի», ըստ սրբալույս մեռոնի օրհնության կանոնի:

Ապա սրբազան եպիսկոպոսներն Աստվածաշնչից կատարեցին համապատասխան հատվածների ընթերցումներ սուրբ յուրի պատրաստության հոգևոր, մաքրագարող նշանակության և նրա գործածության մասին Հին և Նոր Կտակարաններում:

Այնուհետև Հայոց Հայրապետն ընթերցեց մեռոնօրհնության մեծ աղոթքը. «Արդ՝ զօրութեամբ ամենատուրք Հոգւոյդ եղիցի իղս այս... զգետս լուսատր, սրբութիւն հոգւոց և մարմնոց, պահապան կենաց, զէն հաւատոյ, կնիք արդարութեան... ցնծութիւն սրտից... զի որ ոք օծցի ի սմանէ, վերստին ծննդեան իղովս երկիւղած լինի յԱստուծոյ և աներկիւղ հակառակորդէն...»:

Դպրաց դասը, միաբերան և ներդաշնակ, երգեց մեռոնօրհնության խորհրդին նվիրված մի շարք հոգեղից շարականներ: Հայոց Հայրապետն ապա ընթերցեց մեռոնօրհնության երկրորդ և երրորդ մեծ աղոթքները: Այնուհետև «լինի բացումն դրան նիւթոյ մեռոնի», այսինքն՝ լուսարարապետ տ. Հուսիկ եպիսկոպոսը բացեց մեռոնի արծաթյա կաթասայի կափարիչը, մինչ դպիրները ոգևորությամբ երգում էին. «Բացեր, Տէ՛ր, այս օր զգանձդ երկնային» շարականը: Նույն պահին վեհափառ Հայրապետը հանդիսավորապես կաթասայի մեջ լցրեց «զնիւթ ծաղկանցն և ապա զբալասանն և զկնի զհին մեռոնն»՝ ասելով շարական «Առաքելոյ աղանոյ»:

Օրհնված հին մեռոնի ոսկի շիթերը, արևի ճառագայթների տակ պապալալով, թափվում էին նոր մեռոնի մեջ զի լիցի դրդողմն: Նույն պահին, տոնական ու վեհ, հնչեցին Մայր տաճարի զանգերը: Ներկա հավատացյալ ժողովրդի և բազմահազար ուխտավորների հոգևոր բերկրանքը հասավ իր գագաթնակետին: Նույն նվիրական թոսյեին Հայոց Հայրապետը Կենաց սուրբ Փայտով, սուրբ Գեղարդով և ս. Գրիգոր Լուսավորչի Աջով երեք անգամ տյառնագրեց ու խառնեց նոր մեռոնը՝ աղոթելով. «Օրհնեսցի՛ և սրբեսցի՛ մեռոնս այս նշանա...»: Բոլոր սրտերից և հոգիներից միաբերան ու պաղատագին թեղաց՝ «ամէ՛ն, ալելուիա՛»-ն, որը, տարածվելով Արարատյան դաշտով մեկ, գնաց հեռո՛ւ հորիզոններ, որպեսզի սովին օծութեամբ զընդհանուր ժողովուրդս (հայոց) աբասցես ամբանալ...:

Ապա նորից մեռոնի կաթասան ծածկվեց կափարիչով և շղարշով:

Հանդիսադիր Հայրապետն արարողության ավարտին կարդաց վերջին աղոթքը.

«Արդ՝ այժմ և մեք պատրաստելով զսա որպէս կաթն՝ մատուցանենք զի ամենեքեան որ ի սմանէ առնուցուն, արժանի լիցին ընդունել զհաստատուն

կերակոր՝ նշմարիտն, գերկնայինն՝ ի շնորհաց Միածնի քո Տեսնն մերոյ Յիսուսի Քրիստոսի... Եւ այժմ ծագեա՛ ի սիրտս մեր զպարգևս բարութեան Հոգւոյդ սրբոյ, և հաղորդակիցս երևեցո՛ զմեզ պարգևաց քոց սրբոց, վաւրնգլի», Դու իսկ ես Մեռնն անբիծ և մաքուր և անաղարտ որ հաճապագ բուրեւ յանձինս սրբոց քոց:

Հայոց Հայրապետի «Պատկանիչ»-ով ավարտուեց սրբալույս մեռոնի օրհնության արարողությունը:

Քույր եկեղեցիների հոգևոր պետերն ու ներկայացուցիչները խոր ուշադրությամբ և երկյուղածությամբ հետևում էին արարողությանը «Կանոն օրհնության սրբալույս մեռոնի»՝ անգլերեն թարգմանությամբ, որն այս առթիվ լույս էր տեսել Երուսաղեմի սրբոց Հակոբյանց վանքի տպարանից գեղատիպ հրատարակությամբ:

Հանդիսությանը ներկա էին ՀՍՍՀ Միևիստրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը և տեղակալ Անդրանիկ Հարությունը:

Այժմ քարոզի պահն է: Վեհափառ Հայրապետը խոսում է Իր ներշնչված քարոզներից մեկը՝ օրվա հոգեգմայլ հանդիսության տպավորության ներքո՝ վեր հանելով սրբալույս մեռոնի հոգևոր խորհուրդն ու ազգային մեծ նշանակությունը մեր ժողովրդի կյանքում:

#### ՀԱՅՈՑ ՀԱՅՐԱՊԵՏԻ ՔԱՐՈԶԸ ՍՐԱՆՈՒՅՍ ՄԵՌՈՆԻ

ՕՐՀՆՈՒԹՅԱՆ ԱՌԹԻՎ

(26 սեպտեմբերի 1976 թ.)

**Յանուն Հօր և Որդւոյ և Հոգւոյն սրբոյ.**

«Այսօր է գոր արար Տէր, եկաք ցնծացուք և ուրախ եղիցուք ի սմա»:

Սիրելի հավատացյալ ժողովուրդ.

«Այս օրը ինքն Աստված պարգևեց մեզ, ցնծացեք և ուրախ եղեք»:

Այսօր Մայր Աթոռ ս. Էջմիածնի պատմության մեջ մի բացառիկ հանդիսավոր պահ է, որովհետև Աստուծո գործությամբ և սուրբ Հոգու ներգործությամբ Մենք արժանի եղանք, Մեր հոգևոր եղբայրների հետ միասին, աղոթելու և աղերսելու, որ աստվածային գործությունը և շնորհները իջնեն այս յուրի մեջ, որ այժմ արդեն սովորական յուղ չէ, այլ՝ մեռոն կամ մյուռոն, կամ ինչպես մենք սիրում ենք ասել՝ սրբալույս մյուռոն:

Մյուռոնը հունարեն բառ է: Նշանակում է անուշահոտ յուղ: Տակավին անհիշելի ժամանակներից ի վեր, Արևելքում մանավանդ, սովորություն կար և նվիրական ավանդություն՝ ձիթենու յուղը օգտագործելու որպես օծանելիք, այն մտածումով, որ այդ յուղի մեջ, որում հաճախ անուշահոտություններ էին խառնում, իջնում է խորհրդավոր մի գործություն, սրբարար գործություն:

Հին Կտակարանի աշխարհում բազում անգամներ պատմվում է, թե ինչպես օգտագործվել է այդ սրբազան յուղը: Օրինակի համար, Տապանակ ուխտին, որ Իսրայելի ժողովրդի Սրբություն Սրբոցն էր, օծվում էր անուշահոտ ձիթենու յուղով: Օծվում էին նաև այն անձինք, որոնք կոչված էին սպասավորելու այդ սրբությունների առաջ, այսինքն՝ հոգևորականները: Բայց նաև Նոր Կտակարանում օծման զաղափարը անցել է ուղիղ ճանապարհով և մի քանի անգամներ, հենց մեր Տիրոջ և Փրկչի՝ Հիսուսի կյանքում, օգտագործվել է ձիթենու յուղը իբրև օծանելիք:



Մի պարագա միայն ուզում ենք հիշել այստեղ իբրև վկայություն: Ինքը՝ Հիսուս, տակավին իր հրապարակային գործունեությունը չսկսած, բայց անմիջապես Հորդանան գետում մկրտվելուց և անապատի փորձությանց շրդաթայից անցնելուց հետո, երբ գալիս է իր հայրենի քաղաքը՝ Նազարեթ, այնտեղ շրջապատում են Նրան բնակիչներից շատեր, հարցոսիրորձեր են անում, և Նա ոգեկոչումի մի պահին, դրսևորելու համար իր աստվածությունը, բացում է ս. Գիրքը և կարդում Եսայի մարգարեի այն վկայությունը, թե՛ «Աստուծո Հոգին Իմ վրա է, որովհետև Նա Ինձ օծեց»: Այս խոսքը, այս դեպքում, վերաբերում էր հենց Հիսուսին, որ Աստուծո Որդին էր՝ առաքված աշխարհ՝ փրկչական առաքելությամբ և որպես օծյալը Աստուծո:

Ահավասիկ, սիրելի հավատացյալներ, թե ինչպես և՛ Հին Ուխտի աշխարհում, և՛ Քրիստոսի Ավետարաններում փառաբանվում, մեծարվում, հարգանքի և նույնիսկ պաշտամունքի առարկա է դառնում ձիթենու յուղը: Այսպես պետք է բացատրել այն մեծ իրողությունը, որ եկեղեցիները բոլոր, զոհե պատմական եկեղեցիները, ընդունեցին այս ավանդությունը ամենայն երկյուղածությամբ, և ջրով մկրտվելուց հետո՝ սուրբ մեռոնի դրոշմով նվիրագործեցին Հին և Նոր Կտակարանների յուղով օծման ավանդությունը:

Հայաստանյայց առաքելական եկեղեցին բացառիկ շուքով, հանդիսավորությամբ տոնավաճառում է մեռոնի օրհնության արարողությունը, ինչպես մենք արեցինք այսօր: Մենք, իբրև ձեր Հայրապետը, հոգեպես անհունորեն մխիթարված ենք, որ դուք, սիրելի զավակներ Մեր, թե՛ մայր երկրից՝ սովետական հայրենիքից և թե՛ արտասահմանի երկրներից, հավաքվել եք հազար-հազարներ, որպեսզի ներկա՞ գանվեք այս սուրբ արարողությանը:

Սրբալույս մեռոնը պատրաստվում է մեզ մոտ բացառիկ ուշադրությամբ ու խնամքով, աղոթքներով և ծիսական արարողություններով: Գիտեք անշուշտ, սիրելի հավատացյալներ, թե մեր եկեղեցին մեռոնը պատրաստում է հիմնականում ձիթենու յուղից՝ ձիթալուղից, բայց մեզը խառնում է բավականաչափ բալասան, և նաև քառասուն համեմունքների և ծաղիկների հյութեր, որոնց մեջ կարևոր տեղ են գրավում վարդի յուղը, նարնջի յուղը և ծիրանի յուղը: Մենք այս բոլորը խառնեցինք այսօր այս մեր օրհնած սրբալույս մեռոնի մեջ: Ու այսպիսով սրբագործվեց այն: Մենք վստահ ենք, թե Աստված պիտի ընդունի մեր աղոթքները, մեր ուխտերը, և այս մեռոնը իր սրբարար գործությամբ պիտի բաշխվի տարիներ-տարիներ շարունակ հետ այսու, մեր ժողովրդի բոլոր զավակներին, որոնք մկրտությամբ դրոշմվում են սրբալույս մեռոնով:

Մեր իղձն ու մաղթանքն է, որ հայ ժողովրդի մեջ ոչ մեկը չմնա ճակատը առանց մեռոնի:

Մեր ժողովուրդը հավատում է սրբալույս մեռոնի սրբարար գործությանը: Մենք էլ հավատում ենք, որ մեռոնը սրբացնում է, մաքրում, ազնվացնում մեր մարմինն ու հոգին: Մեր ժողովուրդը հավատում է սրբալույս մեռոնի շնորհատու գործյանը, թե սուրբ մեռոնի միջնորդությամբ սուրբ Հոգին բաշխում է մեր ազգի զավակներին իր շնորհները, այսինքն՝ լույսը գիտակցության, ճառագայթը հանճարի և առաքինությունները բարոյական, որոնցով զարդարված են մեր ժողովրդի հոգիները տակավին այն օրերից, երբ ս. Գրիգոր Լուսավորիչը, հենց այստեղ երևի, առաջին անգամ սուրբ մեռոն օրհնեց, և այդ օրերից սկսեց բաշխվել այն:

Եթե նկատեցիք այսօր, Մենք հատուկ սափորով նոր մեռոնի մեջ խառնեցինք նաև հին մեռոնից մի մաս: Այդ նշանակում է, որ դրա մեջ կար նաև

մի մասնիկ այն օրհնված մեռոնից, որ սրբացավ ս. Գրիգոր Լուսավորչի օրհնությամբ և ձեռամբ: Մեր ժողովուրդը հավատում է սրբալույս մեռոնի բուժիչ զորությանը և, այդ, Մենք էլ հավատում ենք, որ մեր մարմնի տկարությունները և մանավանդ մեր հոգեկան վերքերը և վշտերը ամոքվում են և մեղմանում, և երբեմն նույնիսկ բուժվում սրբալույս մեռոնի զորությամբ:

Մեր ժողովուրդը հավատում է, և մեր պատմությունն էլ վկայում է, որ սրբալույս մեռոնը ունի իր մեջ նաև եղբայրարար զորություն, այսինքն՝ թե բոլոր նրանք, ովքեր ընդունում են իրենց ճակատի վրա դրոշմը այս մեռոնի, դառնում են նույն եկեղեցու, նույն ազգի անբաժանելի զավակները, և դառնում այսպիսով հարազատ եղբայրներ: Համայն հայ ժողովուրդը սուրբ մեռոնով կազմում է անքակտելի մի եղբայրություն՝ հոգևոր, մշակութային և ազգային իմաստով: Այս մանավանդ թելադրանքն է և պատգամը մեր բազմադարյան պատմության:

Մեր ժողովուրդը հավատում է նաև, վերջապես, սրբալույս մեռոնի խաղաղարար զորությանը: Սո՛րբ մեռոնի միջոցավ սուրբ Հոգվո շնորհների բաշխումով հայ հավատացյալների հոգիները խաղաղվում են, աճում է սերը և եղբայրական ոգին նույն ժողովրդի զավակների միջև, և առհասարակ մարդկանց միջև:

Մենք խոսում ենք մեր դարաշրջանում խաղաղության մասին, և ճիշտ ենք անում, որ խոսում ենք ու աղոթում: Աղոթում ենք վասն խաղաղության ամենայն աշխարհի: Բայց պետք չէ մոռանալ, և այդ Հիսուսի Ավետարանն է մեզ թելադրում և ուսուցանում, որ ճշմարիտ խաղաղությունը սկիզբ է առնում մարդկանց հոգիներից: Հեռևաբար մենք մաղթում ենք, որ այս սուրբ մեռոնով խաղաղություն իջնի հայ ժողովրդի բոլոր զավակների հոգիների մեջ, և այդ խաղաղության ճառագայթումը տարածվի նաև մեր ազգի սահմաններից այն կողմ, և իրականանա Աստուծո կամքը՝ «չերկիր խաղաղութիւն, ի մարդիկ հաճութիւն»: Մանավանդ մենք, իբրև հայ ժողովրդի և եկեղեցու զավակներ, որ անցյալում բազում անգամներ մահվան անդունդի առջև ենք գտնվել, պատերազմի արհավիրքների շրջաններում, ինչպես այդ պատահեց մանավանդ 1915—1916 սև տարիներին, ինչպես այդ պատահեց հերոսական մարտնչումների տարիներին, Հայրենական մեծ պատերազմի ընթացքում, մաղթենք և աղոթենք, որ աշխարհը, ժողովուրդները և մարդիկ այլևս երբեք և երբեք, և ոչ մեկ տեղ չտեսնեն պատերազմներ և արյունահեղություններ, տիրի եղբայրություն և համերաշխ գործակցություն բոլոր ազգերի և բոլոր պետությունների միջև, հերջանկություն բոլորին:

Միրելի ժողովուրդ, այս մաղթանքներով Մենք մի անգամ ևս գոհություն ենք մատուցում Աստծուն, որ Մեզ արժանի արեց օրհնելու այսօր սուրբ մեռոնը մեր եկեղեցու և մեր ժողովրդի համար: Բոլորի՛դ, բոլորի՛դ, որ ներկա էք այստեղ և համայն մեր ժողովրդին՝ օրհնություն աստվածային, լույս և շնորհք Հոգվույն սրբո, և սեր ու խաղաղություն Տեսն մերո Հիսուսի Քրիստոսի, այժմ և հավիտյան. ամեն:

### ԸՆԴՈՒՆԵԼՈՒԹՅՈՒՆ ՎԵՀԱՐԱՆՈՒՄ

Սրբալույս մեռոնի օրհնությունից հետո վեհափառ Հայրապետը եկեղեցական թափորով, երգով ու խնկով, բազմահազար ժողովրդի խանդավառ արտահայտությունների ներքո առաջնորդվեց վեհարան՝ օրվա տոնի առթիվ ընդունելու շնորհավորություններ:

Օտար և հայ ողջ հոգևորականությունը, պատգամավորներն ու հյուրերը, ուխտավորները և պաշտոնական այլ անձինք տեղ էին գրավել շքեղ գահասարահում:

Այստեղ ևս ներկա էին պարոն Սարգիս Գասպարյանը և պարոն Անդրանիկ Հասրաթյանը:

Հանուն հայ եկեղեցու լրության, բովանդակ հայ ժողովրդի, սրբալույս մեռոնի օրհնության ուրախ առիթով Հայոց Հայրապետին սրտատույ բարեմաղթություններով շնորհավորեց Արևմտյան Եվրոպայի հայրապետական պատվիրակ և Ֆրանսիայի հայոց առաջնորդ տ. Սերովբե սրբեպիսկոպոսը հետևյալ ուղերձով.

ԱՐԵՎՄՏՅԱՆ ԵՎՐՈՊԱՅԻ ՀԱՅՐԱՊԵՏԱԿԱՆ ՊԱՏՎԻՐԱԿ ԵՎ  
ՖՐԱՆՍԻԱՅԻ ՀԱՅՈՑ ԱՌԱՋՆՈՐԴ Տ. ՍԵՐՈՎԲԵ ԱՐՔԵՊԻՍԿՈՊՈՍԻ  
ԽՈՍՔԸ ԳԱՀԱՍՐԱՀՈՒՄ  
(26 սեպտեմբերի 1976 թ.)

Աստվածարյալ Հայրապետ,

Այսօրվան պատմական և վեհաշուք սրբալույս մեռոնի օրհնության առթիվ թույլ տվեք հանուն հայ հոգևոր դասուն, հայ հավատացյալներուն և հանուն ամբողջ հայ ժողովուրդին, որ ի հայրենիս և ի ափսոսա աշխարհի, սրտագին շնորհավորել Ձեզ և հայտնել ամենուն երախտագիտական զգացումները Ձերդ Ս. Օծության հանդեպ:

Ձեր հայրապետության քսան և մեկ տարիներու ընթացքին Աստված բախտավոր առիթը շնորհեց Ձեզի չորս անգամ կատարելու շնորհաբաշխ սուրբ մեռոնի օրհնությունը. բայց այսօրվանը ամենեն պատմականն ու մեծաշուքը եղավ, վասն զի ոչ միայն բազմահազար հավատացյալներ խանդավառությամբ, երկյուղածությամբ և արցունքոտ աչքերով հետևեցան այս բացառիկ և հոգեպարար արարողության, այլև անոր մասնակցեցան, նաև պատմական և քույր եկեղեցիներու բարձրաստիճան ներկայացուցիչները, որոնց անունները Դուք արդեն հիշեցիք Ձեր այնքան հոգեշունչ և պերճախոս պատգամին մեջ:

Սուրբ մեռոնի օրհնությունը մեր եկեղեցվո ամենեն ժողովրդական և խորհրդավոր արարողությունն է, ուր սուրբ Հոգվույն շնորհները կիջեն և սուրբ մեռոնի միջոցավ կբաշխվին հայ հավատացյալներուն: Ան մեր ժողովուրդի հոգեկան կյանքի ամենեն թանձրացյալ արտահայտություններեն մեկն է, որ ոսկի շղթայով մը մեզ կկապե մեր անցյալի հավատավոր հայրապետներու ստեղծագործ ոգիին, հայրապետներ, որոնց արժանավոր հաջորդն եք Դուք, և կգորացնե ու կվերապրեցնե մեր ազգային սրբությունները, մեր քրիստոնեական հավատքը և սերը մեր հոգևոր և մշակույթի արժեքներուն:

Կուզեմ վստահեցնել Ձերդ Վեհափառությունը, որ այս պատմական և հիշատակելի օրվան առթիվ ամբողջ հայ ժողովուրդին մտածումներն ու զգացումները կեղրոնացած են մայր հայրենիքի սիրտին՝ Մայր Աթոռ ս. Էջմիածնի մեջ կատարվող սրբալույս մեռոնի օրհնության և շինարար, ազգասեր և աստվածարյալ Հայրապետիդ 20 տարիներու արդյունաշատ գործունեության շուրջ:

Մեր ժողովուրդի պատմությունը պլեկոծ ծովու մը կնմանի, որուն միակ խաղաղ նավահանգիստը եղած է մեր ս. եկեղեցին և անոր հայրապետները,

անոր ոչ միայն հոգևոր, այլ նաև քաղաքական առաջնորդները եղած են անոր դժվարին պայմաններում մեջ: Դուք ալ, Վեհափառ Հայրապետ, անոց արժանավոր հաջորդը, ոչ միայն բացառիկ կերպով այս 20 տարիներու ընթացքին պայծառացուցիք և ծաղկեցուցիք Մայր Աթոռ ս. Էջմիածինը, անոր շրջակա վանքերը և բոլոր եկեղեցիները, այլ նաև մեր հավատքին խորհուրդը՝ ս. Էջմիածինը, և ամբողջ մեր ազգային սրբությունները վերակենդանացուցիք, և անոնք վերստին ծնան ամբողջ հայ ժողովուրդի հոգիին և մտքին մեջ: Ասոր համար, Վեհափառ Հայրապետ, մեր ամբողջ ժողովուրդը երախտապարտ է Ձերդ Ա. Օծության, որ այս 20 տարիներու ընթացքին սպասեց և իմաստուն կերպով ղեկավարեցիք-առաջնորդեցիք մեր եկեղեցին և, Մայր Աթոռ ս. Էջմիածնի հովանիին տակ, հովվեցիք և մխիթարեցիք գանձոնք, որուն համար ամբողջ հայ ժողովուրդը երախտապարտ է Ձեզի: Ամեն եկեղեցի, ամեն գաղութ կարծեք թե մրցուի ելած է ավելի փառավոր կերպով տոնելու, հիշատակելու և պանծացնելու համար Ձեր 20 տարիներու այնչափ արդյունավոր վաստակը:

Հանուն ամբողջին, Վեհափառ Հայրապետ, դարձյալ շնորհակալություն և երախտագիտություն Ձեզի, մաղթելով, որ Աստված տակավին շատ երկար, առողջ կյանք պարգևե Ձեզի, որպեսզի սլապիսի պատմական, համագաղային և համաեկեղեցական ղեպքերով պայծառացնեք Մայր Աթոռը, տարածեք քրիստոնեական լույս հավատքը, ի փառս Աստուծո և ի պայծառություն Հայաստանյայց առաքելական եկեղեցվո և Մայր Աթոռ ս. Էջմիածնի:

Այս առթիվ, Վեհափառ Հայրապետ, թույլ տվեք, որ մասնավորապես հիշեմ, թե ֆրանսահայ գաղութը ս. մեռոնի օրհնության և Ձեր գահակալության հանդիսավոր առիթով, որոշած է Փարիզի մեջ պատրաստել տալ կոպյեն գորգ մը ս. Գրիգոր Լուսավորչի տեսիլքով, հավերժացնելու համար Ձեր գահակալության 20-րդ տարեդարձը և այսօրվան սրբալույս մեռոնի օրհնությունը: Իսկ Փարիզի մեր ազգայիններեն Մայր Աթոռ ս. Էջմիածնի բարերար և փարիզյան շրջանի Աստվածածին եկեղեցվո բարերար պ. Նուրհան Ֆրեակյան, ի հիշատակ անցած տարի Ձեր այցելության իր դղյակը և իր ընտանեկան դամբարանին օրհնության առիթով, իր կողմե կնվիրե, Փարիզի հայ ոսկերիչներուն կողմե պատրաստված, իր և իր ընտանիքին կողմե իրրև նվեր այս գավազանը, որ այժմ իր իսկ ձեռքով պիտի հանձնե Ձերդ Վեհափառության:

Երկար կյանք և առավել արդյունավետ գործունեություն Ձեզ՝ միշտ ի փառս Աստուծո և ի պայծառություն Հայաստանյայց առաքելական եկեղեցվո և Մայր Աթոռ ս. Էջմիածնի:

Հանդիսության ավարտին Հայոց Հայրապետը հանդես եկավ շնորհակալության և օրհնության հետևյալ խոսքով.

ՀԱՅՈՑ ՀԱՅՐԱՊԵՏԻ ՕՐՀՆՈՒԹՅԱՆ ԽՈՍՔԸ ԳԱՀԱՍՐԱՀՈՒՄ  
(26 սեպտեմբերի 1976 թ.)

Աստվածային օրհնություն ենք համարում այն իրողությունը, որ Մեր գահակալության 21 տարիների ընթացքում ահավասիկ չորրորդ անգամն է, որ կարողացանք Մեր հոգևոր եղբայրների հետ միասին օրհնել սրբալույս մեռոնը: Մեր կյանքի ամենաերջանիկ օրերից մեկն է այսօր:

Շնորհակալություն բոլորին: Նախ մեր քույր եկեղեցիների Հովվապետների և ներկայացուցիչներին, մեր մայր եկեղեցու բարձրաստիճան հոգևոր

եղբայրներին, մեր ժողովրդի զավակներին, որոնք շրջապատում են Մեզ այս պահին: Մենք զգում ենք նրանց սերն ու հարգանքը դեպի Մայր Աթոռ և Էջմիածինը:

Ենորհակալություն նաև Ձեր զգացված, ջերմ, եղբայրական խոսքերի և մաղթանքների համար, սիրելի Սերովբե սրբազան: Ձեզի հատուկ պերճախոսությամբ Դուք վեր հանեցիք կարևորությունը այս պատմական օրվան:

Ենորհակալություն նաև Ձեզ, հարգարժան տիար Նուրհան Ֆրենկյան, այս գեղեցիկ հուշանվերի՝ ոսկեգլուխ հայրապետական զավագանի համար, որ պիտի մնա անմոռանալի հիշատակ, դարեր շարունակ, և Մեր ձեռքից այն պիտի փոխանցվի Մեր հաջորդներին, ու այս ձևով միշտ պիտի հիշվի Ձեր անունը, Ֆրենկյան պատվական գերդաստանի անունը: Թող Աստված լուսավորի հոգիները Ձեր բոլոր ննջեցյալների: Աստված երկար կյանք պարգևի Ձեզ, Ձեր զավակներին և թոռներին, և արժանի անի ձեզ բոլորը սուրբ Հոգու շնորհներին. Ամեն:

Ժամը 15-ին վեհարանի սեղանատանը, ի պատիվ հայ և օտար հոգևորականության, օրվա հանդիսության առթիվ տրվեց պաշտոնական ճաշկերույթ:



# ՎԵՆԱՐԱՆՈՒՄ



## ՀՈՐԵԼՅԱՆԱԿԱՆ ՀԱՆԴԻՍԱՎՈՐ ՆԻՍՏ

**Սեպտեմբերի 27-ին, երկուշաբթի օրը, առավոտյան ժամը 10-ին, Վեհարանի հանդիսությանց շքեղ դահլիճում տեղի ունեցավ հանդիսավոր միստ՝ մկիրված Տ. Տ. Վազգեն Ա Ամենայն Հայոց կաթողիկոսի գահակալության քսանամյակին:**

Վեհարանի հանդիսությանց դահլիճը լցվել էր հայ և օտար հոգևորականներով, պատգամավորներով, հյուրերով, ուխտավորների բազմությամբ, ինչպես նաև մայրաքաղաքի գիտական, մշակութային, ուսումնական հաստատությունների ներկայացուցիչներով և արվեստագետներով՝ շուրջ 400 հոգի:

Հորեյանական սույն հանդիսությանը ներկա էր նաև ՀՍՍՀ Միմիստորների սովետին առընթեր հայ եկեղեցու գործերի խորհրդի նախագահ Սարգիս Գասպարյանը և տեղակալ Անդրանիկ Հասրաթյանը:

Հանդիսության բացումը կատարեց Երուսաղեմի հայոց պատրիարքարանի դիվանապետ և Ժառանգավորաց վարժարանի ու ընծայարանի վերատեսուչ և Գերագույն հոգևոր խորհրդի անդամ **տ. Ծահե արքեպիսկոպոս Աճեմյանը:**

Այնուհետև հոտնկայս, խմբական արտասանությամբ ասվեց «Հայր մեր»-ը, որին հաջորդեց ՀՍՍՀ պետական հիմնի մվագի կատարումը:

Վեհափառ Հայրապետի գահակալության քսանամյակի առթիվ կազմված Կենտրոնական հորեյանական հանձնաժողովի անունից առաջինը հանդես եկավ Երուսաղեմի հայոց պատրիարք **ամենապատիվ տ. Եղիշե արքեպիսկոպոսը** հետևյալ բովանդակայից և ջերմ ուղերձով.

## Տ. ԵՂԻՇԵ ՍՐԲԱԶԱՆ ՊԱՏՐԻԱՐԷԻ ԽՈՍՔԸ

Հանդիսավոր գիտակցությամբ որուն խորքը հիացում կ'կազմե, հայ ժողովուրդը ամենուրեք իր հարգանքի տուրքը կրերե վերստին Նորին Ա. Օծություն Տ. Տ. Վազգեն Վեհափառ կաթողիկոսին, Անոր քսանամյա գահակալության հորեյանին առիթով:

Մեծ մարդոց հոգիին բացատրությունը պետք է որոնել հոգիին մեջ այն ժողովուրդին, որուն ծոցածին զավակներն են անոնք: Անշուշտ բարեպաշտ

մոր մը և ազնվական հոր մը հոգիէն ստացած է այսօրվան հոբելյարը Իր հոգիին կայծը, որ այժմ խարույկի է վերածվեր Իր մեջ, մեր ցավերուն և կարիքներուն իբրև սպեղանի և փարոս առաջնորդության: Մեծ մարդերը անձնավորչալ արտահայտություններ են իրենց ցեղին ու ժամանակին, անոնց կյանքի պատմությունը պետք է որոնել ոչ թե հույլ մը թվականներու և



Ամենապատիվ տ. Եղիշե սրբազան պատրիարք Երուսղեմի հայոց

ծանոթություններու մեջ, որոնցմե կհշուսվի կենսագրություն մը, այլ լուսաբանության մեջ այն ճգտումներուն և շարժառիթներուն որոնք կհատկանշեն անոնց ժամանակն ու միջավայրը:

Անոնք որ տակավ կրցին ճանչնալ Նորին Սուրբ Օծությունը Իր իղձերու

անկեղծությանը մեջ և մեր ժողովուրդին խոր կարիքները, կզգան այժմ թե Լուսավորչի Աթոռին գահակալ ըլլալու Իր ընտրությունը նոր թվականի մը առավտը կբերեր հայ եկեղեցվո երկնքին ներքև: Այս մտածումը իր մեջ ոչինչ ունի պատրողական, վասնզի արդյունք է ոչ թե զգացումի՝ այլ սկզբունքի մը: Այդ սկզբունքը այն համոզումն է թե, հասնանքներու շինության գործը կկարոտի բարոյական ուժերու, որոնք երևան կուզան հոգեկան առաքինություններով հարուստ գործիչներու միջոցով:

Հայության լավագույն օրերը կզուգադիպին միշտ իր բարոյական մեծության թվականներուն: Այդ թվականներեն յուրաքանչյուրին վերև կսավառնի դեմքն ու աւունը տեսիլքով լեցուն մարդոց, որոնց մեջ կապրի Աստուծո հոգին, առաջնորդության ճշմարիտ ուժը: Այդ հոգիեն բաժին մը կա Նորին Ա. Օծություն Վազգեն կաթողիկոսին մեջ: Առանց այդ հոգիին, ամեն օր մարդուն մեջ ապրող կենդանի տեսիլքին, մենք պատրանքի զոհեր ենք միայն: Առանց այդ կենդանի շունչին մեր խոսքը բարբսւջանք է, իսկ մեր գործը անիմաստ շարժումներու տեսարան մը:

Նորին Սուրբ Օծությունը հոգիի և տեսիլքի մարդ է, մեր օրերու ամենեն պատկառելի և բացառիկ արժեք ներկայացնող դեմքը: Անհատներու կյանքին մեջ քիչ անգամ կարելի է հանդիպիլ որ պատվո և դիրքի հառաջդիմությունը զուգընթաց քալած ըլլա զուտ անձնական արժանիքին հետ, ինչպէս կհաստատուի Նորին Ա. Օծություն Վազգեն կաթողիկոսի պարագային: Այս է պատճառը անտարակույս որ Իր կյանքը տեսարան մը ըլլալէ ավելի փառք մըն է մանավանդ. զայն դիտելով մարդ հրճվանքեն ավելի կտրվի, այսինքն կանի փորձառությանը և հոգիով: Անոնք մարդեր են, որոնք կրնան կարդալ անկեզ մորենիին վրա իրենց ժողովուրդին ճակատագիրը: Որոնք կրնան լսել ձայնը որ զիրենք իրենց ժողովուրդի առաջնորդության կկանչէ:

Հասկացողության խոշոր տարբերություն մը կա անշուշտ արժեքի և արժանիքի ըմբռնումներուն միջև: Առաջինը վիճակ մըն է, իսկ երկրորդը հավելյալ առաքինություն մը, որուն կարելի է տիրանալ կամքով և գիտակցությամբ: Ծնիլ արքայորդի արժեք է անշուշտ, բայց այդքան միայն. անոր բուն արժանիքը մարդ կունենա այն ատեն երբ արժեքը կարենա վերածել արժանիքի: Ահա թե ինչպէս Նորին Սուրբ Օծությունը ավելի քան երեսուն տարիներ անձնագոհ հոժարությամբ նվիրելէ ետք Ինքզինքը կոչումներու ամենեն խորհրդավորին և ազնվականին, կրցած է բարձրանալ քահանայութենէ քահանայատնության, շնորհիվ իր անբասիր նկարագրին, իմաստության, հոգեկան կարողություններուն և արդյունավոր գործունեության:

Գործը քսան տարիներ առաջ ստանձնեց Նորին Ա. Օծությունը, դյուրին չէր: Բոլորս ալ գիտենք թե Աթոռները փառապանծ գահեր ըլլալէ ավելի խաչեր են: Դժվարությունները շատ հաճախ այնքան մեծ են, որ հրաշքներու պետք կա զանոնք դիմակալելու: Սակայն ազգին վստահությունը առաջին մեկ օրեն ակնքան մեծ եղավ իր սիրելի Հայրապետին նկատմամբ, որ սիրով պահանջեց որ գործի այդ հրաշքը: Մայր տաճարի նորոգությունը, Վեհարանի բարեզարդումը, ճեմարանին և տպարանին տրված նոր թափը և Մայր Աթոռի տնտեսական վերականգնումը առէջներ եղան հրաշքի այդ թեզանին:

Ավերներեն վերականգնող նորափետուր մայր հայրենիքի կողքին Նորին Ա. Օծությունը գիտցավ շինել, զարդարել և ծաղկեցնել Մայր Աթոռ ս. Էջմիածինը: Հայ ժողովուրդը անցնող հիսուն տարիներուն արքայական պատմուճան հագցուց ավերներու մեջ դարերէ ի վեր նստած սգավոր մայր



հայրենիքին, իսկ վազգեն կաթողիկոս այդ պատմունանը հազցուց և Էջմիածնին: Անոնք, այդ հավերժական զույգ մայրերը, թոթափած իրենց դարավոր փոշին, այժմ իրարու կնային բաղցր ժպիտով, խրաժ սրբազան դանակը վշտի և թշվառության կոկորդին:

Նման եռամեծար հայրապետներուն, Նորին Ս. Օծույթյան համար Հայոց հայրենիքն ու ժողովուրդը անշամանդաղ ճշմարտություններ են, որոնց պետք է միշտ հավատարիմ մնալ ի գին ամեն զոհողության: Իսկ հայ եկեղեցին աննահանջ դրոշ մըն է, Լուսավորչի կանթեղը որ կլուսավորե մեր անցյալի սխրագործությունները, ինչպես նաև սպագա վաղորդայնները: Այս մտասիրագործությունները, ինչպես նաև սպագա վաղորդայնները: Այս մտասիրով և հավատարմությամբ, իբրև արժանավոր պետը հայ եկեղեցին:

Տակավին, հովվապետի գավազանը առած քանի անգամներ, Նորին Ս. Օծույթյունը շրջած է աշխարհն աշխարհ, գաղութ գաղութ, օրհնելով, սիրով և հրահանգելով աշխարհացրիվ Իր հոտը և Էջմիածնի և վերածնող մայր հայրենիքի զգացումովն ու գաղափարովը: Այդ զույգ զգացումներու ոսկի գետն է որ կհոսեցնե Ան, տարիներն ի վեր, արտասահմանի մշտնեբուն նստած Իր պանդուխտ զավակներու հոգինն ներս:

Ի վերջո պետք է գիտնանք թե և Էջմիածինը ոչ միայն բարձր բերդն է հավատքին, այլ նաև ոսկի կամուրջը հայ սիրտքի և մայր հայրենիքի միջև: Սրբազան տապանակը որուն մեջ տակավին պահված կմնա հազար անգամ անհատակված բայց հավերժ կենդանի ժողովուրդի մը հոգևոր մխթարության և հավատքի մորհակը: Ան մեր դարավոր մութերը լուսավորող փարոսն է եղած, մեկ ուրիշ երեսը մեր հայրենիքին ու ժողովուրդին: Ամեն անգամ երբ աղետները հարվածեր են մեր մեկ երեսը մենք մյուսն ենք դարձուցեր, մշտնջենավորելու մեր ազգային գոյությունը: Առանց և Էջմիածնի, մեր ժողովուրդի հոգևոր երեսին, շատ բան պիտի պակսեր մեր կյանքն և մեր ժողովուրդի ապագա սխրագործություններն: Չկա ստեղծագործություն, մեջն ըլլալով նաև գեղեցիկ տիեզերքին, եթե անոր կպակսի հոգեկան տարրը որ կբոցավառե զայն իր հոգիին ռիթմովը:

Իժվար է անշուշտ արժանիքներու համեմատական կշիռը կազմել, սակայն մարդիկ մեծ են համաձայն իրենց ձգտումներուն: Անոնք որ կխիզախեն իրենց անձին համար, իրենց անձը կարծեն. անոնք որ կպայքարին ի խնդիր աշխարհի նյութական բարիքներուն, աշխարհը կգտնեն լոկ. իսկ անոնք որ կձգտին իրենցմե անդին, հավիտենական ու համայնական ճշմարտություններուն, մեծագույններն են մարդոց որդիներն, որոնք գիտեն մարդոց բերել կաթիլ մը լույս և ափ մը բարիք, ամոքելու անոնց կիզիչ պատուքը:

Վեհափառ Տեր, թույլ տվեք որ հաճուն հայ եկեղեցվո լրության, պաշտոնեության և ժողովուրդին, շնորհավորեմ Ձեր գահակալության քանամյակը, մաղթելով ի սրտե որ աստվածային օրհնությամբ տակավին երկար ապրիք, իբրև իմաստուն դիտապետ և ժիր մատուպակը մեր եկեղեցիին: Սպրիք երկար, իրականացնելու ոչ միայն Ձեր իղձերը, այլ նաև որպեսզի տեսնեք իրականացումը մեր ժողովուրդի դարավոր երազին:

Ողորմած Աստված մեր հայրերուն թող միշտ անասան պահե Լուսավորչի գահը, ինչպես նաև տվետական մեր հայրենի աշխարհը. թող իր վրայեն չանցնի բնավ սև թևը չարիքին, և իր կողերուն չծանրանա բռունցքը բռնակալին: Չպակսի թող իր հողերեն հայ բազուկը շինարար, իր գործարաններեն ձայնը աշխատանքի ոսկի մուրճին: Աղատ ըլլան միշտ հնձաննե-

որ բարիքին և բացվի ժպիտը երջանկության հոգիներուն մեջ, որպեսզի կարենանք ըսել մեր սիրտերու խորեն. Ովսաննա նորանորոգ հարուցելույն մեր եկեղեցիին և հայրենիքին:

Հորելյար Հայոց կաթողիկոսի քսանամյա գործունեությանը նվիրված Գերագույն հոգևոր խորհրդի զեկուցագիրն ընթերցեց տ. Կոմիտաս արքեպիսկոպոսը (Սույն զեկուցագիրը տես «Էջմիածին» ամսագրի սույն համարում, էջ 12):

Վեհափառ Հայրապետի զահակալության քսանամյակի առիթով Գերագույն հոգևոր խորհուրդը պատրաստել էր տվել ականակուռ և ոսկեձույլ Հայրապետական Արծիվ պատվանշանը՝ հանուն մեր սուրբ եկեղեցու և համայն հայ ժողովրդի, իբրև որդիական երախտագիտության և հավատարմության արտահայտություն: Պատվանշանը հետևյալ գեղեցիկ գրաբար ձոնուղերձով մատուցվեց Վեհափառ Հայրապետին.

**«ԱՍՏՈՒԱԾԱՐԵՍԱԼ ԵՒ ՍՐԲԱԶՆԱՍՈՒՐԲ ՀԱՅՐԱՊԵՏԻՆ ԱՄԵՆԱՅՆ  
ՀԱՅՈՑ ՏԵԱՌՆ ՏԵԱՌՆ ՎԱԶԳԵՆԻ ԱՌԱԶՆՈՑ**

Վեհափառ՝ Տէր,

Յայտ առնենք Սրբութեան Ձերոյ, եթէ Գերագույն Խորհուրդ աստուածակառոյց Աթոռոյս Սրբոյ Էջմիածնի, խորհուրդ ի մէջ արարեալ, անդանաց զեկեղեցաշէն, հայրենանուէր եւ յոգնաջան գործս շնորհազարդ Հովուապետիդ Ամենայն Հայոց:

Յաւորս քսանամեայ վեհաշուք զահակալութեան մեծի Քահանայապետիդ, Եկեղեցի Հայաստանեայց, որ խրթնացեալ էր ի բարեզարդութենէ բեմքին, յոյժ պայծառացաւ եւ բարձրագլուխ կամակարտութեամբ երևելի եղև յաշխարհիս եւ յազգիս մերում:

Վասն որոյ Գերագույն Խորհուրդ Մայր Աթոռոյս Սրբոյ Էջմիածնի, ի տրիտուր աստուածահաճոյ գործոց Եպիսկոպոսապետիդ Ամենայն Հայոց, այլև ի նշանատրումն քսանամեայ զահակալութեան Ծախրագոյն Պատրիարքիդ եւ Կաթողիկոսիդ, սահմանեաց շնորհել մեծագործ Գահակալիդ մեծի Աթոռոյս եւ Հովուապետիդ, զականակուռ եւ զոսկեհուռ **ՉԱՐԾՈՒԻ Հայրապետական**, թոռցեալ հայրենի թևօք, յանուն մերս Սրբոյ Եկեղեցոյ եւ համայն ժողովրդեան Հայոց:

Վեհից Վեհագոյն, ընկա՛լ քաղցրութեամբ զայս պարգևս սրբանուէր, որ վայել է Մեծի Հօրդ, քանզի Դո՛ւ ես Հովիւ քաջ եւ իմաստուն քրիստոսահիմն Եկեղեցոյ եւ Քև պարծին Եկեղեցի Հայաստանեայց եւ ամենայն ժողովրդոյն Հայոց:

«Թագաւոր երկնաւոր, զեկեղեցի քո անշարժ պահեա, եւ զգաւազան իշխանութեան մերոյ Հայրապետի, պայծառացուցեալ ծաղկեցո՛ յամայր ամա»:

**ԱՆԴԱՄՔ ԳԵՐԱԳՈՅՆ ՀՈԳԵՒՈՐ ԽՈՐՀՐԴՈՑ՝**

- |                            |                      |
|----------------------------|----------------------|
| ՊՐՈՑ. ԱՌԱՔԵԼ ԱՌԱՔԵԼԵԱՆ     | ՍԵՐՈՎԲԷ ԱՐՔԵՊԻՍԿՈՊՈՍ |
| ՊՐՈՑ. ԱՐԱՐՍՏ ՂԱՐԻԲԵԱՆ      | ԿՈՄԻՏԱՍ ԱՐՔԵՊԻՍԿՈՊՈՍ |
| ԴՈԿՏ. ՍԱՐԳԻՍ ՄԵԼԻՔՍԵԹԵԱՆ   | ԾԱՀԷ ԱՐՔԵՊԻՍԿՈՊՈՍ    |
| ԴՈՑԵՆՏ ՅՈՎՀԱՆՆԷՍ ԹՈՓՈԻԶԵԱՆ | ՅՈՒՍԻԿ ԵՊԻՍԿՈՊՈՍ     |

Մայր Աթոռ սուրբ Էջմիածին,  
27 սեպտեմբերի 1978 թ. »:

Գերագույն հոգևոր խորհրդի սույն ձոն-ուղերձը հանդիսավորությամբ ընդերցեց **տ. Շահն արքեպիսկոպոսը**, որից հետո, բոլոր ներկաների սրտագին ծափողջույնների տակ, **տ. Սերովբե արքեպիսկոպոսը Վեհափառ Հայրապետին** հանձնեց վերոհիշյալ պատվանշանը՝ զարդարելով Նրա կուրծքը:

Ապա Հայաստանի կառավարության և ՀՍՍՀ Մինիստրների սովետին առընթեր հայ եկեղեցու գործերի խորհրդի անունից ողջույնի և շնորհավորանքի խոսքով հանդես եկավ խորհրդի նախագահ տիար **Սարգիս Գալստյանը** (Սույն ողջույնի խոսքը տես «Էջմիածին» ամսագրի սույն համարում, էջ 9):

Տալը թույն ընդմիջումից հետո ողջույնի և շնորհավորանքի հետևյալ ջերմ խոսքերով հանդես եկավ Կ. Պոլսի հայոց **տ. Շնորհք պատրիարքը**՝ հանուն հայ եկեղեցու նվիրապետական Աթոռների և բոլոր թեմերի.

### Տ. ՇՆՈՐՀՔ ՊԱՏՐԻԱՐԻՒՆՈՒՆԻ ՆՈՍՏՐԸ

Վեհափառ Տեր,

Սրբազան ու հարգարժան հանդիսականներ,

Ցնծության մեջ է համայն հայությունը, որ գիտե, թե մենք, այսինքն իր պաշտոնական պատվիրակները և անպաշտոն ներկայացուցիչները, հավաքված ենք այսօր այստեղ, հայրենի երկինքին ներքև, ու հայրապետական այս երդիքի տակ ու կտոնախմբենք հանդիսավոր իրադրության մեջ, Ձեր Ս. Օծության գահակալության 20-ամյակը:

Այս ցնծատոնին մենք կրեղենք ամենեն առաջ սրտաբոլս սիրո տուրքը համայն հայ թեմերու և իրենց ժողովուրդին: Ու այդ սիրո սրտագին տուրքին կմիացնենք անոնց որդիական ամենաջերմ շնորհակալությունները և հավատարմական զգացումները, իբրև արգասիք նվեր, ու կմատուցանենք զանոնք Ձեր գահակալության քսանամյակի այս երջանիկ տոնախմբության առիթով:

Սրժանապես ու լրիվ ի հանդես բերվեցան արդեն Ձեր Ս. Օծության հայրապետական 20 տարիներու իրագործումները. ներկայացվեցաք իբրև շինարար ու ժողովրդանվեր կաթողիկոսը Ամենայն Հայոց. հետևաբար մենք այդ մասին չէ, որ պիտի անդրադառնանք. բայց պիտի չկրնանք չհիշել զեթ անցողակի և համառոտիվ երեք երևույթներ, որոնք մեր համոզումով կկազմեն կարևորագույն երեսները Ձեր Սրբության բազմաբեղուն կյանքին ու գործին, որոնք սերտորեն կապ ունին նաև մեր նվիրապետական Աթոռներու և թեմերու հետ:

Սուաջինը Ձեր հոգևոր հոտին բացվելու և բաշխվելու տրամադրությունն է: Դուք եղաք այն բացատիկ ու երջանիկ հայրապետը, որ չմնաց իր փղոսկրոյա աշտարակին մեջ, այլ դուրս եկավ անկե շիման մեջ մտնելու համար իր ժողովուրդին հետ գրեթե ամենուրեք: Դուք մտնեցաք ամենքին ու մտնեցուցիք Մայր Աթոռը ամենքին: Դուք իբրև բարի հովվապետ հաճախ ձգեցիք Ձեր հոտի 99 տոկոսը իր խաղաղ ու ապահով արոտավայրին մեջ, գացիք անձամբ փնտրելու կորուստի վտանգին մատնված հատվածը Ձեր հոտին: Գուռք զայն ու մանավանդ գտնվեցաք անկե: Սիրեցիք ամենքը և սիրվեցաք ամենքեն, ու Ձեր հայրական սիրո ճառագայթումով մխիթարեցիք և սրտապնդեցիք զանոնք: Եվ օտար ջուրերու մեջ իսպառ չկորսվելու գաղտնիքը պարզեցիք անոնց, հորդորելով, որ իրենց հայացքները շարունակ հառած պահեն Մայր Աթոռ ու Էջմիածնին և անով մարմնավորված սրբություն-

ներում: Երախտապարտ է արդարև արտասահմանի հայությունը Ձեր այս հայրական հոգածության ու հայրապետական հետաքրքրության համար:

Բաշխեցիք Ձեր հայրապետական օրհնությունները, կոնդակներով ու ս. Գրիգոր Լուսավորչի շքանշաններով, ոչ միայն Մայր Աթոռի բարերարներուն, նյութական նվիրատուներուն, այլ նաև մեր ժողովուրդի բարոյական նվիրատուներուն, այսինքն մտքի ու գեղարվեստի մշակներուն, որոնք ամբողջական նվիրումով, հաճախ առանց փողի և թմբուկի, կժառայեն մեր դպրության և հայ մշակույթի այլ մարզերուն մեջ:

Երկրորդ կետը, զոր կուզենք ընդգծել այս երջանիկ առիթով, Մայր Աթոռի ամբողջական վերականգնումը և նյութական վերաշինությունն է: Ավելորդ կնկատենք թվել փաստերը մի առ մի: Քարերը կաղաղակեն արդեն այդ մասին: Ու Մայր Աթոռի ընդհանրական նյութական այդ վերելքը մարմնավորված ու խորհրդանշված է վերանորոգյալ Վեհարանի այս հոյակերտ կառույցին մեջ, որ պատիվ կբերե ունե եկեղեցիին: Մենք հույս մեծ ունինք, թե Մայր Աթոռի նյութական այս վերանորոգչական գործին պիտի հաջորդե Հայց. եկեղեցիի վարչական մեքենականության վերանորոգությունը, իր մայր կանոնագիրով ու եկեղեցական կանոնագիրքով:

Երրորդ կետը, որուն կուզենք անդրադառնալ ու շեշտել անոր կարևորությունը, Նոր Կտակարանի արևելահայ բարբառի թարգմանությունը և հրատարակությունն է Մայր Աթոռի տպարանեն:

Մարդիկ ընդունին կամ ոչ՝ մեր հավատքը և համոզումը կմնա անխախտ, թե Նոր Կտակարանը աշխարհի Գերագույն Գիրքն է: Մարդկության վրա ամենեն բարերար ու դրական ազդեցությունը ներգործող Մատյանն է: Եթե հանուն Ավետարանի գործված են նաև երբեմն մեղքեր կամ եղած են չարաշահություններ, մեղավորը Ավետարանը չէ, այլ անկատար մարդը, որ հաղորդ չէ եղած Ավետարանի ոգիին և տառին: Նոր Կտակարանի մեջ հայտնված են ավելի բարձր ճշմարտություն չէ տրված մարդկության. «Աստված սեր է». կամ «Աստված Լույս է. Անոր մեջ խավարի ոչ մեկ հետք կա» պատգամված է անոր սրբազան էջերուն մեջ, իբրև բարձրագույն ճշմարտություն: Նոր Կտակարանի քարոզած են ավելի բարձր բարոյական չէ ավանդված մարդերուն. «Սիրե ընկերդ անձիդ պես». կամ «Ըրե ընկերոջդ այն, ինչ որ կուզես, որ ընկերդ ընե քեզի»: Ասոնք կկազմեն կորիզը և համադրությունը Ավետարանի ընկերային բարոյականին, որ եթե գործադրվի, ինքնին պիտի վերնան աշխարհեն պաղ կամ տաք բոլոր պատերազմները և բոլոր անարդարությունները. վերջ պիտի գտնեն բոլոր անհավասարությունները և ընկերային շահագործումները: Հետևաբար Ավետարան հրատարակել՝ կնշանակե ծառայել համամարդկային արդարության ու ճշմարտության դատին:

Բաց աստի, խաղաղությունը, որ մարդկային ազգի գերագույն բաղձանքը և բարիքն է, ուրիշ ոչ մեկ գրքի մեջ այնքան կարևորություն և շեշտ ստացած է, որքան Ավետարանի էջերուն մեջ: Բետևաբար զայն հրատարակել ու տարածելը՝ կնշանակե ծառայել նաև խաղաղության դատին:

Ձեր Վեհափառության օրով ու գլխավորությամբ հրատարակված Ավետարանը կմնա Ձեր Ս. Օծության կոթողական գործերեն մեկը: Մենք մեծ գոհունակությամբ իմացանք, որ արդեն իսկ պատրաստված է Ավետարանի արևմտահայ աշխարհաբարի թարգմանությունը և մոտ օրեն լույս կտեսնե արտասահմանի մեջ: Այս իրողությունը կներշնչե մեզի այն հույսը և վստա-

հույունը, թե՛ Նոր Կտակարանի ամբողջական հրատարակության պիտի հաջորդե նույնքան և ավելի կարևոր հրատարակությունը ամբողջ Աստվածաշունչին, իր գրաբար ու աշխարհաբար ձևերուն մեջ: Ասիկա պիտի լինի Ջեր Ա. Օծույթյան բազմադրյուն գործունեության պասակը և գագաթը:



Ամենապատիվ տ. Յնորհք սրբազան պատրիարք Կ. Պոլսի

Աստվածաշունչի հրատարակությունը, բացի իր կրոնաբարոյական բարձր նպատակեն, պիտի ունենա իր բովընտի բարիքները հայ դպրության ու մշակույթին ընդհանրապես և հայ լեզվաբանության մասնավորաբար:

Ծանոթ է, թե մեր գրաքար Աստվածաշունչը առաջին գործը և գլուխ-գործոցն է հայ գրավոր դպրության: Մեր դասական լեզվի գրեթե ամբողջ բառագանձը համադրված է անոր մեջ: Այնտեղ է մեր զույգ աշխարհիկ բարբառներու մայրը, մեր գրաքար լեզուն, իր ոսկեղենիկ փառքին ու վսեմ պարզության մեջ: Հետևաբար խոշոր ծառայություն մը պիտի լինի մեր մտավորականության և հայ դպրության՝ Աստվածաշունչի գիտական գրաքար հրատարակությունը և անոր ճշգրիտ թարգմանությունը:

Զեր Ս. Օծության նախաձեռնությամբ ի գլուխ հանված մեր պատմական բազմաթիվ տաճարներու նյութական նորոգչական գործերը մեզի կներշնչեն այն հույսը, թե ասոնց պիտի հաջորդեն վերանորոգչական աշխատանքները նաև մեր եկեղեցիի բարոյական հորինվածքին վրա, ծիսական, արարողական ու ժամապաշտական մարզերուն մեջ. որովհետև ասոնք ալ կկարոտին պարբերական վերանորոգության կամ բարեզարդման, ինչպես մեր նյութական տաճարները. որովհետև անոնք ալ եկեղեցի են ժամանակներու եղծիչ ազդեցության, ինչպես եղած են մեր քարեղեն կառույցները:

Թող ներվի ինձ, Վեհափառ Տեր, վերադառնալ պահ մը իմ իսկական հանգամանքին, իբրև պատրիարք հայոց Թուրքիո, ու այս անգամ թարգման հանդիսանալ նաև իմ ժողովուրդիս զգացումներուն մասնավորաբար:

Մենք այս ցնձատոնին, այսինքն Զեր անձին հանդեպ երախտիքի արտահայտության այս հանդեսին, նախ կբերենք պարզուկ սերը և անսահման նվիրումը Թուրքիո հայության այն հատվածին, որ ցրված է գավառներու հեռավոր մեկության մեջ ու կապրի մնացորդացի իր սրտմաշուք օրերը: Ասոնք գրեթե մոռցած ու մոռնալու վրա են այն ամենը, որոնք անհրաժեշտ են ժողովուրդներու կենսունակության և տեսականացման համար. բայց անոնք առնվազն կպահեն դեռ հիմնական երկու խարիսխները իրենց գոյության. նախ հայ ծնած ըլլալու գիտակցությունը. և ապա՝ մայր եկեղեցիի, և անով՝ Մայր Աթոռի զավակ մկրտված ըլլալու համոզումը: Կբերենք ապա որդիական խորունկ ու խանդավառ սերը Թուրքիո հայության մյուս մեծ զանգվածին, որ ամփոփված է Վոսիորի զույգ ափերուն վրա. ըսել կուզենք իսթանպուլահայության, որ երբեմն կեդրոնը և կատավարողը եղած էր ամբողջ արևմտահայության: Որքան ալ կապրի ան այսօր իր նվազման օրերը, գրեթե ամեն մարզի մեջ, մեկ բան սակայն չէ նվազած այնտեղ. այդ հարումն ու հավատարմությունն է մեր կրոնական սրբություններուն, ու այդ սրբությունները մարմնավորող Մայր Աթոռին և անոր Գահակալին՝ Ամենայն Հայոց Հայրապետին հանդեպ:

Պոլսո հայության տարեգրության ու ժամանակակից սերունդի հիշողության մեջ անջնջելի պիտի մնա Զեր Ս. Օծության պատմական այցելությունը պատմական այս քաղաքին: Ուստի անոնց որդիական կարոտի և խոր հարգանքի զգացումներուն կմիացնենք նաև անոնց անմար հույսը, թե օրին մեկը պիտի ստեղծվին ավելի բարեբաստիկ պայմաններ, երբ անգամ մը ևս պիտի ապրին անոնք երջանկությունը Ամենայն Հայոց Հայրապետը իրենց մեջ ունենալու:

Մենք ամենքս պիտի աղոթենք Վեհիդ թանկագին կյանքին արևշատության համար: Պիտի աղոթենք Զեր մշտական ու տոկուն քաջառողջության համար, որպեսզի Հայց. առաքելական եկեղեցին ու հայ ժողովուրդը երկար վայելեն Զեր շինարար ու բարերար հայրապետությունը: Պոլսո շրջանակներու մեջ հաճախակի գործածված ծանոթ բացատրությամբ մը՝ անպակաս

ըլլա Ձեր շուքը մեր գլուխեն: Ու աստվածային և երկնային շնորհը շարունակե առաջնորդ ու հովանի հանդիսանալ Ձեր Ս. Օծույթյան՝ իբրև հրեղեն պուր խավար գիշերներուն ու իբրև հովանավոր ու զովարար ամպ կիզիչ ցորեկներուն: Եվ շնորհեսցե մեզ Տեր՝ Ձեր Սրբությունը՝ ընդ երկայն ավուրս ուղիղ վարդապետությամբ ու քաջ հովվապետությամբ:

Այնուհետև ողջույնի և շնորհավորանքի խոսքերով հանդես եկան Տ. Պիմեն Պատրիարքը՝ հանուն ռուս պրավոսլավ եկեղեցու և սուրբ Սիմոնի, Տ. Գավիթ Ե Պատրիարք-կաթողիկոսը՝ հանուն վրաց օրթոդոքս եկեղեցու, Տ. Բասիլիոս Մար Թոմա Մատթեոս Ա կաթողիկոսը՝ հանուն հնդիկ մալաբար ուղղափառ եկեղեցու, կարդինալ Ժան Վիլլբրանդսը՝ հանուն հռոմեաբար կաթոլիկ եկեղեցու և Պողոս Զ Պապի, Լոնդոնի տ. Ջերալդ Ալեքկան կաթոլիկ եկեղեցու և Պողոս Զ Պապի, Լոնդոնի տ. Ջերալդ Ալեքկան կաթոլիկ եկեղեցու և հանուն անգլիկան եկեղեցու և Քենտրբեսանդր Էլիսոն եպիսկոպոսը՝ հանուն անգլիկան եկեղեցու և Քենտրբեսանդրի արքեպիսկոպոս դոկտ. Ֆրեդերիկ Կոզանի, տ. Գերմանոս Մամալիս միտրոպոլիտը՝ հանուն Երուսաղեմի հունաց պատրիարքության և Տ. Բենեդիկտոս Պատրիարքի, և տ. Մատրիլիո Մակկի վարդապետը՝ հանուն Երուսաղեմի կաթոլիկ ֆրանչիսկյան միաբանության:

### Տ. ՊԻՄԵՆ ՊԱՏՐԻԱՐԻՔԻ ՈՂՋՈՒՑՆԻ ԽՈՍՔԸ

Ձերդ Սրբություն, սիրեցյալ Եղբայր ի Քրիստոս, Ամենայն Հայոց Ծայրագույն Պատրիարք-կաթողիկոս Վազգեն Ա,

Բարձրապատիվ Հովվապետներ և Հովիվներ Հայաստանյայց առաքելական եկեղեցու,

Թանկագին եղբայրներ ու քույրեր,  
Հարգելի հյուրեր.

Մեր սիրտը նորից լցված է ուրախությամբ դեպի ամենայն հայոց հոգևվոր կենտրոն սուրբ Էջմիածին կատարած Մեր անմոռանալի այցելությամբ, հայ եկեղեցու իմաստուն և բարի Հովվապետ Նորին Սրբություն Վազգեն կաթողիկոսի և Նրա բոլոր գործակիցների հետ Մեր ունեցած եղբայրական ոգեշնչող հարաբերությամբ:

Այս անգամ Մեզ այս օրհնյալ երկիրը բերեց Մեր հոգու և սրտի մղումը, որպեսզի հաղորդենք Ձեզ, Ձերդ Սրբությանը, ռուս պրավոսլավ եկեղեցու բարձրաստիճան ներկայացուցիչների, հոգևոր դասի և հավատացյալ ժողովրդի սրտագին ողջույնները Ձեր հովվապետական 20-ամյա արդյունաշատ գործունեության առթիվ:

Բերելով Մեր եղբայրական ողջույնները, միաժամանակ հույս ենք հայտնում և աղոթում, որ մեր Տեր Հիսուս Քրիստոսը բազմապատկի Ձերդ Սրբության ուժերը՝ հետագայում ևս ծառայելու նրա ամենասուրբ անունին և Հայաստանյայց մեծ եկեղեցուն:

Գտնվելով ձեր հիմնավոր և օրհնյալ երկրում, Մենք մտքով գնում ենք դեպի այն հետավոր ժամանակները, երբ հայ ժողովրդի մեջ նոր էր ծագում քրիստոնեության հավատքի արշալույսը առաքելական քարոզչության միջոցով, որով սկիզբը դրվեց Քրիստոսի Ավետարանի տարածմանը Հայաստանում: Մենք վերհիշում ենք սուրբ Գրիգոր Լուսավորչի թափած ջանքերը, ինչպես նաև հայ ժողովրդի և նրա եկեղեցու անցած պատմական տաժանելի ուղին:

Հայաստանյայց առաքելական եկեղեցին միշտ էլ եղել է հայ ժողովրդի

կողքին, երբ նա ծանր փորձություններ է կրել: Հայ եկեղեցու հեղինակությունը իրոք որ շատ մեծ է ոչ միայն մեր հայրենիքում, այլև ամբողջ աշխարհում: Դրա վկայությունն է այս հանդիսավոր ժողովը, որի մասնակից-



Նորին Արքայություն Տ. Գիմեն Արքազան Պատրիարք Մոսկվայի և համայն Ռուսաստանի

ների թվում Մենք տեսնում ենք քրիստոնեական մյուս եկեղեցիների հարգարժան ներկայացուցիչներին, որոնք եկել են կիսելու հայ հավատացյալ ժողովրդի այս երջանիկ հանդիսության ուրախությունը:

Ռուս պրավոսլավ եկեղեցին հատուկ հարգանք ու սեր է տաժում դեպի հայ առաքելական հնադարյան եկեղեցին: Աշխարհագրականորեն մենք մոտիկ ենք իրար, մեր ժողովուրդների ճակատագրերը սերտորեն շաղկապ-



ված են միմյանց պատմականորեն, մենք միակամ ենք ավետարանական ուսմունքի հաստատման մեջ, իրար հետ ունեցած մեր բարեկամական հարաբերության, դեպի մեր մերձավորները տաժած ծառայական սիրո, երկրի վրա խաղաղության գոյծի ամրապնդման և մեր սովետական մեծ պետության բարիքների բազմապատկման մեջ:

Մենք վստահություն ենք հայտնում, որ Մեր այս այցելությունը ավելի ևս կամրապնդի եղբայրական սրտագին սիրո կապերը մեր սուրբ եկեղեցիների միջև:

Ձերդ Սրբություն, թույլ տվեք Մեզ ռուս պրավոսլավ եկեղեցու անունից մեկ անգամ ևս սրտագին ողջունել Ձեզ այս նշանակալից օրվա առթիվ, ջերմորեն շնորհավորել Ձեզ Ձեր սրբազան հոբելյանի կապակցությամբ, միաժամանակ ողջունել Հայաստանյայց առաքելական եկեղեցու եպիսկոպոսաց և ամբողջ հոգևոր դասին, ինչպես նաև հավատացյալ ժողովրդին, որ ի Հայաստան և ի պիյոս աշխարհի:

Մենք հայտնում ենք Ձերդ Սրբությանը Մեր սրտագին շնորհակալությունը Ձեր սիրալիր ու առատաձեռն հյուրասիրության համար և ամբողջ հոգով մաղթում Ձեր գլխավորած եկեղեցուն հետագա ծաղկում, իսկ անձամբ Ձեզ՝ քաջաողջություն, աստվածատուր ուրախություն և հաջողություն Ձեր բոլոր հետագա ձեռնարկումների մեջ:

Թող մեր Տեր Հիսուս Քրիստոսը երկար տարիներ պահպանի Ձերդ Սրբությանը բարեհաջողությամբ:

**ՎՐԱՑ ՕՐԹՈՂՈՔԱՆ ԵԿԵՂԵՑՈՒ ՊԱՏՐԻԱՐԿ-ԿԱԹՈՂԻԿՈՍ ՆՈՐԻՆ ՍՐԲՈՒԹՅՈՒՆ ԴԱՎԻԹ Ե-Ի ԽՈՍԻԸ**

Այս է որդին, որ ստեղծեց Աստված:  
 Ժառանգորդ Հիսուսի, համագոր հրեշտակների:  
 Ամենայն Հայոց Հայրապետ Վազգեն Առաջին:

Այս օրը հալ եկեղեցու համար բախտավոր մի օր է, որովհետև Դուք կարողացաք քսան տարիների Ձեր ստեղծագործ աշխատանքներով պատիվ բերել նրան:

Այսօր, երեկ և նախանցյալ օրն իմ սիրտը լի էր ուրախությամբ: Համայն Վրաստանը ողջունում է Ձեր գործունեության 20-ամյակը:

Վրաց եկեղեցին քրիստոնեական եկեղեցու հնագույն Աթոռներից մեկն է: Ո՛չ սոմանցիները և ո՛չ պարսիկները չկարողացան մեր աշխարհից ջնջել քրիստոնեությունը:

Ձերդ Սրբություն, մեր երկու եկեղեցիների և ժողովուրդների բարեկամությունը շատ հին է և սերտ: Ոչ մի ուժ աշխարհում չի կարող խախտել մեր դարավոր եղբայրության այդ ամուր կապը: Դուք ամեն ինչ արել եք և շարունակում եք անել, որպեսզի աշխարհի բոլոր ժողովուրդներն ապրեն խաղաղության մեջ, ապահով ու երջանիկ:

Կրկին անգամ հայտնում եմ իմ խորագգաց շնորհակալությունները Ձեր եղբայրական հրավերի և սիրալիր ընդունելության համար: Կրկին խաղաղություն ամենեցուն:



Նորին Սրբություն Տ. Դավիթ Ե Պատրիարք-կաթողիկոս վրաց օրթոդոքս եկեղեցու

ՀՆԴԻԿ ՄԱԼԱԲԱՐ ԵԿԵՂԵՑՈՒ ԿԱԹՈՂԻԿՈՍ ՆՈՐԻՆ ՍՐԲՈՒԹՅՈՒՆ  
ԲԱՍԻԼԻՈՍ ՄԱՐ ԹՈՍՄԱ ՄԱՏԹԵՆՍ ԱՌԱՋԻՆԻ ԽՈՍԲԸ

Ձերդ Սրբություն Վազգեն Ա կաթողիկոս,

Ձերդ Սրբություն Պիմեն Պատրիարք,

Ձերդ Սրբություն Դավիթ Ե կաթողիկոս,

Ձերդ Ամենապատվություն կարդինալ Վիլքրանդս,

Գերաշնորհ և պատվարժան եպիսկոպոսներ ու հյուրեր,

Երկար ժամանակ Մեր փայփայած ցանկությունն էր՝ այցելություն տալ

Հայաստանի մեր հարգարժան քույր եկեղեցուն և տեսնել այն ակնհայտորեն հաջող առաջնորդության պտուղները, որ Նորին Սրբություն Վազգեն կաթողիկոսը տվել է Հայց. եկեղեցուն անցնող քսան տարիների ընթացքում:



Նորին Սրբություն Տ. Բասիլիոս Մար Թոմա Մատթեոս Ա կաթողիկոս հնդիկ մազաբար եկեղեցու

Այժմ մեզ համար մասնավոր պատիվ է շնորհավորել Ձերդ Սրբությանը՝ ս. Էջմիածնի հիմնավորց գահին Ձեր բարձրամալու 20-րդ տարեդարձի կապակցությամբ:

Այս առթիվ բերում ենք Ձեզ Մեր անձնական եղբայրական ողջույնները և բարի մաղթանքները, ինչպես նաև բարեմաղթությունները մեր 12 թեմա-

կալ առաջնորդ եպիսկոպոսների, մեր ավելի քան հազար ծխական համայնքների և մեր մեկուկես միլիոն հավատացյալների:

Իբրև հետևանք այն իրողության, որ ս. Թովմաս առաքյալը քաջաբար հասավ այն ժամանակվա ծանոթ աշխարհի ամենահեռավոր անկյունները, մենք այսօր Հնդկաստանում պատիվն ունենք խոնարհաբար կրելու Քրիստոսի ջահր՝ լույսն աշխարհի: Սակայն ճիշտ այն պատճառով, որ մենք այնքան հեռու էինք մեր քույր եկեղեցիներից, ս. Թովմասի գահը երկար ժամանակ մեկուսացած մնաց մյուս քրիստոնյա եկեղեցիներից: Այսօր այս տեխնիկական դարը և էկոմենիկ շարժումը մեզ նորից իրար մոտ են բերել: Ձերդ Սրբության այցելությունը մեր եկեղեցուն, ավելի քան տասը տարիներ առաջ, դեռևս հիշվում է որպես Հնդկաստանում մեր եկեղեցու վերջին շրջանի պատմության մեծ իրադարձություններից մեկը: Հաճելի է Աստուծո, որ Մենք այժմ փոխադարձում ենք այդ այցելությունը՝ այսպիսով հայրապետական մակարդակի վրա ամրապնդելով այն սերտ կապերը, որոնք մեր երկու եկեղեցիներն իրար են միացրել Քրիստոսի մարմնի մեջ՝ սկսած մեր եկեղեցիների սկզբնավորության հնագույն ժամանակներից:

Այս երջանիկ առիթով թույլ տվեք մի անգամ ևս շնորհավորել Ձերդ Սրբությանը Ձեր քսանամյա հայրապետության հանգրվանին և աղոթել Աստուծո, որպեսզի Ձերդ Սրբությանը շնորհի շատ տասնամյակներ՝ հովվելու համար այս հիմնավորք քույր եկեղեցին, պարզևի Ձեզ քաջատողջություն, խոր իմաստություն, նվիրյալ գործակիցներ և այն ամենը, ինչ անհրաժեշտ է արդյունավետ ծառայության՝ հովվելու համար այս եկեղեցին որպես Ծայրագույն Պատրիարք և կաթողիկոս Ամենայն Հայոց:

#### ԿԱՐԴԻՆԱԼ ՎԻԼԼԱՐԱՆԴՍԻ ԽՈՍԲԸ

**Ձերդ Սրբություն,**

Այցելել էջմիածին՝ հայ եկեղեցու սուրբ քաղաքը, միշտ էլ խոր ուրախության մի առիթ է առաջին հերթին այն հայերի համար, որոնք ուխտի են գալիս այստեղ աշխարհի այն բոլոր երկրներից, ուր ձեր ժողովրդի շարժումն և գործունյա ոգին կամ սիյուսքի պայմանները քշել-տարել են նրանց, ապա նաև մյուս ազգերի քրիստոնյաների համար, ինչպիսի եկեղեցական իշխանության էլ ենթակա լինեն նրանք:

Այս անգամ Պողոս Զ Պապը, որ մեծ սեր է տածում ձեր եկեղեցու նկատմամբ, մանավանդ Ձերդ Սրբության այցելությունից հետո սուրբ քաղաք՝ Հռոմ, առավել մեծ սիրով ընդունեց Ձեր հրավերը՝ պաշտոնական մի պատվիրակություն ուղարկելու էջմիածին՝ երկու կարևոր շարժառիթներով. առաջինը՝ սրբալույս մեռոնի օրհնության հանդիսավոր արարողություններն էին, և երկրորդը՝ Ձեր գահակալության 20-րդ տարեդարձի տոնակատարությունը:

Սրբալույս մեռոնի օրհնությունը հոգևոր մեծ նշանակություն ունի Եկեղեցու համար: Այս արարողության ամենանշանակալից կողմը գուցե նրա ներկայացրած կարևորությունն է Եկեղեցու միությունն արտահայտելու տեսակետից: Եկեղեցու պետի կողմից սրբագործված մեռոնը եկեղեցական կենտրոնից տարվում ու բաշխվում է բոլոր թեմերին, բոլոր եկեղեցիների: Այսպիսով հաստատվում և սրտահայտվում է հոգևոր կենտրոնի կապը եպիսկոպոսի հետ:

Սրբալույս մեռոնը սահմանված է խորհրդակատարությունների համար:

Մեռոնը Սուրբ Հոգով օծվելու նշանն է: Հունարեն «Քրիսմա» բառը հիշեցնում է Քրիստոսին, որը Օծյալն է Աստուծո: Քրիստոս ծառայի կերպարանը ընդունեց՝ պահելով հանդերձ Իր մեջ աստվածության լրիվությունը, և այդպիսով օծեց Իր մարդկային բնությունը՝ լցնելով այն Սուրբ Հոգով:



Կարոինալ Ժամ Վիլբրանդս

Նա նույն Հոգին փչեց Իր առաքալների վրա՝ ասելով. «Առէ՛ք Սուրբ Հոգին»: Նա սվեց Հոգին ամբողջ Եկեղեցուն Հոգեգալստյան օրը: Առաքյալներն այնուհետև շարունակեցին տալ այդ Հոգին բոլոր նրանց, ովքեր մկրտված էին: Այսպիսով, քրիստոնյան դառնում է Աստուծո օծյալը և մասնավոր կերպով միանում Քրիստոսին, որը Գերագույն Օծյալն է:

Արքայույս մեռողը, հետևաբար, դրոշմն է ոչ թե մի ինչ-որ օծման, այլ Սուրբ Հոգով օծման և ի Բրիստոս միության: Միանալով ի Տեք, քրիստոնյաները միացած են լինում միմյանց հոգևոր մի կապով, որը հանդիսանում է եկեղեցու խորհրդակատարական իրականությունը:

Արքայույս մեռողը, հետևաբար, դրոշմն է ի Բրիստոս միության և եկեղեցական միության:

Ահա թե ինչու արքայույս մեռողի օրհնությունը մի տոն է ողջ եկեղեցու համար: Այս պատճառով է, որ Պողոս Զ Արքազան Քահանայապետը սիրահոժար ընդունեց Ձերդ Արքայության հրավերը՝ ուղարկելու մի պատվիրակություն, որպեսզի ներկա լինի այս տոնակատարությանը և մասնակցի ձեր եկեղեցու, նրա նվիրապետության ու նրա ժողովրդի ուրախությանը և մասնավորապես Ձեր անձնական ուրախությանը, որպես հայ եկեղեցու Հովվապետի:

Այսպիսով, ես արդեն գալիս ու կանգ եմ առնում այստեղ մեր ներկայության երկրորդ շարժառիթի վրա. դա Ձեր գահակալության 20-րդ տարեդարձն է, դա Ձեր տոնն է, իբրև հայ առաքելական եկեղեցու առաջին Հովվի:

Կցանկանալի այս առթիվ վկայակոչել մի քանի իրադարձություններ, որոնք պատմական կարևոր նշանակություն են ներկայացնում մեր երկու եկեղեցիների հարաբերությունների մեջ և որոնք տեղի ունեցան քսան տարիների այս երկար ժամանակաշրջանի ընթացքում:

Ամենից առաջ դա այն փաստն է, որ Ձերդ Արքայությունն ընդունեց Հռոմի Արքազան Քահանայապետի հրավերը՝ ուղարկելու դիտորդ-պատգամավորներ Վատիկանի Բ ժողովին: Այդ ժողովի տարբեր նիստերի ընթացքում հայ առաքելական եկեղեցին ներկայացվեց դիտորդ-պատգամավորներով, որոնք հնարավորություն ունեցան ձեր եկեղեցուն հաղորդելու հավաստի տեղեկություններ մեր եկեղեցու կյանքի, նրա աստվածաբանական և հովվական վերածննդի մասին այսօրվա աշխարհում: Փոխադարձաբար մենք ևս հարստացանք այն զրույցներով և զաղափարների փոխանակությամբ, որ ունեցանք ձեր դիտորդների հետ, որոնք շատ բան հաղորդեցին մեզ հայ առաքելական եկեղեցու պատմության, ավանդությունների և արդի վիճակի վերաբերյալ:

Մեր երկու եկեղեցիների միջև ստեղծված այս նոր հարաբերությունների ամենահանդիսավոր արտահայտությունն ու հաստատումը հանդիսացավ այն այցելությունը, որ Ձերդ Արքայությունը, գալով սուրբ Էջմիածնից, տվեց Հռոմի սուրբ քաղաքին: Ծրջապատված ձեր նվիրապետության մեծարգո անդամներով, ինչպես նաև Սովետական Հայաստանից և սփյուռքից եկած բազմաթիվ հավատացյալներով, Ձերդ Արքայությունը փոխանակեց խաղաղության համբույրը՝ Նորին Արքայություն Պողոս Զ Պապի հետ՝ միասնաբար աղոթելով սուրբ Պետրոս առաքյալի գերեզմանի վրա: Արքազան Պապի հետ միասին Դուք հրավիրեցիք «բոլոր քրիստոնյաներին և հատկապես կաթոլիկ եկեղեցու և Հայաստանյայց առաքելական եկեղեցու զավակներին՝ առավել հավատարմությամբ պատասխանելու Սուրբ Հոգու կոչին, որը մղում է նրանց դեպի առավել խոր միություն, մեր բոլորի Փրկչի կամքի համաձայն, և որն առավել բեղմնավոր կդարձնի քրիստոնյաների ծառայությունը աշխարհին» (Համատեղ Հայտարարություն, Վատիկան, 1970 թ. մայիս 12):

Ես ուրախ եմ այստեղ, այս պահին ներկայացնելու Նորին Արքայություն Պողոս Զ Պապին և փոխանցելու Ձեզ Արքազան Քահանայապետի անձնա-

կան ցանկությունները. «Գիտակից այն նշանակությունն ու կարևորությանը, որ ունեն այս կրկնակ տոնակատարությունները Ձեզ համար և ձեր եկեղեցու համար, Մենք բարձրացնում ենք Մեր աղոթքն առ Աստված, որպեսզի այս իրադարձությունները լինեն ուրախության և հոգևոր վերազարթոնքի մի աղբյուր ձեր բոլոր հավատացյալների համար և մի առիթ՝ քրիստոնյաների միջև եղբայրական սիրո խորացման ու բարի կամքի տեղ բոլոր մարդկանց միջև միաբանության: Արտահայտում ենք Ձեզ Մեր աղոթքի մեջ կատարած Մեր ջերմ մաղթանքը. թող այս հանդիպումը կարևոր մի հանգրվան հանդիսանա եկեղեցական կատարյալ միության ճանապարհի վրա, հավատի և սիրո մեջ»:

Ձերդ Սրբություն, այժմ թույլ տվեք ինձ Ուտրեխտի արքեպիսկոպոսի և Հոլանդիայի եպիսկոպոսաց ժողովի նախագահի իմ հանգամանքով, ավելացնել մի քանի անձնական խոսքեր: Մասնատեխտի գլխավոր եկեղեցում յոթ տարին մեկ կատարվում են հանդիսություններ՝ ի պատիվ և ի հիշատակ չորրորդ դարում ապրած մի սուրբ եպիսկոպոսի, որը մասնակցել է Նիկիո տիեզերական ժողովին և Սարդիկեի ժողովին: Նա եկել է իմ երկիրը բարոզելու համար Ավետարանը: Նրա հիշատակը միշտ թարմ է մնում հոլանդացի կաթոլիկ հավատացյալների մտքում, հատկապես Հոլանդիայի հարավում գտնվող Լիմբորգ նահանգում: Նա կոչվել է Մերվալսիուս և մեզ մոտ է եկել Հայաստանից: Այս տարի ես ուրախությունն ունեցա նախագահելու մեր Տեր Հիսուս Քրիստոսի այդ ծառայի պատվին կազմակերպված հանդիսություններին և աղոթեցի նրա հայրենի երկրի հավատացյալ ժողովրդի համար, ողջ հայ ազգի և ի մասնավորի Ձերդ Սրբության համար:

#### ԼՈՆԴՈՆԻ ԵՊԻՍԿՈՊՈՍ ՋԵՐԱԼԴ ԱԼԵԿՍԱՆԴՐ ԷԼԻՍՈՆԻ ԽՈՍՔԸ

Ձերդ Սրբություն,

Գերհարգելի եկեղեցական պետեր և ներկայացուցիչներ,

Ձերդ Վսեմություն այր. Գասպարյան և հարգելի ներկաներ.

Մենք մեծ շնորհ ենք համարում, որ մեր եկեղեցին ևս հրավիրեցիք ներկա գտնվելու և մասնակցելու այս երկու մեծ հանդիսություններին: Այս առթիվ մեր շնորհակալությունն ենք հայտնում Ձեր սրտաբաց հյուրասիրության համար:

Մեր ներկայությունն այստեղ արտահայտում է սրտագին, երկարամյա ու ջերմ հարաբերությունը մեր երկու եկեղեցիների միջև: Մենք Լոնդոնի մեջ գնահատում ենք հատկապես մեր երկու եկեղեցիների միջև գոյություն ունեցող այս սերտ կապը: Ուրախ ենք հայրապետական պատվիրակ տ. Ներսես եպիսկոպոսի ներկայությամբ Լոնդոնի մեջ: Անգլիկան եկեղեցու համար մեծ հաճույք և ուրախություն եղավ, անցյալ տարի, ընդունել Ձերդ Սրբությանը Լոնդոնում, երբ եկել էիք օծելու ս. Պետրոս եկեղեցին:


Չափազանց ուրախալի է, որ Անգլիայում գոյություն ունի հայկական եկեղեցական մի համայնք, որն ապրում, գործում և աղոթում է քրիստոնեական, եղբայրական ոգով:

Այս առիթը սակայն, Ձերդ Սրբություն, մեզ համար ունի մասնավոր նշանակություն, երբ եկել ենք մասնակցելու Ձեր գահակալության քսանամյակին նվիրված հանդիսությանը:

Ձեզ բերում եմ հատուկ համակրությամբ և սիրով լեցուն շնորհավորանքները Քենտրերիի արքեպիսկոպոսի և կարծում եմ դրանով արտա-

հայտած լինել անգլիկան ամբողջ համայնքի զգացումները՝ շնորհավորելով Ձեզ Ձեր գահակալության առիթով:

Անշուշտ ո՛չ մեկ նվեր կկարողանար արդարորեն արտահայտել մեր հարգանքը Ձերդ Սրբության նկատմամբ: Այնուամենայնիվ մեզ համար հանելի է այս ուրախ առիթով Ձեզ մոտ թողնել մի հիշատակ՝ արտահայտությունը մեր համակրության և հարգանքի:



Նորին գերազմորհություն Ջերայդ Ալեքսանդր Էլիսան եպիսկոպոս Լոնդոնի

Վերջին ամիսներին մտահոգ էի և մտածում էի, թե ինչպես կարող եմ հարմար և արժանավայել ձևով արտահայտել մեր համակրությունը և զգացումները Ձեր նկատմամբ: Եվ, որպես Լոնդոնի եպիսկոպոս, հիշեցի երկու



շենքերի մասին, որոնք փառքն են կազմում Լոնդոնի: Դրանցից մեկը Վեստմինստեր արքայաբանն է, որի հիմնադրության 900-ամյակը հիշատակվեց 1965 թվականին: Այդ առիթով հատկապես պատրաստվեց հիշատակի մի ափսե, որ քիչ հետո ներկայացնելու են Ձեզ:

Բայց ինչպես Ձերո՞րդ Սրբությունը գիտե, Վեստմինստերի վանքը հատուկ տեղ ունի անգլիկան եկեղեցու կյանքում: Այդ վանքը չի մտնում ո՛չ Քնոզքերիի արքեպիսկոպոսի և ո՛չ էլ Լոնդոնի եպիսկոպոսի իշխանության ներքև, հետևաբար և Վեստմինստերից բերված մի հիշատակ բավարար պիտի չլիներ արտահայտելու անձնապես մեր զգացումները:

Լոնդոնի ա. Պողոս տաճարը, լինելով Մայր տաճարը իմ առաջնորդության ասիմանների մեջ մտնող, միաժամանակ մեր եկեղեցու կյանքում ներկայացնում է մի հին ավանդություն: Թեև այդ տաճարը հիմնված է ավանդական շատ հին մի տեղի վրա, սակայն կանգուն տաճարի շենքը նոր է բաղդատմամբ էջմիածնի հնադարյան ձեր սուրբ տաճարի, որովհետև հին շենքը այրվեց Լոնդոնի մեծ հրդեհի ժամանակ՝ 1666-ին, բայց անմիջապես վերաշինվեց Մեծն Քրիստափոր Ռոմի միջոցով: Ուստի, ինչպե՞ս կարող էի լավագույնս արտահայտել իմ զգացումները Ձերո՞րդ Սրբության նկատմամբ, եթե ոչ՝ բերելով մի մասունք ա. Պողոս տաճարից, որ քիչ հետո պիտի հանձնեն Ձեզ: Այն քարի մի բեկոր է՝ պոկված տաճարի հյուսիս-արևմտյան աշտարակից, և ապա մետաղյա մի վարդ, որ գտնվեց ա. Պողոս տաճարի գոթեթի մեջ, երբ այն վերանորոգվում էր 1708 թվականին:

Այս առիթով միաժամանակ կցանկանայի հայր Մայր Մորի կողմից հանձնել Ձերո՞րդ Սրբությանը ա. Պողոս Մայր տաճարի նկարը, ինչպես նաև պրն. Գիրքերտի կողմից, որը Անգլիայում ներկայացուցիչն է Քրիստոնեության ծանոթացման և տարածման գրասենյակի, գեղեցկորեն կազմված և զարդարված Աստվածաշնչից և աղոթագրքից մի օրինակ՝ այն խոստումով, որ հետագայում առավել ևս օգտակար գրքեր պիտի կարողանանք ուղարկել ձեր ճեմարանի սաների համար:

Ներկայացնելով Ձեզ այս փոքր հուշանվերները, ողջունում և շնորհավորում ենք Ձերո՞րդ Սրբությանը որպես մի մեծ եկեղեցականի, որպես հանրաճանաչ մի անձնավորության, բայց այս բոլորից վեր, մանավանդ, որպես Աստուծո մի համեստ և սուրբ ծառայի և իր ժողովրդին նվիրված Հովվապետի:

**ԲԵՂՐԱՅԻ ՄԻՏՐՈՊՈԼԻՏ ԳԵՐՄԱՆՈՍ ԱՐՔԵՊԻՍԿՈՊՈՍ  
ՄԱՄԱԼԻՍԻ ԽՈՍՔԸ**

**Ձերո՞րդ Սրբություն,**

Եկել են այստեղ իմ սիրտն ուրախությամբ լեցուն և մասնավոր հպարտությամբ ներկայացնելու իմ Տիրոջը և Պատրիարքին՝ Երուսաղեմի հունաց Նորին Ամենապատվություն Բենեդիկտոս Առաջինին, Ձերո՞րդ Սրբության գահակալության 20-րդ տարեդարձի այս հանդիսավոր առիթով:

Նախ և առաջ բերում են իմ Հայրապետի եղբայրական ողջույնները, սրտագին շնորհավորությունները և լավագույն մաղթանքներն այս երջանիկ առիթով:

Բերում են միաժամանակ ջերմագին ողջույնները Սիոնի, որ սուրբ Մայրն է բոլոր եկեղեցիների, գերհարգելի Հայաստանյայց եկեղեցուն, որ Ձերո՞րդ Սրբությունը գլխավորում է Աստուծո շնորհով:

Իմ ջերմագին աղոթքներով միանում եմ բոլոր հավատացյալներին և եղբայրներին ի Քրիստոս, որոնք ներկա են այստեղ, որպեսզի Ձերո՞ Սրբությունն օրհնվի և գահակալի երկար, քաջատողջ և բարգավաճ կյանքով՝ ի հոգևոր մխիթարություն ձեր ժողովրդի և ողջ Հայաստանյայց եկեղեցու:



Տ. Գերմանոս Մամալիս մխարրպոլիտ

Եվ Մովսեսի նման, որ Սինա լեռան կատարը բարձրացավ և բարձրացրեց իր ձեռքերը, որպեսզի ապրի Իսրայելը (Ելից ԺԷ 11), Ձերո՞ Սրբությունը ևս թող լինի միշտ իր հայրապետական գահի վրա և բարձրացնի իր ձեռքերը, որպեսզի ձեր ազգն ու եկեղեցին հաղթանակեն և ապրեն շատ ու շատ օրհնված տարիներ խաղաղության, շինության և անաստանության մեջ: Ամեն:

ԵՐՈՒՍԱՂԵՄԻ ՖՐԱՆԶԻՍԿԱՆ ՄԻԱԲԱՆՈՒԹՅԱՆ ՄԵԾ ԿՈՒՍՏՈՂ ԸՆՅՐ  
ՄԱՌԻՐԻԼԻՈ ՍԱԿԿԻԻ ԽՈՍԲԸ

Ձերդ Սրբություն,

Մենք, իբրև Ֆրանչիսկյան միաբանության անդամներ, որ ուխտ ենք արել ապրելու խոնարհության և աղքատության մեջ, Ձեր այս տոնին բերել ենք մեր սիրտն ու աղոթքը:

Մենք այս շնորհակալ ենք Երուսաղեմի հայոց ամենապատիվ տ. Եղիշե պատրիարքի միջոցով մեզ եղած այս սիրալիք հրավերի համար:

Հայ հավատքի կենտրոն սուրբ Էջմիածնում տեղի ունեցած սրբալույս մեռոնի օրհնության և Ձերդ Սրբության գահակալության քառամյակի առթիվ կատարված հանդիսությունները, ինչպես նաև մեր ուխտագնացությունները դեպի հայկական պատմական վանքերն ու եկեղեցիները մեզ համար եղան կրոնական ապրումների և հոգևոր նոր փորձատության թանկագին առիթներ:

Մենք այստեղ խորապես տպավորվեցին մանավանդ տեղի ունեցած եկեղեցական վեհաշուք արարողություններից և հայ ժողովրդի ցուցաբերած քրիստոնեական հավատքից ու նրա բարեպաշտիկ ապրումներից:

Մենք Երուսաղեմում շատ սերտ հարաբերության մեջ ենք Հայաստանյայց առաքելական եկեղեցու հետ, որովհետև Երուսաղեմի հայոց պատրիարքության, ինչպես նաև հույն պատրիարքարանի հետ բաժանում ենք սուրբ Տեղյաց պատասխանատվությունը և մանավանդ Քրիստոսի ս. Հարության տաճարի պաշտպանությունն ու ծառայությունը:

Մենք երջանիկ ենք մանավանդ քրիստոնեական եկեղեցու մեջ գոյություն ունեցող այն հազվագյուտ իրողության համար, որ ս. Հարության նույն տաճարից ներս. մենք՝ երեք քույր եկեղեցիներս, միասին ենք աղոթում, միասին ենք երգում և միասին ենք փառք տալիս Աստծուն:

Հայ եկեղեցու հնադարյան այս սրբավայրում մենք աղոթեցինք ձեր եկեղեցու նվիրապետության, ձեր հավատացյալ ժողովրդի, բայց մանավանդ դարերից եկող ձեր ազգի համար:

Թողնելուց առաջ աստվածաշնչական այս երկիրը՝ Ձեզնից մի շնորհ ունեն խնդրելու. որ բարեհաճեք տալ ինձ և իմ միաբանակից եղբայրներին Ձեր օրհնությունը, որպեսզի ս. Գրիգոր Լուսավորչի ներկայությամբ և մեր միաբանության հիմնադիր ս. Ֆրանուս Դ՝Ասիզի առաջնորդությամբ կարողանանք պահել քրիստոնեական հավատքը մեր եկեղեցիներից ներս ի փառս Աստուծո և ի հարգանս սուրբ Աստվածամոր. ամեն:

Երևանի ս. Մեսրոպ Մաշտոցի անվան ձեռագրաց Մատենադարանի տեսչության, գիտական խորհրդի և ողջ անձնակազմի անունից շնորհավորանքի հետևյալ ջերմ խոսքն ընթերցեց Մատենադարանի տնօրեն Լևոն Խաչիկյանը.

ԵՐԵՎԱՆԻ Ա. ՄԵՍՐՈՊ ՄԱՇՏՈՑԻ ԱՆՎԱՆ ՁԵՌԱԳՐԱՑ  
ՄԱՏԵՆԱՊԱՐԱՆԻ ՏՆՕՐԵՆ ԼԵՎՈՆ ԽԱԶԻԿՅԱՆԻ ՈՂՋՈՒՑՆԻ ՈՒՂԵՐԶԸ

**Ձերդ Ա. Օծություն S. S. Վազգեն Ա.  
կաթողիկոս Ամենայն Հայոց.**

Վեհափառ Տեր,

Մաշտոցի անվան Մատենադարանի տնօրինությունը և գիտական ողջ անձնակազմը Ձեր գահակալության արդյունավետ քառամյակի և ազգանվեր լայն գործունեության առիթով ջերմորեն շնորհավորում են Ձեզ և ցանկանում առավել բարեհաջող և առավել բեղմնավոր նոր քառամյակներ:

Մենք հպարտությամբ նշում ենք, որ Ձեր Վեհափառությունն այսօր, բազմաձև Սահակ Պարթև, Ներսես Ծնորհալի, Ներսես Աշտարակեցի, Խրիմյան Հայրիկ, Գևորգ Վեցերորդ երջանկահիշատակ կաթողիկոսների գահին, շարունակում է կյանքի կոչել ազգօգուտ նույն ավանդները և ընթանալ հայրենաակեր գործունեության նույն մայրուղիով:

Ծակատագրի բերումով Ձեզ և Ձեր նախորդներից շատերին վիճակվել է հոգալ ոչ միայն մայր հայրենիքում բնակվող, այլև նրա սահմաններից դուրս օտար հորիզոններում պատասխարված հայության հայրենաբաղձ գանգվածների հոգևոր պետքերը և համախմբել նրանց հայրենի երկրի, նրա մշակույթի սրբազան ավանդների շուրջ: Հանրահայտ է, Վեհափառ Տեր, որ այս առումով շատ մեծ են Ձեր ծառայությունները: Սփյուռքահայությանը շնորհած Ձեր այցելությունները հիրավի եղել են կենսապարզ: Դուք ամենուրեք ոտք եք դրել որպես վերածնված Հայաստանի և ազատագրված հայ ժողովրդի երջանիկ առաքյալ՝ նպատակ ունենալով սփյուռքահայության բոլոր հանգրվանները կապել Սովետական Հայաստանի նվիրական հող ու ջրին և լուսավոր առօրյալին:

Մեր նախնիները կերտել են մշակութային հռչակապ հուշարձաններ, որոնք ամենուրեք արժանացել են անվերապահ գնահատության: Ըստ այդմ, մեր սրբազան պարտքն է՝ աչքի լույսի պես պահպանել հայ մշակույթի՝ մեզ ավանդված անգնահատելի մասունքները և սրբությանը փոխանցել գալիք սերունդներին: Դուք, Վեհափառ Տեր, այս ուղղությամբ ևս բեղմնավոր աշխատանք եք տարել՝ պաշտպան կանգնելով և նոր կյանք պարգևելով հայրենյաց հիշատակներին: Հանրահայտ են Ձեր ջանքերով իրականացած էջմիածնի Մայր տաճարի մեծածավալ նորոգումները, նրա ներքին և արտաքին բարձրաճաշակ հարդարումը, Վեհարանի շքեղ սրահներում արվեստի նոր թանգարանի ստեղծումը, ինչպես նաև պատմական ու մշակութային մեծարժեք բազմաթիվ հուշարձանների վերակենդանացումը:

Մենք, Մաշտոցի անվան Մատենադարանի ներկայացուցիչներս, խորին երախտագիտությամբ ենք արձանագրում այսօր հին ու միջնադարյան ձեռագրերի հավաքման և պահպանության ուղղությամբ Ձեր ծավալած նպատակադիր ու արդյունավետ գործունեությունը, որն արտահայտվել է Մաշտոցի անվան Մատենադարանին մեր մշակույթի տասնյակ մեծարժեք հուշարձանների նվիրաբերությամբ, որոնց մեջ հատուկ հիշատակության են արժանի Ձեր սիրելի մոր անունը հավերժացնող Ավետարանը և Թորոս Ռոպինի բարձրարվեստ մանրանկարներով զարդարված ձեռագրերը:

Իրվատելով Ձեր հայրենաակեր գործունեության արդյունքները, չենք կարող այսօր չհիշել, որ դրանք արգասավորվել են աշխարհի խաղաղության պայմաններում: Հայ ժողովուրդն առավելագույնս գիտե գնահատել

խաղաղությունը, որին այնքան ծարավի է եղել դարերի ընթացքում: Այս ճշմարտությունը Ձեզ քաջ հայտնի է: Այդ չէ՞ պատճառը, որ Դուք իրավես աշխարհի շատ բեմերից արտասանեցիք Ձեր ազնիվ «Խաղաղություն ամենեցուն»-ը: Ահա թե ինչու, Վեհափառ Տե՛ր, Դուք արժանի եք կրկնակի մեծարման նաև խաղաղության պահպանության գործին բերած Ձեր հետևողական ջանքերի համար, որը բարձր է գնահատվել սովետական պետության կողմից և նշանավորվել Ձեզ տրված կառավարական պարգևներով:

Ընդամենը քսան տարի... քայց անմնացորդ նվիրաբերման որքա՞ն ետանդ, ինչպիսի՞ մեծարժեք արգասիքներ, ի՞նչ մնայուն կյոթողներ...

Ի լրումն բանից մերոց սակաուց կամիմք ըստ լեզուին նախնեաց մերոց ի գիր արձանացուցանել, եթէ, արդարև, բազում են երախտիք Ձերդ Վեհափառութեան, որք շնորհապարտ կացուցանեն զազգս հայոց ի սփիռս աշխարհի: Կէտ նպատակի կենաց Ձերոց եւ համայնից գործառնութեանց կայր եւ մնայ յաւերժ պահպանութիւն մտաւոր եւ ոգեղէն զանձուց մերոց հայրենեաց: Եւ գոհութեամբ սրտի հաստատենք, եթէ յայսմ յամենայնի ոչ ինչ ունիք զպարտիս հատուցման առաջի ժողովրդեանն. զոր ինչ արարեալ էք, յաւելեալ եւ լիով:

Առ այս, բոլորով սրտի բարեմաղթենք Վեհափառութեանդ Ձերում քաջատոյժութիւն եւ արևատութիւն ի յամայր ամս եւ կատարեալ լրումն համօրէն ըղձից եւ նպատակաց Ձերոց:

Ի դիմաց տնօրէնութեանն Մաշտոցեան Մատենադարանի՝

Լ. Ս. ԽԱԶԻԿԵԱՆ

Գրեցաւ ի թուականութեանս հայոց ՌՆԻԵ,  
Յամենանն սեպտեմբերի ԻԷ, օրն Բ-շաբթի:

Սփյուռքահայության հետ մշակութային կապի կոմիտեի նախագահ Վարդգես Համազասայանը, հանուն կոմիտեի նախագահության, նույնպես ջերմորեն ողջունեց և շնորհավորեց Հայոց Հայրապետին հետևյալ հուզիչ ուղերձով.

ՍՓՅՈՒՌԻԱԶԱՅՈՒԹՅԱՆ ՀԵՏ ՄԾԱԿՈՒԹԱՅԻՆ ԿԱՊԻ ԿՈՄԻՏԵԻ  
ՆԱԽԱԳԱՀ ՎԱՐԴԳԵՍ ՀԱՄԱԶԱՍՊՅԱՆԻ ՈՂՋՈՒԹՅՆԻ ԽՈՍԲԸ

Ամենայն Հայոց Ծայրագույն Պատրիարք և կաթողիկոս,  
Նորին Սուրբ Օծություն Տ. Տ. Վազգեն Առաջին Հայրապետին

Ձերդ Սրբություն.

Սփյուռքահայության հետ մշակութային կապի կոմիտեի նախագահությունը ջերմորեն ողջունում է և ի սրտե շնորհավորում Ձեզ այս հանդիսավոր օրվա առթիվ:

Ձեր բազմաբերուն և արգասավոր գործունեությունն այս քսան տարիների ընթացքում, Ձեր բոլոր ջանքերը, անապառ ետանդը, բազմակողմանի ու խոր իմացությունը ի սպաս են դրվել հայրենամկեր նպատակների, ազգօգուտ գործերի:

Հատկապես մեծ է այն ավանդը, որ Ձերդ Սրբությունը ներդրել է աշխարհափառ հայությանը մայր հայրենիքի շուրջը համախմբելու, նրան վերածնված հայրենիքի նվաճումներով ու հեռանկարներով ոգեշնչելու գործում:

Մենք Ձեզ ճանաչում ենք որպես աշխարհի խաղաղության, ժողովուրդ-

ների բարեկամության ու համակեցության ջատագովի, մարդասիրական այդ մեծ գաղափարների շերտ ու հավատավոր պաշտպանի: Սովետական կառավարությունն ըստ արժանվույն գնահատելով խաղաղության գործի մեջ Ձեր ներդրած ազնիվ ջանքերը, Ձեզ արժանացրել է կառավարական բարձր պարգևի՝ «Պատվո նշան» շքանշանի:

Գոհունակության խորին զգացումով պիտի նշենք նաև Ձեր այն ջանքերը, որ Դուք ներդրել եք մեր պատմական հուշարձանները պահպանելու ու վերականգնելու, հայ ժողովրդի հոգևոր մշակույթի ցրված բեկորներն ի հայտ բերելու, հայրենադարձելու և հայրենի ժողովրդի սեփականությունը դարձնելու գործում:

Դուք անսպառ եռանդով սատարել եք սփյուռքի մշակութային կյանքին, հովանավորել ուսումնական հաստատությունների գործունեությունը, Ձեր խոսքով ու գործով ձգտել եք սփյուռքահայության հոգում միշտ վառ պահել հայրենասիրության ազնիվ կրակը:

Մեր կոմիտեի ստեղծման հենց առաջին օրվանից Դուք հանդիսացել եք նրա վարչության անփոփոխ անդամը և Ձեր նպաստը բերել նրա գործունեությանը:

Ձերդ Սրբություն, կրկին անգամ շնորհավորելով Ձեզ, մաղթում ենք քաջատողջություն, անսպառ կորով և նորանոր հաջողություններ Ձեր հայրենանվեր գործունեությանը:

ՍՓՅՈՒՌԱՀԱՅՈՒԹՅԱՆ ՀԵՏ ՄՇԱԿՈՒԹԱՅԻՆ  
ԿԱՊԻ ԿՈՄԻՏԵԻ ՆԱԽԱԳԱՀՈՒԹՅՈՒՆ

Վեհափառ Հայրապետի գահակալության քսանամյակի առիթով ստացվել էին բազում շնորհավորական հեռագրեր և գրություններ, որոնցից երկուսը հանդիսության ժամանակ հրապարակեց տ. Ծախե արքեպիսկոպոս Աճնեյանը, այդ թվում՝ Սովետական Միության Միմիստրների սովետին առընթեր կրոնական պաշտամունքների գործերի խորհրդի նախագահ Վ. Ս. Կուրոյեդովի շնորհավորական հեռագիրը, որը կրում էր 27 սեպտեմբեր 1976 թվականը (Սույն հեռագիրը տես «Էջմիածին» ամսագրի սույն համարում, էջ 11):

Հայկական բարեգործական ընդհանուր միության նախագահ տիար Սլեքս Մանուկյանը նաև իր 26 օգոստոս 1976 թվակիր սրտատույ հետևյալ նամակով շնորհավորում էր Հայոց Հայրապետի գահակալության քսանամյակը.

ՏԻՍՐ ԱԼԵՔՍ ՄԱՆՈՒԿՅԱՆԻ ԾՆՈՐՀԱՎՈՐԱԿԱՆ ԳԻՐԸ

**Ն. Ս. Օ. Տ. Տ. Վազգեն Ա կաթողիկոս Ամենայն Հայոց**

Ս. Էջմիածին, Հայաստան

Վեհափառ Տեր,

Ահա հանդիսավոր ու հոգեխտով առիթ մը ևս կատեղծվի համայն հայ ժողովուրդին համար, և աշխարհի բոլոր ծագերեն խումբ-խումբ հայեր կփութան սուրբ Էջմիածին՝ մասնակցելու համար Նորին Սուրբ Օծությանդ գահակալության քսանամյակի տոնախմբության:

Վերջին երկու տասնամյակներուն Հայաստանյայց եկեղեցվո պատմու-

թյունը պայծասացավ Ձեր անձին լույսով. Ձեզնով սուրբ Գրիգոր Լուսավորչի դարավոր Աթոռն ունեցավ արժանավոր գահակալ մը, իսկ սուրբ Էջմիածնի մայրավանքն սպրեցավ վերելքի, շինարարության ու վերահաստատվող փառքի նոր շրջան մը:

Ձեր ներշնչյալ և վարչագետ անձին մեջ հայրենի ժողովուրդը հաստատեց սուրբ Էջմիածնի հեղինակության բարձրացումը և անհուն սիրով ու խոր հարգանքով կապվեցավ Ձեզի: Մեզի համար երջանկություն եղած է միշտ հաստատել, թե համատարած հարգանքի և համակրանքի խորհրդանիշ մը կհանդիսանա Վեհափառությանը անունը մայր երկրի ժողովուրդին համար:

Ձեր գահակալության տարիներուն ոգի և շունչ ստացան մեր հինավուրց վանքերն ու եկեղեցիները. Ձեր հոգածու միտքն ու շինարար ճիգերն ավերակներեն վեր բարձրացուցին մեր ճարտարապետական գեղեցկությանը վսեմ կառույցներեն շատերը և կենդանությանը ու հպարտությանը վերականգնեցին զանոնք իրենց պատմական փառքին մեջ:

Մեզի՝ սփյուռքահայերու համար կենարար իրողություն մը հանդիսացավ Վեհափառությանը գահակալությունը, որովհետև Դուք զիսցաք հասնիլ յուրաքանչյուր սփյուռքահայու և օժել անոր հոգին Էջմիածնի լույսով. Ձեր աստվածատուր շնորհներով բաշխվեցաք բոլորին՝ անձամբ այցելելով, տարբեր գաղութներ կամ Ձեր պատգամն ու շունչը հասցնելով մինչև հեռավոր անկյուններն աշխարհի:

Այսօր, հայությունն ամենն ավելի տարածված է ի սփյուռս աշխարհի, սակայն, նույն ատեն, ավելի ուժգին կապված է Մայր Աթոռ ս. Էջմիածնին, որովհետև կենդանի հաղորդակցության մեջ է անոր հետ, առավելաբար Ձեր շինարար և առաքինազարդ անձին ընդմեջեն:

Սուրբ Էջմիածինը մեր հավատքի կովանը հանդիսացած է բոլոր դարերուն ընթացքին, և այսօր անոր շեն ու պայծառ վերականգնումը մեր սրբտերը կլեցնեն բերկրանքի և հպարտության անսպառ աղբյուրներով: Պատմության բախտավոր մեկ դիպվածով Մայր Աթոռի վերելքի այս հանգրվանին գահակալելու կոչվեցավ Ձերդ Վեհափառությունը, որ առավելագույն շքեղանքով թո՛ղչք մը տվավ այդ վերելքին:

Մենք կասկած չունինք, որ մեր եկեղեցվո պատմությունը Ձեր իշխանության տարիները պիտի նվիրագործեն Ձեր անունով և պիտի կնքեն զանոնք Ձեր շնորհալի անձին դրոշմով. Ձեր իշխանության տարիները պիտի անցնին պատմության իբրև Վազգեն Առաջին Ծինարար Հայրապետի ժամանակաշրջան:

Ձեր գահակալության հանդիսավոր առիթով ամբողջ աշխարհի հայության սիրտերը կցնձան Ձեզի հետ. ամեն հայ մասնակից կդառնա Մայր Աթոռի նվիրական կամարներուն տակ կայանալիք հոգեպարար հանդիսությանց:

Այս առնչությամբ հավանաբար ամեն հավատավոր հայու հոգվույն իղձերը խտացուցած կըլլանք մեր ողջույնի այս սրտագին գիրին մեջ, եթե Ձեզի մաղթենք երկար, արևշատ ու երջանիկ տարիներ: Բասն տարի Ձեր շնորհատատ անձով խորհրդանշվեցավ մեր սուրբ եկեղեցվո պայծառությունը. ու քանի վառ ու կենսուրախ մնա Ձերդ Վեհափառությունը, կենդանի ու շեն պիտի ըլլա մեր եկեղեցին:

Հայու մեր անխառն սպրումներու խորքեն սրտագին կշնորհավորենք Նորին Վեհափառությունը, ցանկալով Ձեզ երկար ատեն տեսնել սուրբ Գրիգոր Լուսավորչի պայծառ գահուն վրա:

Որդիական խորունկ ակնածանք՝

Ա. ՄԱՆՈՒԿՅԱՆ  
Նախագահ

Խաղաղության պաշտպանության Հայաստանի հանրապետական կոմիտեն նույնպես հեռագրով շնորհավորել էր խաղաղության ջերմ պաշտպան Հայոց Հայրապետի գահակալության քսանամյակը.

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԽԱՂԱՂՈՒԹՅԱՆ  
ՊԱՇՏՊԱՆՈՒԹՅԱՆ ԿՈՄԻՏԵԻ ԸՆՈՐՀԱՎՈՐԱԿԱՆ ՀԵՌԱԳԻՐԸ

**Ամենայն Հայոց կաթողիկոս Վազգեն Առաջինին.**

Հայաստանի Խաղաղության հանրապետական կոմիտեն ջերմագին շնորհավորանքներ է հղում Ձեր արգասավոր գահակալության 20-ամյակի առթիվ:

Ձեր քազմաբեղուն գահակալության ընթացքում Դուք հանդես եք եկել որպես խաղաղության պաշտպանության ջերմ ջատագով: Ձեր հայրենաշունչ խոսքը լայն արձագանք է գտել բարի կամքի տեր մարդկանց շրջաններում, արժանացել միահամուռ հավանության: Մենք բարձր ենք գնահատում Ձեր մասնակցությունը խաղաղության պաշտպանության բոլոր ձեռնարկումներին, ինչպես նաև խաղաղության ֆոնդին ի նպաստ Ձեր բերած օժանդակությունը:

Մաղթում ենք Ձեզ քաջատողջություն, նորանոր հաջողություններ Ձեր հայրենակներ գործում՝ հանուն կայուն խաղաղության հաստատման հիմնվուրց ու նորոգ մոլորակի վրա:

ԽԱՂԱՂՈՒԹՅԱՆ ՊԱՇՏՊԱՆՈՒԹՅԱՆ  
ՀԱՆՐԱՊԵՏԱԿԱՆ ԿՈՄԻՏԵ

Երևան, 27 սեպտեմբերի 1976 թ.

Աշխարհահռչակ երաժիշտ և կոմպոզիտոր Արամ Խաչատրյանը, շնորհավորելով Վեհափառ Հայրապետի գահակալության քսանամյակը, իր 27 սեպտեմբեր 1976 թվակիր հեռագրում գրում էր.

«Թանկագին Վեհափառ,

Ձեր գահակալության 20-ամյակի առիթով ընդունեցեք իմ սրտագին շնորհավորանքը և բարի մաղթանքները:

Ցանկանում եմ Ձեզ հետագա հաջողություններ Ձեր գործունեության ասպարեզում՝ ինչպես բոլոր հայերի համախմբման, այնպես էլ ժողովուրդների միջև խաղաղության և բարեկամության համար մղվող Ձեր ազնիվ աշխատանքում:

Խորին հարգանքներով՝

Ա.ՐԱՄ ԽԱՉԱՏՐՅԱՆ»:

Վեհափառ Հայրապետի գահակալության քսանամյակին նվիրված հանդիսավոր նիստի ավարտին տ. Շահնե արքեպիսկոպոսը հրավիրեց հոբելյար Հայոց Հայրապետին՝ Իր հոբելյանական խոսքն ասելու այս առթիվ:

Ողջ դահլիճը հուռնկալս մի անգամ ևս ցնծագին ծափահարություններով ողջունեց Հայոց Հայրապետին:




Նորին Սուրբ Օծությունը, խորապես հուզված համագգային այս հանդիսավոր արտահայտություններից, ողջունեց ներկայությունը բոլոր հյուրերի և հրավիրյալների բովանդակալից ու տպավորիչ մի ճառով (Վեհափառ Հայրապետի ճառը տես «Էջմիածին» ամսագրի սույն համարում, էջ 3):

Ժամը 14-ին ավարտվեց Հայոց Հայրապետի գահակալության քսանամյակին նվիրված հրեշյանական հանդիսությունը խանդավառ ու սրտագին մթնոլորտում:



# Մայր հայրենիքում



## ՊԱԾՏՈՆԱԿԱՆ ԸՆԴՈՒՆԵԼՈՒԹՅՈՒՆ

Սեպտեմբերի 27-ին, երկուշաբթի օրը, ժամը 15-ին, Կենտրոնական հոբելյանական հանձնաժողովը սրբալույս մեռոնի օրհնության և Հայոց Հայրապետի զահակալության քսանամյակի առիթով Երևանի «Արմենիա» հյուրանոցում կազմակերպեց պաշտոնական ճաշկերույթ, որին ներկա եղան 270 հոգի:

Հրավիրյալների թվում էին Երուսաղեմի և Կ. Պոլսի հայոց սրբազան պատրիարքները, թեմակալ առաջնորդները, թեմերի ներկայացուցիչները, Մայր Աթոռի բարերարներ, Գերագույն հոգևոր խորհրդի անդամներ, Երեվանի գիտության, մշակութային հիմնարկությունների ղեկավարներ, հայ մտավորականության ներկայացուցիչներ, Մայր Աթոռին առընթեր ճարտարապետական և իրավագիտական հանձնաժողովների անդամներ, Մայր Աթոռի պաշտոնեությունը, հոգևոր ճեմարանի դասախոսներ և բազում այլ հյուրեր:

Պաշտոնական սույն ճաշկերույթին մասնակցում էին նաև հանդիսություններին հրավիրված քույր եկեղեցիների հոգևոր պետերն ու ներկայացուցիչները:

Ընդունելությանը ներկա էին նաև ՀՍՍՀ Միևիստրների սովետին առընթեր հայ եկեղեցու գործերի խորհրդի նախագահ **Սարգիս Գասպարյանը**, տեղակալ **Անդրանիկ Հասրաթյանը** և խորհրդի բոլոր անդամները:

Սեղանն օրհնեց Հայոց Հայրապետը: Այնուհետև հայրենի բարիքներով ծանրաբեռն սեղանների շուրջ ստեղծվեց հայրենական խանդավառություն և ոգևորություն:

Հոբելյանական սույն ճաշկերույթի սեղանը ղեկավարեցին **տ. Կոմիտաս** և **տ. Ծաֆե արքեպիսկոպոսները**, որոնք ներկաներից շատերին խոսք տվեցին՝ այս առթիվ շնորհավորելու Հայոց Հայրապետին և արտահայտելու իրենց որդիական երախտագետ զգացումները հայ ժողովրդի կյանքում Հայոց Հայրապետի և Մայր Աթոռի ու Էջմիածնի կատարած հոգևոր, եկեղեցական, հայրենանվեր ու խաղաղասիրական առաքելության համար:

Առաջինը ելույթ ունեցավ ԱՄՆ-ի հայոց արևելյան թեմի սուաջնորդ տ. Թորգոմ արքեպիսկոպոս Մանուկյանը հետևյալ ուղերձով.

**Տ. ԹՈՐԳՈՄ ԱՐՔԵՊԻՍԿՈՊՈՍ ՄԱՆՈՒԿՅԱՆԻ ԾՆՈՐՀԱՎՈՐԱԿԱՆ ԽՈՍՔԸ**

Վեհափառ Հայրապետ Ամենայն Հայոց, Գոհության և ուրախության զգացումներ կլեցնեն սրտերը Ձեր աշխարհացրիվ զավակներուն, այս վեհաշուք հանդիսադրության առիթը մեզի ընծայված ըլլալուն համար:

Եկած ենք մոտեն ու հեռվեն, ցամաքներ և օվկիանոսներ կտրելով: Եկած ենք իբրև զավակները այն ժողովուրդին, որ ամբողջ հազարամյակներ խիզախորեն պաշտպանեց հայ եկեղեցին և հայ հայրենիքը: Եկած ենք իբրև քանակ ու որակ, իբրև սիրտ ու հոգի՝ երկրագունդի տարածքին վրա ապրող հայության անունով մասնակցելու այս փալլուն հանդեսին, իբրև վկայություն հայրենի պետության և հազարազանգ սուրբ Էջմիածնի աննահանջ պայծառության:

Եկած ենք մեր պատվական Վեհին հայտնելու երախտագիտություն՝ իր զմայլագեղ անձովն ու քսանամյա բազմաշխատ իր տուրքովը արդյունավորած իրագործումներուն համար:

Եվ այս սիրառատ պահուն, ինչպես միշտ, Վեհիդ իսկ բնորոշումով, «մեզի հետ են դարերը որ անցան, մեզի հետ են լուսապսակ հայրերը մեր, մեզի հետ է բովանդակ հոգին համայն հայությանը»:

Եկած ենք այստեղ իբրև շարունակողները երեսուն դարերու հայոց պատմության, իբրև հավատարիմ ավանդապահները անընկճելի ցեղին, իբրև բաբախուն հոգիները տեսչապաշտ ազգին:

Եկած ենք հայության Մայր Աթոռը, որուն վրա բազմած են 130 երանելի հայրապետներ, որոնք իրենց անձեն ու հոգիեն, իրենց միտքեն ու հավատքեն, իմանալի ու զգալի շողեր են բաշխած ու ճառագայթած «վասն Քրիստոսի և վասն հայրենեաց»:

Ներկայիս ավելի ևս հատակությամբ կըմբռնենք իմաստը Հայաստան աշխարհի ամբողջ տարածքը լեցնող հոյակապ տաճարներուն, հնամենի վանքերուն, «Քարէ սիմֆոնիաներուն», մագաղաթա սխրապատումներուն և հայ ստեղծագործ հանճարին արգասիքը հանդիսացող փառավոր վկայություններուն, որոնք մեր ժողովուրդին խիզախ մաքառումն ու տոկունությունը սպահովեցին իբրև անխորտակելի պատվանդաններ՝ մնալու, տնելու, և հասնելու պերճափայլ պետականության, հինգ հարյուր տարվան հպատակության բոլոր տաժանքներե, հալածանքներե և կոտորածներե անցնելե վերջ:

Ու սա օրերուն, հայկական պետության ընծայած կարելիություններով, լուսապայծառ քաղաքամայր Երևանին գրեթե դոկից, հազարամյակներե ի վեր սվետարանական առաքելություն կատարած սուրբ Էջմիածնի գետիններուն վրա կոտոնախմբենք ամենայն հայոց Հայրապետական Աթոռի 130-րդ Գահակալին քսանամյակը:

Սակիա բարեղեպ առիթ մըն է անկասկած և բաղձալի պատեհություն մը նաև անձնապես ու հավաքաբար հայտնելու մեր քաջակորով Հովվապետին մեր խորագգաց սերը, հարգանքի և հավատարմության մեր զգացումը:

Ուրախ ենք այս հանդիսության մասնակցողներու: Կցնծա այս պահուն

հայ ժողովուրդը, վասնզի ահա հայրենի հողին վրա փառավորապես կնշվի անձն ու գործը մեծ ու շինարար հայրապետի մը:

Հայրապետ մը իրավ, որուն գերակշիռ անձնավորության, հոգևոր հեղինակության, բարոյական ուժին հմայրվող կապրի, կխոյանա վեր, հանուր բարեպաշտ հայությունը:

Հայրապետ մը, որուն սերը (ծովի պես) խորունկ է հանդես պայր հայրենիքին, հայ եկեղեցիին, հայ մշակույթին ու դպրության, հայ հոգիին ու ոգեկանության:

Որ մաքուր Իր հոգին, կամեցող Իր սիրտը լայն բացավ նկատմամբ առնոց, որոնք չուզեցին կամ չկրցան անսալ հայու ներքին ձայնին, և երկվորյակները շահարկելե մղված՝ առին սին ու պատիր քայլեր՝ վնասելով հայ եկեղեցվո առաքելության գործին:

Հայրապետ մը, որ անդադրում մտածեց, ծրագրեց, շինեց ու բարեգարհեց: Ահավասիկ հրճվանքով կոխտենք հայոց հավատքի միջնաբերդը, որ կճառագայթե իր հոգևոր ճեմարանով, իր պարբերաթերթով, իր սիաբանական կյանքով, և դեռ բազմատեսակ վերակառուցումներով:

Հայրապետ մը, որ շնորհաբեր Իր այցերով խանդավառեց ու ոգևորեց հավատացյալ Իր հոտը, ի Հայաստան և ի սփյուռս տարացրիվ, ոչ միայն Իր բարձր անհատականությամբը, այլև Իր քաղցրաշունչ խոսքերովը, Իր բովանդակալից պատգամներովը:

Հայրապետ մը, որ ուզեց և կարողացավ կամուրջ մը ձգել Հայց. եկեղեցվո և բոլոր քրիստոսապաշտ եկեղեցիներու միջև: Որ իրապես օժանդակ հանդիսացավ եկեղեցիներու էկոմենական շարժումին: Որ բանաձևեց ուղին՝ գործոն կերպով նպաստելու աշխարհի մեջ արդարության և խաղաղության պահպանման ու ամրապնդման կենսական գործին: Որ ավետարանական եղբայրության և համաքրիստոնեական միության համար եղած կոչերուն միացուց ազնիվ ու մաքուր, թարմ ու առույգ ձայնը Իր, լեզու գտնելու ժամանակակից գիտության, մշակույթի և ընկերային ապրող ու զարգացող գաղափարներու և իրականություններու հետ, խնայելու քրիստոնեության՝ վտանգը մեկուսացվելուն կամ մեկուսանալուն:

Հայրապետ մը, որ կամեցավ գնահատել, վարձատրել ամենե՛ն շատ՝ նվիրյալ ծառայողները ազգին, մշակները հայ գիրին ու գիտության, կառուցողները տաճարներու, և գործիչները մեր հասարակության: Որ պատմական գահին ու Իր պատվական անձին և տարած աշխատանքներուն պատճառով շահեցավ վստահություններ ամենուրեք, ստացավ սրտաբուխ հատկացումներ, վայելեց գործակցությունը պատրաստակամ հոգիներուն՝ որոնք կներկայացնեին հայության բոլոր խավերը, բոլոր երեսակները:

Այս բազմաթիվ և դեռ չմատնանշված իրագործումներուն համար շնորհակալիք արձանագրելու փափաքով եկած ենք համբույր դնելու Ամենայն Հայոց Սրբազնագույն կաթողիկոսի մեռոնասօժ Աջույն: Խոսք տալու, ուխտ ընելու, մշտառև աշխատելու հայ եկեղեցիի և հայ մշակույթի ծաղկումին համար, հայ հոգիները՝ իրարու հետ միացված-ամրացած, ոսկի օղակներու պես, կապելու մեր պապերուն հայրենիքին ու հավատքի պատնեշ սուրբ Էջմիածնին:

Հայց. եկեղեցվո Հյուսիսային Ամերիկայի արևելյան թեմը, Միացյալ Նահանգաց և Կանադայի Իր զավակներուն սրտաբուխ նվերը կմտոցանե Նորին Ս. Օծություն Տ. Տ. Վազգեն Առաջին Սրբազնագույն կաթողիկոսին Ամենայն Հայոց, յթանասունհինգ հազար դոլլարի գումար մը տրամադրե-

լով Վեհափառ Հայրապետին, Մայր Հայաստանի մեջ գեղակերտելու համար հայ հավատքի տուն տաճարներեն մին:

Եվ կաղոթե՛րգե՛նք. «Տե՛ր, անասան պահիր դու միշտ, քո իսկ հիմնած Մայր Աթոռ»:

Նման ոգեշունչ և գեղեցիկ ելույթներ ունեցան Ռումինիայի և Բուլղարիայի հայոց առաջնորդ տ. Տիրաչր եպիսկոպոս Մարտիկյանն ու Անգլիայի հայոց հայրապետական պատվիրակ և Լոնդոնի հայոց հոգևոր տեսուչ տ. Ներսես եպիսկոպոս Պոզապալյանը:

Թեմերի պատգամավորներից ոմանք նույնպես իրենց սրտատուչ ելույթներով շնորհավորեցին Հայոց Հայրապետի գահակալության քառամյակը՝ որդիական հավատարմություն, սեր ու պաշտամունք հայտնելով Մայր Աթոռ ու Էջմիածնի հանդեպ: Այս ոգով ելույթներ ունեցան Գևորգ Թահտան (Լոնդոն), Վահան Ալեքսանյանը (Եգիպտոս), Բաֆֆի Իսրայելյանը (Բուենոս-Այրես), Կարո Մարտինը (Հնդկաստան) և ուրիշներ:

Իրաքի թեմի ազգային կենտրոնական վարչության անունից վարչության ատենադպիր դուկտ. Հասրաթ Միքայելյանն ընթերցեց հետևյալ շնորհավորական գիրը.

Վեհափա՛ռ Տե՛ր,

Այս հանդիսավոր օրվա առթիվ, Հայաստանյայց եկեղեցվո սրբազան հայրերու և ազգային-հասարակական կյանքի մեջ դիրք ու վաստակ ունեցող հարգարժան անձերու կողմն եղած այնքան գեղեցիկ և իմաստալից արտահայտություններն հետո, թերևս ավելորդ ըլլային այս քանի մը անպանդուն խոսքերը, եթե ես և ազգային կեդրոնական վարչության գործակից ընկերս՝ պրն. Արամ Սեթյան, չունենայինք հաճելի պարտականությունը, անպայմանորեն փոխանցելու Ձերդ Վեհափառության, Իրաքի հայ ազգային կեդրոնական վարչության, ազգային-հասարակական մարմիններու և համայն իրաքահայության որդիական հարգանքները, և մաղթելու երկար և երջանիկ կյանք, ի փառս Հայաստանյայց եկեղեցվո:

Վեհափա՛ռ Տե՛ր, եթե հրաշքով մը կարելի ըլլար հարազատ կերպով այստեղ պատկերացնելու Իրաքի ավելի քան չորս հարյուր տարվա պատմություն ունեցող հին հայության, և եղեռնեն հրաշքով ճողոպրած մնացորդացի զգացումները, վստահ եմ, որ ներկաները պիտի գտնվեին հուզիչ տեսարանի մը առջև, որովհետև Մայր Աթոռն ու ս. Էջմիածինը ոչ թե եղած են ու կնկատվին սոսկ կրոնական կեդրոն մը միայն, այլ ունեցած են բոլորովին այլ նշանակություն մը,—վկա՛ մեր պատմությունը:

Վեհափա՛ռ Տե՛ր, թույլ տվե՛ք մաղթանքի այս քանի մը խոսքը փակել 1965-ին, Ձեր գահակալության տասնամյակի առթիվ, ցարդ ինձի անձանոթ ազգայինի մը այնքան խոր և իմաստալից մտավորապես հետևյալ խոսքերով. «Օրհնյալ ըլլա այն արգանդը, որ հայության պարգևեց Վազգեն Վեհափառի նման կաթողիկոս մը»:

Մնամք որդիական ակնածանոք մատչելով ի համբույր Ձերդ Վեհափառության սուրբ Աջույն՝

ԱՐԱՄ ՍԵԹՅԱՆ

նախագահ

ԴՈԿՏ. ՀԱՍՐԱԹ ՄԻՔԱՅԵԼՅԱՆ

ատենադպիր

Չափազանց հուզիչ և շերտ հնչեցին հայրենի մտավորականության անունից խոսք առնող սիրված բանաստեղծներ Միլվա Կապուտիկյանի և Գեվորգ Էմինի ելույթները: Նրանք իրենց խոսքի մեջ վեր հանեցին Հայոց Հայրապետի՝ հայ մշակույթի և հայ գրականության հանդեպ ունեցած մեծ սերն ու գուրգուրանքը, ինչպես նաև հայրենասեր Հայրապետի խաղաղասիրական ու հայրենասնվեր գործունեությունը՝ համրապնդումն սփյուռք-հայրենիք եղբայրական հարաբերությունների և ի բարօրություն վերածնված Հայոց աշխարհի:

Մայր Աթոռին առընթեր ճարտարապետական հանձնաժողովի անունից հանդես եկավ նաև հանձնաժողովի նախագահ, ճարտարապետ դոկտ. Վարազդատ Հարությունյանը շնորհավորանքի հետևյալ խոսքով.

«Վեհափա՛ն Հայրապետ,

Ինձ պատիվ է շնորհված այս հանդիսավոր օրը Մայր Աթոռին առընթեր ճարտարապետական հանձնաժողովի անունից շերտորեն շնորհավորել Ձերդ Սրբությանը, Ձեր գահակալության քսանամյակի առթիվ:

Անցած երկու տասնամյակների ընթացքում Դուք Ձեր բազմաբեղուն գործունեությունը, որպես Հայաստանյայց առաքելական եկեղեցու Հայրապետ, նշանավորեցիք նաև բացառիկ արդյունավետ վերաշինական ու շինարարական ձեռնարկումներով, որոնցով Ձեր անունն ըստ արժանվույն ոսկե տառերով պիտի արձանագրվի շինարար հայ կաթողիկոսների անունների շարքում:

Մեծ խորհուրդ կա նրանում, որ այդ գործունեությունը տեղի ունեցավ հայ ժողովրդի պատմական աննախընթաց վերելքի ու վերածնության շրջանում, սովետական կարգերի օրոք:

Առանց չափազանցության կարելի է ասել, որ անցյալում հայոց ոչ մի կաթողիկոս հնարավորություն չի ունեցել իրականացնելու շինարարական այնպիսի մեծածավալ, բազմաբովանդակ ծրագրեր, ինչպես մեր լուսավոր օրերում այդ հաջողվեց Ձերդ Սրբությանը:

Ստանալով հայրենի բարեխնամ կառավարության ամենօրյա աջակցությունը, հավատացյալ հայության նյութական օգնությունը, Վազգեն Առաջին Ամենայն Հայոց կաթողիկոսն Իր գահակալության բոլոր տարիներին անդադրում կերպով, հայրենասիրաբար ու նրբանկատ իմացությամբ գլխավորեց մեր հին եկեղեցիների և վանքերի վերանորոգման ու բարեզարդման, նոր շենքերի կառուցման աշխատանքները:

Մեր հանձնաժողովը, որին երկար տարիներ գլխավորում էր հանգուցյալ բազմահմուտ ճարտարապետ Միքայել Մազմանյանը, սատար եղավ շինարար կաթողիկոսի նախաձեռնումներին, գիտական ու մասնագիտական հոգատարությամբ իրականացրեց դրանք: Մեծ ավանդ մուծեցին այդ հայրենասնվեր գործում հանձնաժողովի անդամներ՝ անժամանակ կյանքից հեռացած շնորհաշատ ճարտարապետ Ռաֆայել Իսրայելյանը, Մայր Աթոռի ճարտարապետ Արծրուն Գալիկյանը, ճարտարապետ Բաղդասար Արզումանյանը և տաղանդավոր շատ արվեստագետներ ու փորձառու վարպետներ:

Վեհափա՛ն Տեր, Ձեր գահակալության քսանամյակին նվիրված այս հանդիսավոր առիթով իմ արվեստակից ընկերները հանձնարարել են հավաստիացնել Ձեզ, որ առաջիկայում նույն նվիրվածությամբ պատրաստ ենք մեր անձր տրամադրել Ձեր շինարարական սպազա ծրագրերի իրականաց-

մանը՝ ի պայծառություն Մայր Աթոռն ու Էջմիածնի, ի հաստատումն հայ ժողովրդի ճարտարապետական բարձրարժեք կոթողների:

Արևշատություն և առողջություն, երկար տարիների բեղմնավոր կյանք ենք մաղթում Ձեզ»:

Այս առթիվ պատգամավորներից և հյուրերից ոմանք Մայր Աթոռին արտաբուխ նոր նվիրատվություններ կատարեցին, որպեսզի Նորին Սրբությունը հետագա տարիներին ևս կարողանա շարունակել Իր, կրթական, շինարարական ձեռնարկումները՝ ի պայծառություն ու Էջմիածնի և Հայաստանյայց եկեղեցու:

Ծաշկերույթի ավարտին, խանդավառ արտահայտությունների ներքո, խոսք առավ Հայոց Հայրապետը, հայտնեց Իր շնորհակալությունները բոլոր հյուրերի ներկայության՝ ելույթ ունեցողների որդիական անկեղծ և ջերմ շնորհավորանքների համար:

Այս առթիվ Վեհափառ Հայրապետը ու Գրիգոր Լուսավորչի սուսջին կարգի շքանշանով զարդարեց կրծքերը մեծնօրհնության կնքահայրեր Գևորգ Թահտաչի (Լոնդոն), Հովակիմ Մուրադյանի (ԱՄՆ):

Մեծնօրհնության երրորդ կնքահայրն էր Մայր Աթոռի բարերար Գևորգ Պագրճյանի երիտասարդ որդին՝ Բաֆֆի Պագրճյանը, որն այս առթիվ արժանացավ Հայոց Հայրապետի օրհնությանը:


Հրեկյանական սույն ճաշկերույթն ավարտվեց ժամը 18-ին՝ խմբովին երգված Տերունական աղոթքով:

Նույն օրը, երեկոյան, Վեհափառ Հայրապետին հրաժեշտ տվեց Բասիլոս Մար Թոմա Մատթեոս Ա կաթողիկոսը՝ իր շքախմբով, և մեկնեց իր Աթոռ:









### ԱՅՑ ԾԻԾԵՌՆԱԿԱՔԵՐԴԻ ՀԱՅ ՆԱՀԱՏԱԿԱՑ ՀՈՒԾԱՐՁԱՆ

Սեպտեմբերի 28-ին, երեքշաբթի օրը, առավոտյան ժամը 10-ին, Վեհափառ Հայրապետի գլխավորությամբ, բոլոր հոգևոր պետերը, պատգամավորներն ու հյուրերն այցելեցին Ծիծեռնակաբերդի Հայ նահատակաց հուշարձան:

Այս առթիվ հուշարձանին գեղեցիկ ծաղկեպսակներ զետեղեցին Վեհափառ Հայրապետը, Տ. Պիմեն Պատրիարքը և Տ. Դավիթ Ե Պատրիարք-կաթողիկոսը:

Նահատակաց հուշարձանի հավերժական կրակի շուրջ բոլորված, հայ և քույր եկեղեցիների հոգևոր պետերը, հայ հոգևորականությունը, բոլոր պատգամավորներն ու հյուրերը միասնաբար աղոթեցին հայ նահատակաց հոգիների խաղաղության և հանգստի համար:

Այստեղ ներկա էր նաև ՀՍՍՀ Միևիստրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը:

### ԱՅՑ Ս. ՄԵՍՐՈՊ ՄԱԾՏՈՑԻ ԱՆՎԱՆ ՁԵՌԱԳՐԱՑ ՄԱՏԵՆԱԴԱՐԱՆ

Ժամը 11-ին, Վեհափառ Հայրապետի գլխավորությամբ, քույր եկեղեցիների հոգևոր պետերն ու ներկայացուցիչներն այցելեցին Երևանի ս. Մեսրոպ Մաշտոցի անվան ձեռագրաց Մատենադարան, որի շքամուտքի առաջ Հայոց Հայրապետին և Մայր Աթոռի հարգարժան հյուրերին դիմավորեց Մատենադարանի տնօրեն ակադեմիկոս Լևոն Խաչիկյանն ու առաջնորդեց ընդունելության դահլիճ, որտեղ տեղի ունեցավ ջերմ ու սիրալիր զրույց:

Այստեղ զրույցի ընթացքում հյուրերը ծանոթացան հայ մշակույթի հոգևոր գանձերի հնագույն նմուշներին, որոնց թվում՝ 1268 թվականին Հռոմ-կայում հայ մանրանկարչության մեծագույն վարպետ Թորոս Ռոսլինի կողմից նկարազարդված Ավետարանը, որը Մատենադարանին էր նվիրել Երուսաղեմի հայոց տ. Եղիշե սրբազան պատրիարքը՝ Հայոց Հայրապետի՝ Երուսաղեմ կատարած այցելության առիթով, 1975 թվականի հունիսին:

Այստեղ հյուրերը դիտեցին նաև Վեհափառ Հայրապետի կողմից անցյալ տարի Մատենադարանին նվիրված Է դարի երկաթագիր մի Ավետարան, որը կոչվում է **Տիրամոր Ավետարան**՝ ի հիշատակ հանգուցյալ տիրամայր **Սիրանուշ Պաղճյանի**:

Այնուհետև հյուրերն այցելեցին Մատենադարանի ցուցահանդեսի սրահ, որտեղ դիտեցին հայ մանրանկարչության և ձեռագրական արվեստի ցուցադրված ընտիր նմուշները:

Ապա, ոսկե մատչանում իրենց տպավորություններն արձանագրելուց հետո, թանկագին հյուրերը հրաժեշտ տվեցին Մատենադարանին:

Այնուհետև քույր եկեղեցիների բարձրաստիճան մի խումբ հոգևորականներ այցելության մեկնեցին ս. Գեղարդ պատմական վանք, որտեղ սիրով ընդունվեցին վանքի վանահայր տ. Վահան եպիսկոպոս Տեքյանի կողմից, որը պատմական կարևոր տեղեկություններ տվեց հյուրերին հայ մշակույթի վառ օջախներից մեկը հանդիսացող այս մենաստանի՝ մեր եկեղեցու պատմության և մատենագրության մեջ նրա կատարած դերի, ինչպես նաև վանական կառույցների ճարտարապետական առանձնահատկությունների մասին:

Հյուրերը դեպի Երևան իրենց վերադարձի ճանապարհի վրա այցելեցին նաև վերջերս վերականգնված Գառնիի հեթանոսական տաճար, որտեղ նույնպես նրանց բացատրություններ տրվեցին Հայաստանում հելլենիստական շրջանի մշակույթի այս եզակի հուշարձանի մասին:

#### ԱՅՑ ՀՍՍՀ ՄԻՆԻՍՏՐՆԵՐԻ ՍՈՎԵՏԻՆ ԱՌԸՆԹԵՐ ՀԱՅ ԵԿԵՂԵՑՈՒ ԳՈՐԾԵՐԻ ԽՈՐՀՈՒՐԴ

Ժամը 12.30-ին, Վեհափառ Հայրապետի գլխավորությամբ, Տ. Պիմեն Պատրիարքը և Տ. Դավիթ Ե Պատրիարք-կաթողիկոսը պաշտոնական այցելություն տվեցին Երևանում ՀՍՍՀ Մինիստրների սովետին առընթեր հայ եկեղեցու գործերի խորհուրդը, որտեղ ջերմորեն ընդունվեցին խորհրդի նախագահ պրն. Սարգիս Գասպարյանի կողմից:

Երեք Հովվապետների և խորհրդի մեծարգո նախագահի միջև տեղի ունեցավ ջերմ գրույց՝ արտագին մթնոլորտում:

#### ՊԱՇՏՈՆԱԿԱՆ ԸՆԴՈՒՆԵԼՈՒԹՅՈՒՆ

Նույն օրը, ժամը 15-ին, «Արմենիա» հյուրանոցի վարդազույն դահլիճում ՀՍՍՀ Մինիստրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը, հանուն Հայաստանի կառավարության և եկեղեցական խորհրդի, ճաշկերույթ տվեց՝ ի պատիվ Հայոց Հայրապետի, քույր եկեղեցիների հոգևոր պետերի, Երուսաղեմի և Կ. Պոլսի հայոց պատրիարքների և հայ ու օտար բարձրաստիճան հոգևորականության:

Ընդունելությունն անցավ ջերմ ու խանդավառ մթնոլորտում, որի ընթացքում փոխանակվեցին բարիգալստյան և ողջույնի արտագին խոսքեր:

#### ՀՐԱԺԵԾՏԻ ԾԱԾԿԵՐՈՒՅԹ ԲՅՈՒՐԱԿԱՆԻ «ՀԱՅԿԱԾԷՆ» ՀԱՅՐԱՊԵՏԱՆՈՑՈՒՄ

Երեկոյան ժամը 20-ին Վեհափառ Հայրապետը հյուրականի «Հայկա-շէն» հայրապետանոցում տվեց հրաժեշտի ընթրիք քույր եկեղեցիների հոգևոր պետերի և պատվիրակությունների պատվին:


Ընթրիքին մասնակցեցին նաև տ. Եղիշե, տ. Ծնորհք սրբազան պատրիարքները և բարձրաստիճան հայ հոգևորականներ:

Մայր Աթոռի բարիքներով ծանրաբեռն այս սիրո սեղանի շուրջ ստեղծվեց էկումենիկ ոգով քրիստոնեական եղբայրության իրավ մթնոլորտ, որտեղ կրկին անգամ փոխանակվեցին հուշանվերներ և ողջերթի ջերմ խոսքեր:

Սեպտեմբերի 29-ին, չորեքշաբթի օրը, քույր եկեղեցիների հոգևոր պետերը՝ Տ. Պիմեն Պատրիարքը, Տ. Դավիթ Ե Պատրիարք-կաթողիկոսը, կարդինալ Ժան Վիլլբրանդսը, Ջերալդ Ալեքսանդր Էլիսոն եպիսկոպոսը, Գերմանոս միտրոպոլիտը, Ֆրանչիսկյան միաբանության կուստոդ հայր Մատրիլիո Մակկին, իրենց շքախմբերով և հետևորդներով, հրաժեշտ տվեցին Մայր Աթոռ ս. Էջմիածնին, Հայոց Հայրապետին, հայ հոգևորականությանը և մեկնեցին շնորհակալ տպավորություններով:

Մայր Աթոռի թանկագին հյուրերը ճանապարհվեցին Հայոց Հայրապետի գլխավորությամբ, պատշաճ հարգանքով և մեծարանքով:





## ՀՈՒՅՆՆԵՐԻ ԽԱՉԲԱՐԻ ԲԱՑՈՒՄ ՎԵՀԱՐԱՆԻ ԲԱԿՈՒՄ

Սեպտեմբերի 30-ին, հինգշաբթի օրը, Վեհափառ Հայրապետը Վեհարանում ընդունեց թեմակալ առաջնորդների, հայ հոգևորականության, թեմերի պատգամավորների և բազում ուխտավորների խմբական այցելությունը:

Վեհարանը ճշմարտապես վերածվել էր ուխտավայրի. գալիս էին բոլորը՝ հոգևորական թե աշխարհական, ծեր թե երիտասարդ, մտավորական թե պարզ աշխատավոր՝ աջահամբույրով ստանալու Հայոց Հայրապետի օրհնությունները և լսելու Նրա ոգեշունչ պատգամները: Այս երևույթը կըրկընվեց մի ամբողջ շաբաթ:

Սեպտեմբերի 30-ին, ժամը 13-ին, Հայոց Հայրապետի նախագահությամբ և ի ներկայության ողջ հայ հոգևորականության, պատգամավորների, ուխտավորների և հյուրերի, աղոթքով ու օրհնությանը կատարվեց Վեհարանի բակում կանգնեցված Նորին Սրբության գահակալության քսանամյակին նվիրված հորեյանական խաչքարի հանդիսավոր բացումը: Այս առթիվ հանդիսության բացման խանդավառ խոսքով հանդես եկավ լուսարարապետ տ. Հուսիկ եպս. Սանթրույանը:

Խաչքարային արվեստին հատուկ հայկական գեղեցիկ զարդանախշերով քանդակված սույն խաչքարի հեղինակն է քանդակագործ Արտաշես Հովսեփյանը, իսկ քանդակագործական աշխատանքները կատարել է Հրաչյա Ստեփանյանը: Հորեյանական խաչքարի վրա փորագրված է հետևյալ արձանագրությունը՝ հայկական գեղեցիկ երկսթազի տառերով.

Կանգնեցաւ խաչքարս ի նշանատրումն քսան ամաց վատարկոցն Տ. Տ. Վազգէն Ա. կաթողիկոսին Ամենայն Հայոց: Ս. Էջմիածին, ՌՆԻԻԵ:

Հորեյանական խաչքարի բացումից հետո բոլոր հյուրերն առաջնորդվեցին Վեհարանի երկրորդ հարկի դահլիճ՝ դիտելու գեղարվեստական




ՀՈՐԵՆՅԱՆՆԿԱՆ ԽԱՉԻՍՏ

բարձր նաշակով հորինված հայոց Մեսրոպյան այբուբենի ոսկեգիր քանդակազարդ տառերը, որոնք Հայոց Հայրապետի ստաջատրանքով ու պատվերով պատրաստվել էին Նրա հորեղանի առթիվ՝ որպես նվեր Մայր Աթոռին:

Սույն քանդակազարդ տառերի գծագրության հեղինակը եղել է Մայր Աթոռին առընթեր ճարտարապետների հանձնաժողովի անդամ ճարտարապետ Բաղդասար Արզումանյանը, իսկ ոսկերչական աշխատանքները կատարել է ոսկերիչ Ժիրայր Չուլոյանը:

Բոլոր ներկաները հիացմունքով և երախտագիտական զգացմունքներով դիտեցին հայ ոսկերչական արվեստի այս ինքնատիպ ստեղծագործությունը:





## ԵՊԻՍԿՈՊՈՍԱՑ ԽՈՐՀՐԴԱԿՑԱԿԱՆ ԺՈՂՈՎԻ ԳՈՒՄԱՐՈՒՄ ՄԱՅՐ ԱԹՈՒՌՈՒՄ

Սեպտեմբերի 30-ին, հինգշաբթի օրը, ժամը 17-ին, Վեհափառ Հայրապետի նախագահությամբ Վեհաբանում գումարվեց եպիսկոպոսաց խորհրդրդակցական ժողով, որին մասնակցեցին տ. Եղիշե, տ. Ծնորհք սրբազան պատրիարքները, տ. Սերովբե, տ. Ասողիկ, տ. Բաբգեն, տ. Թորգոմ, տ. Կոմիտաս, տ. Ծահե, տ. Վաչե արքեպիսկոպոսները, տ. Հուսիկ, տ. Վահան, տ. Տիրայր, տ. Հակոբ, տ. Գարեգին, տ. Գյուտ, տ. Արսեն, տ. Նարեկ, տ. Գևորգ, տ. Արիս, տ. Ներսես եպիսկոպոսները:

Ժողովն օրհնությամբ բացեց Վեհափառ Հայրապետը և ողջունեց բոլոր ներկաներին:

Այնուհետև ընթերցվեց Վեհափառ Հայրապետի՝ եկեղեցական բարեկարգության վերաբերյալ մի շարք հարցերի մասին տ. Եղիշե սրբազան պատրիարքին ուղղած 25 հոկտեմբեր 1975 թվակիր նամակը, որտեղ նաև հիշեցում էր կատարվում 1969 թվականի աշնանը Մայր Աթոռում գումարված եպիսկոպոսաց ժողովի կողմից ընդունված որոշման համաձայն մի շարք եպիսկոպոսների վրա դրված ուսումնասիրության գծով կատարվելիք բարեկարգական աշխատանքների վերաբերյալ:

Վեհափառ Հայրապետի թելադրության համաձայն տ. Եղիշե պատրիարքը գրել է այն բոլոր եպիսկոպոսներին, ովքեր պարտավորություններ էին ստանձնել ուսումնասիրություններ կատարելու և դրանք ներկայացնելու Մայր Աթոռին:

Հատենի ժողովո Վեհափառ Հայրապետը հայտարարեց, որ մինչև ստանձնված այդ աշխատանքները չկատարվեն, նպատակահարմար չի լինի հրավիրել եպիսկոպոսաց նոր ժողով: Այս հարցը Վեհափառ Հայրապետն ամենայն կարևորությամբ հանձնեց ներկաների ուշադրությանը:

Եպիսկոպոսաց խորհրդակցական սույն ժողովի օրակարգում դրված էին հետևյալ հարցերը.

1. Եպիսկոպոսաց առաջիկա ժողովի գումարում.
2. Հայ եկեղեցու կանոնագրության կազմության հարցը.
3. Սրբացման կանոնի ուսումնասիրության հարցը.
4. Ս. Զատիկը անշարժ մի թվականի տոներու հարցը.
5. Արքության պատվի և վարդապետական աստիճանների տվչության հարցը.
6. Քույր եկեղեցիների հետ Էկումենիկ հարաբերությունների զարգացման հարցը:
7. Ընթացիկ հարցեր:

Հետ խորհրդակցության եպիսկոպոսաց ժողովը հանգեց հետևյալ եզրակացությունների.

1. Եպիսկոպոսաց առաջիկա ժողովը գումարել Երուսաղեմի հայոց վանքում Երուսաղեմի հայոց տ. Եղիշե պատրիարքի հրավերով 1977 թվականի հոկտեմբերի երկրորդ կեսին՝ մինչ այդ հանգամանորեն նախապատրաստելով ժողովում քննության առնվելիք հարցերը:

2. Անհրաժեշտ համարվեց մինչև առաջիկա ժողովի գումարումը կազմել հայ եկեղեցու և նրա նվիրապետության վարչա-կազմակերպչական կանոնագրությունը:

3. Քննության առնվեց նաև հայ եկեղեցու կանոնագրքի վերաքննության և մեր օրերին կիրառելի կանոնների գրքի մի նախագիծ պատրաստելու անհրաժեշտությունը: Որոշվեց այդ կարևոր գործը հանձնարարել Մայր Աթոռին:

Սույն կանոնագիրքը կազմվելու է Մայր Աթոռում:

4. Սրբացման կանոնի ուսումնասիրության համար որոշվեց վերակազմել նախկին հանձնախումբը՝ հետևյալ կազմով.

ա) Տ. Բաբգեն արքեպիսկոպոս Ապատյան.

բ) Տ. Վաչե արքեպիսկոպոս Հովսեփյան.

գ) Տ. Տիրայր եպիսկոպոս Մարտիկյան.

դ) Վազգեն Հակոբյան:

5. Ժողովը քննության առավ նույնպես ս. Զատիկն ապրիլ ամսի երկրորդ շաբաթ օրվան հաջորդող կիրակին անխափան կերպով և միասնաբար տոնախմբելու վերաբերյալ Հռոմի Պապի առաջարկը:

Ժողովը որոշեց՝ շարունակել այս հարցի շուրջ ուսումնասիրությունները և պարտականություն դրեց Կ. Պոլսի հայոց տ. Ծնորհք պատրիարքի վրա՝ ներկայացնելու վերջնական մի ուսումնասիրություն առաջիկա եպիսկոպոսաց ժողովին:

6. Ժողովը քննարկեց վարդապետական, ծայրագույն վարդապետական ու եպիսկոպոսական աստիճանների և արքության պատվի տվչության հարցը: Այս հարցի շուրջ նախապես պատրաստած իր ուսումնասիրության նախագիծը կարդաց տ. Սերովբե արքեպիսկոպոսը: Ներկաները միաձայնությամբ առաջադրեցին, որ այս հարցը հառաջիկա եպիսկոպոսաց ժողովի օրակարգի վրա դրվի, և տ. Սերովբե արքեպիսկոպոսի վրա պարտականություն դնել, որ իր պատրաստած նախագիծն իր վերջնական ձևի մեջ ներկայացնի ժողովի քննարկմանը:

7. Եպիսկոպոսաց ժողովը կրկին արձանագրեց իր ցանկությունը, որ հայ եկեղեցին շարունակի մասնակցել Էկումենիկ շարժմանը և միջեկեղեցական ժողովներին, միայն Վեհափառ Հայրապետի գիտությամբ ու Նրա մատչանությամբ:



8. Եպիսկոպոսաց սույն ժողովում քննության առնվեցին նաև ծննդաբերության կասեցման, դիակիզման, կրոնական կրթության և դաստիարակության, սուրբ պատարագի արարողության կրճատման, եկեղեցականների և ուսուցիչների պատրաստման ու այլ հարցեր: Այս հարցերի ուսումնասիրության համար պարտականություններ դրվեցին առանձին եպիսկոպոսների վրա, որոնք և պարտավորվեցին իրենց ուսումնասիրությունների արդյունքներն ամփոփել և դրանք Վեհափառ Հայրապետին ուղարկել մինչև 1977 թվականի հունիս ամսվա վերջը:

Այսպես՝

ա) Տ. Եղիշե պատրիարքի հսկողությամբ կրոնական կրթության ու դաստիարակության, ինչպես նաև հոգևորական և աշխարհական կրթական մշակներ պատրաստելու հարցի ուսումնասիրությունը պիտի կատարվի Երուսաղեմում:

բ) Տ. Ծախե արքեպ. Աճեմյանին հանձնարարվեց ծննդաբերության կասեցման հարցի ուսումնասիրությունը:

գ) Տ. Թորգոմ արքեպ. Մանուկյանին՝ դիակիզման հարցի ուսումնասիրությունը:

դ) Տ. Սերովբե արքեպ. Մանուկյանին, տ. Բարզեն արքեպ. Ապատյանին և տ. Գնել եպս. Մերեճյանին՝ ս. պատարագի վերատեսության հարցի ուսումնասիրությունը:

ե) Տ. Ծախե արքեպ. Աճեմյանին՝ ամուսնալուծման և վերամուսնության հարցի ուսումնասիրությունը:

Եպիսկոպոսաց խորհրդակցական ժողովը փակվեց ժամը 20-ին՝ խմբովին երգված Տեքունական աղոթքով և հայրապետական «Պահպանիչ»-ով:





ԵՐԵՎԱՆԻ Ս. ՍԱՐԳԻՍ ԱՌԱՋՆՈՐԴԱՆԻՍ ՎԵՐԱՆՈՐԴՎԱԾ ԵԿԵՂԵՑՈՒ ԱՐՏԱՔԻՆ ՏԵՍԲԸ



**ԵՐԵՎԱՆԻ Ս. ՍԱՐԳԻՍ ՎԵՐԱԿԱՌՈՒՑՎԱԾ ԱՌԱՋՆՈՐԴԱՆԻՍ ԵԿԵՂԵՑՈՒ ՆԱՎԱԿԱՏԻՔՆ ՈՒ ՕԾՈՒՄԸ**

Հոկտեմբերի 3-ին, կիրակի օրը, առավոտյան ժամը 10-ին, մեծ հանդիսությամբ կատարվեց լոնդոնաբնակ Գևորգ և Հովհաննես Քյուրքչյան եղբայրների նվիրատվությամբ վերակառուցված Երևանի ս. Սարգիս եկեղեցու նավակատիքն ու օծումը՝ ձեռամբ Արարատյան հայրապետական թեմի առաջնորդական փոխանորդ տ. Կոմիտաս արքեպիսկոպոսի:

Հանդիսությանը ներկա էին Վեհափառ Հայրապետը, տ. Եղիշե և տ. Ծնորիք պատրիարքները, թեմակալ բոլոր առաջնորդներն ու եպիսկոպոսները, թեմերի բոլոր պատգամավորները, ուխտավորներն ու հյուրերը և հավատացյալների մի հոծ բազմություն:

Հանդիսությանը ներկա էր նաև ՀՍՍՀ Միևիատրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը:

Արարողությունն սկսվեց եկեղեցու նոր դռան սեմի և վերին շեմքի (բարատր) օծումով: Այնուհետև օծվեցին «աջ և երկրորդ սիւնն սրբոյ եկեղեցւոյս», ապա «հիւսիսային սիւնն սրբոյ եկեղեցւոյս», «հարաւային սիւնն սրբոյ եկեղեցւոյս», «նակատն սրբոյ բեմիս», «հարաւային կամարն սրբոյ խորանիս», այնուհետև «խորանն սրբոյ եկեղեցւոյս» և հուսկ ուրեմն՝ «հիւսիսային կամարն սրբոյ խորանիս»:

Եկեղեցու օծումից հետո սկսվեց հանդիսավոր սուրբ պատարագը, որ մատուցեց տ. Կոմիտաս արքեպիսկոպոսը:

«Հայր մեր»-ից առաջ քարոզեց Վեհափառ Հայրապետը.

ՀԱՅՈՑ ՀԱՅՐԱՊԵՏԻ ՔԱՐՈԶԸ ԵՐԵՎԱՆԻ Ս. ՍԱՐԳԻՍ ԵԿԵՂԵՑՈՒ  
ՕԾՄԱՆ ԱՌԹԻՎ  
(3 հոկտեմբերի 1976 թ.)

«Յանուն Հօր և Որդույ և Հոգույն սրբոյ»:

«Քանզի ի սմա ծագեաց մեզ լոյս ի Հայաստան աշխարհի»:

«Որովհետև սրանով լոյս ծագեց մեզ համար Հայաստան աշխարհի վրա»:

Միրելի հավատացյալներ,

Մենք բոլորս Աստուծո նորոգման հավաքված ենք այստեղ, այս և եկեղեցու վերակառուցումից հետո նրա օծման առիթով. «Քանզի ի սմա ծագեաց մեզ լոյս ի Հայաստան աշխարհի»:

Մեր ժողովուրդը՝ հայ հավատացյալ ժողովուրդը, բազում դարերից ի վեր հավատում է, թե իմանալի լույսը, ոգու և հոգու լույսը ծագեց Հայաստանի վրա այն օրվանից, երբ նա ընդունեց քրիստոնեական հավատքը, և կառուցվեցին հայ աղոթքի տները, առաջինը՝ ս. Էջմիածնում, և հետո բազում-բազում նման եկեղեցիներ, վանքեր Հայաստանի ամբողջ տարածքի վրա:

Այսօր էլ մեր հավատացյալ ժողովուրդը և՛ Հայաստանում, և՛ ի սփյուռս աշխարհի այս հավատքով է ապրում, նախնյաց այս նվիրական համոզումով և տեսիլքով: Եվ դարերի մեր պատմությունը, մեր ժողովրդի պատմությունը վավերական մի ապացույց է այն ճշմարտության, թե իսկական լույսը հայ ժողովրդի մեջ ճառագայթեց ու ծաղկեց շնորհիվ քրիստոնեական հավատքի:


Ու ահա մի նոր ապացույց մեր այդ հավատքի. վերածնված մեր հայրենիքի քաղաքամայր Երևանի կուրծքի վրա բարձրացավ այս գեղեցիկ նոր եկեղեցին՝ Երևանի ս. Սարգիս վերակառուցված եկեղեցին: Մեր երազանքն էր այս տաճարի վերակառուցումը և բարեգարդումը:

Մեր գահակալության առաջին տարիներից ի վեր Մեր մտածումի առարկան եղել է նաև այս եկեղեցին:

Ավելի քան տասը տարիներ առաջ սկսվեցին աշխատանքները՝ նախագծովը տաղանդավոր ճարտարապետ Ռաֆայել Իսրայելյանի, որ, ավա՛ղ, մեր մեջ չէ այսօր: Բայց նրա գործը շարունակեց, իբրև նախագծող և իբրև իրագործող, ճարտարապետ Արծրուն Գալիկյանը՝ Մայր Աթոռիս զխավոր ճարտարապետը: Ահա այս երկու ճարտարապետների՝ Ռաֆայել Իսրայելյանի և Արծրուն Գալիկյանի նախագծով, աշխատանքով և տեսիլքով է, որ ծնունդ առավ այս բարձրադիր գմբեթով եկեղեցին:

Երևանի ս. Սարգիս եկեղեցին հին պատմություն ունի, սիրելի հավատացյալներ: Հիմնադրության ճշգրիտ թվականը հայտնի չէ թեև, սակայն հավանաբար է կամ Ը դարերի շրջանում պետք է տանել այդ թվականը: Դարերի ընթացքում մի քանի անգամ ավերվել էր այն բարբարոսների արշավանքների հետևանքով և շուրջ 300 տարի առաջ վերակառուցվել էր համեստ այն արտաքինով, որ ծանոթ էր ձեզ:

Ուրեմն շուրջ տասը տարիներ առաջ սկսվեցին վերակառուցման աշխատանքները, տ. Վահան եպիսկոպոսի առաջնորդական փոխանորդության շրջանում: Երկար և ծանր աշխատանք կատարվեց տարիներ շարունակ, որպեսզի իրականանա եկեղեցու ամբողջական քարապատումը: Կառուցման ընթացքում նոր մտածումներ առաջ եկան, որպեսզի եկեղեցին ավելի բարձր դիրք ստանա, և նրա գմբեթը սկսես դեպի երկինք, ազատված՝ կողքի շեն-



ԵՐԵՎԱՆԻ Ա. ՍԱՐԳԻՍ ԵԿԵՂԵՑՈՒ ՔԱՆՆՈՒՄԱՆԱԶԱՐԿ ԳԼԽԱՎՈՐ ՄՈՒՏՔԸ

քերի ծանրությունից: Այս առաջադրանքի իրականացումը կպարտինք հասկապես ճարտարապետ Արծրուն Գալիկյանի համառ լավատեսության: Այսպես է, որ մարմին առավ այս գեղեցիկ, հաշվական ոճով ու Սարգիս եկեղեցին, նաև խորհուրդներով Մայր Աթոռի կողքին գործող ճարտարապետների գիտական հանձնաժողովի: Կառուցող ինժեներները եղան՝ սկզբնական շրջանում ճարտարապետ Վաչագան Խաչատրյանը, և ապա ինժեներ Միքայել Հովհաննիսյանը:

Վերջին տարիների ընթացքում, առաջնորդական փոխանորդ ու Կոմիտաս արքեպիսկոպոսն է, որ տևապես հետևեց ու հսկեց աշխատանքներին՝ իր կողքին ունենալով և՛ թեմական խորհուրդը, և՛ ու Սարգիս եկեղեցու վարչությունը՝ գլխավորությամբ նրա առեմնապետ պրն. Մուշեղ Սեբոբյանի: Բոլորը միասին, մասնագետներ, հոգևորականներ և աշխարհիկ ներկայացուցիչները մեր ժողովրդի, ձեռք-ձեռքի տված, Մեր օրհնության ներքև, կարողացան կյանքի կոչել իրենց վատահված այս նվիրական գործը:

Ս. Սարգիս եկեղեցու վերակառուցման ամբողջ ընթացքում Մենք վաչեղեցինք նաև հայրենի կառավարության և Երևանի քաղաքային իշխանությունների հույժ բարյացակամ վերաբերմունքը և նույնիսկ հաճախ անսխալական օժանդակությունը:

Կխորհինք, թե Երևանի հավատացյալները հոգեկան մխիթարությամբ է, որ այսօր գտնվում են այստեղ՝ փառք տալով Տիրոջը, որ ահա քաղաքամայր Երևանն օժտվեց մի նոր զարդով, հաշվական ճարտարապետության մի նոր կոթողով, աղոթքի մի սքանչելի նոր սրբավայրով:

Միրելի հավատացյալներ, Մենք, իբրև Հայրապետ, այսօր ուրախ ենք, և հրճվում է Մեր հոգին՝ տեսնելով իրականացումը նաև Մեր այս ծրագրի: Աղոթում ենք առ Աստված, որ հավետ անասան մնա այս փառահեղ Մայր եկեղեցին, և միշտ իր դռները բաց պահի մեր հավատացյալների առջև՝ բաշխելու համար բոլորին աստվածային օրհնությունը, ու Հոգու շնորհները և Քրիստոսի սերն ու խաղաղությունը:

Միրելի հավատացյալներ, այս ու տաճարը վերակառուցվեց նյութական միջոցներովը լոնդոնաբնակ երկու հայորդիների՝ մեր եկեղեցու հարազատ զավակների, երկու երիտասարդ հույերի՝ Գևորգ և Հովհաննես Քյուրքճյանների, բարի զավակները հավատացյալ մի ընտանիքի՝ Սարգիս և Աստղիկ Քյուրքճյանների: Սարգիս Քյուրքճյանը մի անձնավորություն է, որ ծանոթ է մեր ամբողջ գաղթաշխարհին և սիրելին է մանավանդ Մայր Աթոռ ու Էջմիածնի տակավին հանգուցյալ, երջանկահիշատակ Գևորգ Զ կաթողիկոսի օրերից: Նա ահավասիկ ավելի քան 80 տարիներից ի վեր Լոնդոնում հանդիսանում է բարեկամը մեր վերածնված մայր երկրի և բարեբարը Մայր Աթոռ ու Էջմիածնի:

Երկար պիտի լինեք թվել նրա բոլոր բարեարությունները՝ ի պաշտոնություն Մայր Աթոռ ու Էջմիածնի, բայց այսօր Մենք խղճի պարոք ենք համարում երախտագիտությամբ հիշել իր և իր որդիների մեծ նվիրատվությունը՝ ավելի քան հարյուր հազար դոլլար, որի շնորհիվ հնարավոր եղավ հոգալ ծախսերն այս մեծածախս գործին: Տեսնում ենք, սիրելիներ, թե ինչպես սփյուռքի տարածքի վրա մեր ժողովուրդն ունի հավատավոր զավակներ, որոնք հավատարիմ են մեր լույս հավատքին, մեր նախնյաց ավանդություններին, և իրենց կյանքի հիշատակն ուզում են կապել մի կոթողի հետ՝ բարձրացած հայրենի հողի վրա:

Ահավասիկ պայտիսներ հանդիսացան տիկին և պրն. Սարգիս Քյուրքճյանների զավակները:

Համուն Երևանի հայ հավատացյալների և հանուն այս եկեղեցու հոգևվոր և աշխարհական պաշտոնյաների մի անգամ ևս Մեր երախտագիտությունն ենք հայտնում նրանց և Մեր աղոթքն ենք բարձրացնում առ Աստված, որ նրանց պահի, պահպանի քաջատողջ, երկար և արևշատ, խաղաղ տարիներ՝ ընտանեկան երջանկությամբ:

Միրելի ժողովուրդ, այսօր, այս ուրախությամբ և հոգեկան այս մխիթարությամբ ս. Էջմիածնից բերում ենք նաև ձեզ բոլորիդ Աստուծո օրհնությունը և աղոթում ենք բոլորիդ քաջատողջության և արևշատության համար:

Թող Աստված անշարժ և միշտ լույսի մեջ շողշողուն պահի այս Մայր եկեղեցին և ձեզ բոլորիդ՝ իր օրհնության ներքև, այժմ և հավիտյան. ամեն:

Ս. Սարգիս եկեղեցու վերակառուցման առիթով տաճարի ներսում, գլխավոր մուտքի կամարի աղեղի վրա, մարմարե տախտակ է զետեղված՝ հետևյալ արձանագրությամբ.

«Ի Հայրապետության Տ. Տ. Վազգենի Ա կաթողիկոսի Ամենայն Հայոց և ի փոխանորդության տ. Կոմիտաս արքեպիսկոպոսի ի հիմանէ վերակառուցա և բարեգարդեցա սուրբ Սարգիս եկեղեցիս արդեամբ Լոնտոնաքնակ Գեորգի և Յովհաննիսի՝ որդւոցն Սարգսի և Աստղիկի Քիրքճեան յամի Տեառն 1976 յամսեանն հոկտեմբերի

ի վայելումն հաւատացելոց քաղաքամայր Երևանի:

Ծարտարապետք Ռաֆայել Իսրայելեան և Արծրուն Գալիկեան»:

Հավարտ ս. պատարագի Վեհափառ Հայրապետի հանդիսադրությամբ ս. Սարգիս եկեղեցում կատարվեց հոգեհանգստյան մասնավոր արարողություն Քյուրքճյան ընտանիքի հին և նոր ննջեցյալների հոգիների խաղաղության համար:

### ԸՆԴՈՒՆԵԼՈՒԹՅՈՒՆ ՀԱՆՈՒՆ ԱՐԱՐԱՏՅԱՆ ԹԵՄԻ

Հոկտեմբերի 8-ին, ժամը 15-ին, Երևանի ս. Սարգիս եկեղեցու առաջնորդական փոխանորդ տ. Կոմիտաս արքեպիսկոպոսը, թեմական խորհուրդը և ս. Սարգիս եկեղեցու վարչությունը «Անի» հյուրանոցի ռեստորանում ճաշկերույթ տվեցին՝ ի պատիվ Հայոց Հայրապետի, Երուսաղեմի և Կ. Պոլսի սրբազան պատրիարքների, թեմակալ առաջնորդների, թեմերի պատգամավորների, Մայր Աթոռի բարերարների և հյուրերի՝ մասնակցությամբ 180 հոգու:

Ծաշկերույթին ներկա էին նաև ՀՍՍՀ Միևիստրների սովետին առընթեր հայ եկեղեցու գործերի խորհրդի նախագահ Սարգիս Գասպարյանը և տեղակալ Ա. Հասրաթյանը:

Խոսք առնելով տ. Կոմիտաս արքեպիսկոպոսը վեր հանեց սրբապույս մեռոնի օրհնության և Վեհափառ Հայրապետի գահակալության քանաճախկին նվիրված հանդիսությունների հոգևոր ու եկեղեցական, ազգային ու հայրենասիրական նշանակությունը:

Այնուհետև առաջնորդական փոխանորդ սրբազանը ծանրացավ ս. Սարգիս եկեղեցու վերականգնման կապակցությամբ կատարված աշխատանքների վրա, ոգեկոչեց հիշատակը հանգուցյալ ճարտարապետ Ռաֆայել Իսրայելյանի և ապա իր, թեմական խորհրդի ու եկեղեցական գործադիր իշ-

խանության անունից շնորհակալություններ հայտնեց ճարտարապետ Արծրուն Գալիկյանին, ինժեներ Միքայել Հովհաննիսյանին և այն բոլոր շինարար վարպետներին, բանվորներին, որոնք իրենց նվիրյալ աշխատանքներով սլատվով ի գլուխ հանեցին ս. Սարգիս եկեղեցու հիմնական վերակառուցումը:

Տ. Կոմիտաս արքեպիսկոպոսը շնորհակալության և երախտագիտության խոսք ուղղեց նաև Մայր Աթոռի բարերար տեր և տիկին Սարգիս-Աստղիկ Քյուրքճյաններին, որոնց լոնդոնաբնակ որդիների՝ Գևորգ և Հովհաննես Քյուրքճյանների արդյամբ և նվիրատվությամբ գլուխ բերվեց ս. Սարգիս եկեղեցու վերակառուցումը:

Ապա Հայոց Հայրապետին ուղղյալ շնորհակալության և որդիական երախտագիտության հետևյալ շերտ խոսքն ասաց, հանուն Քյուրքճյան ընտանիքի անդամների, ազգային բարերար պրն. Սարգիս Քյուրքճյանը.

ՏԻԱՐ ՍԱՐԳԻՍ ՔՅՈՒՐՔՃՅԱՆԻ ԾՆՈՐՀԱՎԱԼՈՒԹՅԱՆ ԽՈՍՔԸ

Վեհափառ Տեր,  
Ամենապատիվ սրբազան հայրեր,  
Հարգելի պարոն Սարգիս Գասպարյան,  
Գերաշնորհ և հոգեշնորհ հայրեր,  
Հարգելի պատգամավորներ և հյուրեր,  
Սիրելի ներկաներ,

Այսօր պատմական և անմոռանալի օր մըն է Քյուրքճյան ընտանիքի անդամներու համար, ինձի համար, տիկնոջս և երկու զավակներու համար:

Շատ ցանկալի էր, որ երկու զավակներս ալ այս հանդիսավոր պահուն այստեղ ըլլային՝ իրենց շնորհակալությունը և երախտագիտությունը հայտնելու Ամենայն Հայոց մեր շատ սիրելի Վեհափառ Հայրապետին, այն բացառիկ պատիվին համար, որ այսօր սրբալույս մեռնի օրհնության և Հայոց Հայրապետի զահակալության 20-ամյակի հանդիսությունները կեզրափակվին մեր պանծալի մայրաքաղաքի՝ Երևանի առաջնորդանիստ ս. Սարգիս եկեղեցւո վերանորոգության ավարտումեն հետո անոր օծման արարողությամբ:

Խանդավատված Հայոց Հայրապետի շինարարական, վանքերու և եկեղեցիներու վերանորոգման ծրագիրներեն, որոնք իրականացան տարիներու ընթացքին, մեր ընտանիքին ալ սրտագին բաղձանքը եղաւ Նորին Սուրբ Օծության շինարարական այդ ձեռնարկներուն բերել իր համետ ամանակ-ցությունը:

Եվ ահա Վեհափառ Հայրապետի թելադրությամբ և ցանկությամբ մենք սիրով հանձն առինք հոգալ Երևանի առաջնորդանիստ ս. Սարգիս եկեղեցւո վերանորոգության ծախսերը: Այդ ծախսերը սիրով հանձն առին մեր երկու զավակները՝ Գևորգը և Հովհաննեսը, ի հարգանս իրենց ծնողաց:

Ուրախ եմ, որ զավակներու այդ ցանկությունը կատարված է շատ փառավոր և շքեղ կերպով: Այսօր մեր սիրելի ու պաշտելի քաղաքամայր Երևանի ճարտարապետական հոշակապ կերպարի հետ համահանչուն կրթաբարձրանա ս. Սարգիս եկեղեցին՝ զարդարելով Երևանը հայ եկեղեցական ճարտարապետության հարազատ ոգին և հայեցի դրոշմը կրող այս վերանորոգված տաճարով, ինչ որ անհրաժեշտ էր մեր մայրաքաղաքին համար:

Մենք ուրախ ենք և չսփազանց գոհ, որ Քյուրքճյան ընտանիքին կողմն



այս առթիվ կատարված 100.000 դոլլարի նվիրատվությունը, Հայոց Հայրապետի անմիջական հսկողության տակ, կուպեկ առ կուպեկ ծառայած է իր սուրբ նպատակին:

Վեհափա՛ն Տեր, թույլ տվեք պատմական և մեզի համար անմոռանալի այս պահուն տիկնոջս և երկու զավակներուս շնորհակալությունը և երախտագիտությունը հայտնել Ձեզի՝ տարիներու մեր երազանքը իրականացած տեսնելու համար:

Այս առթիվ մեր շնորհակալության և երախտագիտության մասնավոր խոսքը կուղղենք Ձեզի, որ ընդառաջեցիք մեր ցանկության և թելադրեցիք, որ ի հիմանե վերանորոգվի ս. Սարգիս եկեղեցին:

Ծնորհակալության խոսք ունինք հայտնելու նաև մեր հայրենի բարեխնամ կառավարության՝ ի դեմս ՀՍՍՀ Միմիստրներու սովետին առընթեր հայ եկեղեցվո գործերու խորհուրդի նախագահ պարոն Սարգիս Գասպարյանին, որ քաջալերեց այդ ձեռնարկը և պայմաններ ստեղծեց, որպեսզի հաջողությամբ ավարտի ս. Սարգիս եկեղեցվո վերանորոգումը:

Սրտագին շնորհակալության խոսք ունիմ նաև մեր ճարտարապետներուն, հանգուցյալ ճարտարապետ Ռաֆայել Իսրայելյանին, որուն բարի հոգին հիմա երկնքի մեջ կհրճվի՝ տեսնելով իր նախագիծով կատարված այս վերանորոգությունը: Ծնորհակալություն նաև ճարտարապետ Արծրուն Գալիկյանին և ինժեներ Միքայել Հովհաննիսյանին, բոլոր վարպետներուն՝ Արտաշես Հովսեփյանին, Նիկոլայ Խաչատրյանին և ուրիշներուն, որոնք իրենց ուժն ու վարպետությունը չխնայեցին՝ այս ձեռնարկին հաջողության համար:

Մասնավոր շնորհակալության խոսք ունիմ նաև Արարատյան հայրապետական թեմի փոխանորդ տ. Կոմիտաս արքեպիսկոպոսին, թեմական խորհուրդի անդամներուն և անոր ժրաջան նախագահին, որոնք ամեն ինչ ըրին՝ ս. Սարգիս եկեղեցվո նորոգությունը փառքով և պատվով կատարելու համար:

Ծնորհակալություն նաև այստեղ ներկա գտնվող սրբազան պատրիարքներուն, եպիսկոպոսներուն և պատգամավորներուն:

Մեր եկեղեցական աղոթքներեն մեկուն մեջ կկարդանք. «Երանի եկեղեցի շինողաց»:

Այսօր այդ երանությունը ունինք մենք՝ Քյուրքճյան ընտանիքի անդամներս, շնորհիվ մեր սիրելի և շինարար Հայոց Հայրապետին:

Այս պահուն, Վեհափառ, մեզի կմնա խնդրել Ձեր հայրական օրհնությունները և բարեմաղթել Ձեզ, որ երկար տարիներ բազմած մնաք ս. Լուսավորիչի այս դարավոր Աթոռին վրա ու շարունակեք Ձեր եկեղեցաշեն, հայրենանվեր գործունեությունը՝ ի փառս մեր եկեղեցիին և հայ ժողովուրդին:

Թող կեցցե Մայր Աթոռ ս. Էջմիածինը:

Թող երկար ապրի անոր արժանավոր Գահակալը:

Ու թող միշտ խաղաղության, բարօրության մեջ ամրանա ու հզորանա մեր մայր հայրենիքը՝ Սովետական Հայաստանը:

Վեհափա՛ն Տեր, վերջին ցանկություն մըն ալ ունիմ այս պահուն: Կխնդրեմ Ձեր մասնավոր հայրական օրհնությունները երկու զավակներուս՝ Գևորգ և Հովհաննես Քյուրքճյաններուն՝ անոնց և անոնց զավակներուն կյանքի արևաշատության և երջանկության համար:

Ճաշկերության ավարտին տ. Կոմիտաս արքեպիսկոպոսը հրավիրեց Հայոց Հայրապետին՝ Իր վերջին օրհնությունը և պատգամը տալու բոլոր ներկաներին:

Հուզիչ էր պահը: Երագի նման անցան սրբալույս մեռոնի օրհնության և Հայոց Հայրապետի գահակալության քսանամյակին նվիրված հիշարժան և անմոռանալի օրերը, անցան այդ օրերն արագ, բայց բովանդակալից, հոգեշեն և հուզումնառատ:

Ուրախության և հուպարտության արցունքներ էին փայլում շատերի աչքերում: Հուզված էր Հայոց Հայրապետը, հուզված էին բոլորը:

Մրտազին ծափողջույնների մեջ խոսք առնելով հոբելյար Հայոց Հայրապետը, Իր պատգամի մեջ մի անգամ ևս անդրադարձավ սրբալույս մեռոնի՝ մեր ժողովրդի կյանքում ունեցած հոգևոր, ազգային և հայրենասիրական նշանակության մասին՝ որպես մեր ժողովրդի հոգևոր միության կենդանի ու սրբազան խորհրդանշան, որպես ոգեկան ամուր շաղախ, որով դրոշմվում են հայ եկեղեցու զավակները ի հայրենիս և ի սփյուռս աշխարհի՝ դառնալու համար անքակտելի, անբաժանելի մի ամբողջություն որպես մշակույթ, որպես ժողովուրդ և որպես եկեղեցի:

Հայոց Հայրապետը թելադրեց, որ հանդիսություններին ներկա թե՛ հոգեվորական և թե՛ աշխարհական պատգամավորները, վերադառնալով իրենց թեմերն ու համայնքները, տանեն իրենց հետ Մայր Աթոռ ս. Էջմիածնի դարավոր օրհնությունները, հայրական Իր ողջույնները և փոխանցեն հայ ժողովրդի տարասփյուռ զավակներին, որպեսզի այդ օրհնության ներքո միշտ վառ ու կենդանի մնա հայ ժողովրդի անբաժանելիության, հայ եկեղեցու միության և մեկության փրկարար գիտակցությունը վերածնված Հայոց աշխարհի ժայռակերտ հավատքի և զգացումի մեջ:

Հայոց Հայրապետն Իր պատգամի մեջ կրկին անգամ անդրադարձավ շուրջ երկու տարուց ի վեր Լիբանանում տեղի ունեցող տխուր իրադարձություններին և ողբերգական կացությանը, որի պայմաններում ապրում են երկրի քրիստոնյա և մահմեդական համայնքները, այդ թվում նաև՝ հայ ժողովրդի դժբախտ զավակները:

Լիբանանին և նրա աստվածասեր բոլոր ժողովուրդներին երկնային խաղաղություն ցանկանալուց հետո Հայոց Հայրապետը մի անգամ ևս բոլոր պատգամավորների ուշադրությունը հրավիրեց լիբանանաբնակ մեր կարոտյալ եղբայրներին նյութապես և բարոյապես օգնելու անհրաժեշտության վրա՝ այդ առթիվ շեշտելով. «Մենք կամենում ենք վերստին Մեր հայրապետական կոչն ուղղել սփյուռքի մեր բոլոր եկեղեցական համայնքներին»:

Իր խոսքի մեջ Վեհափառ Հայրապետն անդրադարձավ նաև ս. Սարգիս եկեղեցու վերակառուցման գործին իրենց նյութական մասնակցությունը բերած Քյուրքնյան երկու եղբայրների առատաձեռն նվիրատվությանը և այս առթիվ, նրանց բարերարությունն արժանացնելով Իր հայրապետական բարձր գնահատությանը, նրանց շնորհեց ս. Գրիգոր Լուսավորչի առաջին կարգի շքանշաններ: Վեհափառ Հայրապետը, հանդիսավորապես այդ շքանշանները հանձնելով երկու եղբայրների ծնողներին, թելադրեց Անգլիայի հայոց հայրապետական պատվիրակ և Լոնդոնի հայոց հոգևոր տեսուչ տ. Ներսես եպիսկոպոս Պոզապալյանին, որ մասնավոր մի հանդիսությամբ Իր անունից հանձնի դրանք Մայր Աթոռի բարերարներին:

Հայոց Հայրապետի այս հայտարարությունը ներկաների կողմից ընդունվեց ջերմ ծափահարություններով:

Այս առթիվ Վեհափառ Հայրապետը բարեհաճեց և Գրիգոր Լուսավորչի շքանշանով զարդարել նաև կուրծքը Մայր Աթոռի հարազատ զավակ, հասարակական ծանոթ գործիչ և մտավորական պրոֆ. Բարունակ Թովմասյանի, որը շուրջ 45 տարիներ եկեղեցանվեր ու կրթական վաստակ ունի Լիբանանի մեր ազգային-եկեղեցական կյանքի մեջ: Վեհափառ Հայրապետն անդրադարձավ նաև պրոֆ. Բարունակ Թովմասյանի ազգասիրական ծառայությանը լիբանանահայ կարոտյալ ընտանիքների օգնության հանձնաժողովում՝ որպես նրա սրտացավ ու նվիրյալ անդամի:

Վերջում թե՛ պրն. Սարգիս Քյուրքճյանը և թե՛ պրոֆ. Բարունակ Թովմասյանը շնորհակալության և երախտագիտության խոսք ասացին հայրապետական այս բարձր գնահատանքի առիթով:

Հրածեշտի սույն ճաշկերույթն ավարտվեց խմբովին երգված Տերունական աղոթքով:

**ՀՈԳԵՎՈՐԱԿԱՆ ԵՎ ԱԾԽԱՐՀԱԿԱՆ ՊԱՏԳԱՄԱՎՈՐՆԵՐԸ  
ՀՐԱԺԵՇՏ ԵՆ ՏԱԼԻՍ ՄԱՅՐ ԱԹՈՌԻՆ**

**Հոկտեմբերի 4—5 օրերին** հոգևորական և աշխարհական բոլոր պատգամավորներն ու հյուրերը հրածեշտ տվեցին Վեհափառ Հայրապետին, Մայր Աթոռին և մեկնեցին անմոռաց տպավորություններով:

**Հոկտեմբերի 5-ին, երեքշաբթի օրը**, ժամը 13-ին, Մոսկվայի վրայով դեպի իրենց Աթոռներն ու թեմերը մեկնեցին Երուսաղեմի հայոց պատրիարք տ. Եղիշե արքեպիսկոպոսը, Կ. Պոլսի հայոց պատրիարք տ. Շնորհք արքեպիսկոպոսը՝ ողեկցությամբ տ. Սերովբե, տ. Բաբգեն, տ. Թորգոմ, տ. Շահե, տ. Վաչե արքեպիսկոպոսների, տ. Գարեգին և տ. Գյուտ եպիսկոպոսների:

Այլ պատգամավորներ և հյուրեր մեկնեցին հաջորդող մեկ-երկու օրերին:

**Սեպտեմբերի 25-ից հոկտեմբերի 5 օրերը** սրբալույս մեռուցի օրհնությանը և Հայոց Հայրապետի քսանամյա գահակալությանը նվիրված հանդիսությունները, ուխտագնացություններն ու այցելություններն անցան հոգեշահ, հաճելի, հետաքրքրական ու բովանդակալից, եկեղեցասիրական ու հայրենատրոպի խոր ու անկեղծ ապրումներով և վերածվեցին մեր հավատի դարավոր կենտրոն Մայր Աթոռ ու Էջմիածնի, նրա արժանավոր Գահակալի, մեր վերածնված մայր հայրենիքի շուրջ բոլոր պատգամավորների, հյուրերի, ուխտավորների ու բովանդակ հայ ժողովրդի համախմբվածության, սիրո, հավատարմության համազգային մի սրբազան տոնի:

Բոլոր պատգամավորներն ու հյուրերը կարոտակեզ շրթներով ու ծնրադիր համբուրեցին մեր սուրբ վանքերի խնկաբույր քարերը, ազգային անսահման հպարտությամբ և երջանկությամբ գմայլվեցին մեր հայրենիքի շքեղ վերելքով ու հաղթական երթով՝ ի տես հայրենաբնակ մեր ժողովրդի օրավոր զարգացող և խոստումնալից առօրյայի, և լցվեցին անխախտ հավատով դեպի նրա առավել պայծառ ապագան:

Անցնող օրերի ընթացքում պատգամավորներն ու հյուրերը ծանոթացան նաև Մայր Աթոռի միաբանական կյանքին: Բոլորն էլ միահամուռ հաստատեցին Վեհափառ Հայրապետի թե՛ հոգևորական և թե՛ աշխարհական գործակիցների եռանդուն աշխատասիրությունը, նրանց հավատարմությունն ու


նվիրվածությունը Մայր Աթոռ ս. Էջմիածնին՝ ի պայծառություն մեր սուրբ եկեղեցու:


Պատգամավորներն ու հյուրերն այցելեցին Մայր Աթոռի գրասենյակները՝ դիվանատուն, Միջեկեղեցական հարաբերությունների բաժին, խմբագրատուն, հոգևոր ճեմարան, վանական սեղանատուն, ֆինանսական-տնտեսական բաժիններ, շինարարական տեղամասեր, Մայր Աթոռի արհեստանոցներ, Մայր Աթոռի տպարան, և իրենց սրտագին գոհունակությունը հայտնեցին տիրող կարգ ու կանոնի, մաքրության, աշխատանքների կազմակերպվածության և կանոնավորության համար:

Այս սրբազան օրերին բովանդակ հայ ժողովրդի սրտագին մաղթանքն է, որ երկա՛ր ու երկա՛ր տարիներ մեր շինարար ու աստվածարյալ Հայոց Հայրապետի ձեռքում միշտ պայծառ ու ծաղկած մնա «զատազան իշխանութեան մերոյ Հայրապետիս, զի օրհնեցուք զքեզ, Տէր, այժմ և յաիտեան»:

ԱՐԹՈՒՆ ՀԱՏԻՏՅԱՆ  
ՊԱՐԳԵՎ ԸՆՀԱՍՋՅԱՆ

Մայր Աթոռ ս. Էջմիածին





1976 ԹՎԱԿԱՆԻՆ ՍՐԲԱԼՈՒՅՍ ՄԵՌՈՆԻ ՕՐՀՆՈՒԹՅԱՆ ԵՎ ՎԵՀԱՓԱՌ ՀԱՅՐԱՊԵՏԻ ԳԱՀԱԿԱԼՈՒԹՅԱՆ 20-ԱՄՅԱԿԻ ՀԱՆԴԻՍՈՒԹՅՈՒՆՆԵՐԻՆ ՄԱՍՆԱԿՑՈՂ ՊԱՏԳԱՄԱՎՈՐՆԵՐԻ ՑՈՒՑԱԿ

**Ա. Երուսաղեմի հայոց պատրիարքություն**

1. Ամենապատիվ տ. Եղիշե սրբազան պատրիարք
2. Տ. Ծախե սրբեպ. Աճեմյան
3. Տ. Կյուրեղ ծ. վրդ. Գաբիկյան
4. Կարպիս Հինոյան

**Բ. Կ. Պոլսի հայոց պատրիարքություն**

1. Ամենապատիվ տ. Ծնորհք սրբազան պատրիարք
2. Տ. Խաժակ վրդ. Պարսամյան
3. Տ. Վիգեն վրդ. Ալքազյան
4. Տ. Հարություն քհն. Հալաճյան
5. Ռուբեն Բառանֆիլ
6. Արամ Եսայան

**Գ. Արարատյան հայրապետական թեմ**

1. Տ. Կոմիտաս սրբեպ. Տեր-Ստեփանյան
2. Մուշեղ Աերոբյան
3. Գևորգ Համայան
4. Աերովբե Ծիրվանյան

5. Գուրգեն Մուրադյան
6. Զավեն Աղապյան

**Դ. Ծիրակի թեմ**

1. Տ. Նարեկ եպս. Ծաքարյան
2. Տ. Նորայր ավագ քհն. Սարգսյան
3. Տ. Վազգեն ավագ քհն. Գարագյոզյան
4. Կոստան Մալիյան
5. Մնացական Սարգսյան
6. Պերճուհի Էօճուրյան

**Ե. Վրահայոց թեմ**

1. Տ. Գևորգ եպս. Սերայդարյան
2. Վարանցով Հարությունյան
3. Տիկին Ռուզաննա Մելքունյան

**Զ. Աղբրեջանի թեմ**

1. Տ. Հուսիկ եպս. Սանթրոբյան
2. Տ. Վարդան սրդ. Դիլանյան
3. Հրանդ Պետրոսյան
4. Միքայել Մանվելյան

**Է. Ս. Գեղարդ վանքի վանահայրություն**

- 1. Ս. Վահան եպս. Տերյան
- 2. Ս. Թորգոմ վրդ. Մուշեղյան

**Ը. ԱՄՆ-ի հայոց արևելյան թեմ (ներսույալ Կանադա)**

- 1. Ս. Թորգոմ արքեպ. Մանուկյան
- 2. Ս. Արիս եպս. Ծիրվանյան
- 3. Ս. Զավեն ծ. վրդ. Արզումանյան
- 4. Ս. Եղիշե ծ. վրդ. Կիզիրյան
- 5. Ս. Փառեն ծ. վրդ. Ավետիքյան
- 6. Տեր և տիկին Արթին Գավուր

**Թ. ԱՄՆ-ի հայոց արևմտյան թեմ**

- 1. Ս. Վաչե արքեպ. Հովսեփյան
- 2. Տեր և տիկին Ծախե քհն. Ալթունյան

**Ժ. Հարավային Ամերիկայի հայոց թեմ Արգենտինա**

- 1. Ս. Բարգեն արքեպ. Ասյատյան
- 2. Ս. Հարություն ծ. վրդ. Մուշեղյան
- 3. Տեղաբնակ Մյուրեքյան
- 4. Տեր և տիկին Ռաֆֆի Խրապեղյան
- 5. Տեր և տիկին Նշան Զամիչյան
- 6. Տեր և տիկին Հովսեփ Յուսուֆյան
- 7. Տեր և տիկին Խորխե Մարկոսյան
- 8. Տեր և տիկին Հարություն Քեշիշյան
- 9. Լևոն Վարդապետյան

**Վենեսուելա**

- 1. Տեր և տիկին Ստեփան Ծաղիկյան

**Բրազիլիա**

- 1. Գառնիկ Պազարյան

**ԺԱ. Արևմտյան Եվրոպայի հայոց թեմ Փարիզ**

- 1. Ս. Սերոյվե արքեպ. Մանուկյան
- 2. Ս. Գյուտ եպս. Նազգաշյան
- 3. Նուրհան Ֆրենկյան
- 4. Բարգեն Տեր-Սարգիսյան
- 5. Արմին Բարսեղյան
- 6. Օմնիկ Բայրամյան
- 7. Ստեփան Տամյանյան
- 8. Տեր և տիկին Գևորգ-Ռոզա Պազըրճյան

**Լիոն**

- 1. Ավետիք Պենեքյան
- 2. Տեր և տիկին Ծիպրայի Պահատուրյան
- 3. Մեսրոպ Պալանտուրյան

**Վալանս**

- 1. Լևոն Տեր-Սարգիսյան

**Մարսել**

- 1. Ս. Հակոբ եպս. Վարդանյան
- 2. Տեր և տիկին Արծրուն Զրբաշյան

- 3. Տեր և տիկին դոկտ. Կարայիս Խազիսենյան
- 4. Հակոբ Փափազյան

**Միլան**

- 1. Ս. Ժիրայր վրդ. Թաշճյան
- 2. Զավեն Մանուկյան
- 3. Տեր և տիկին Մանուկ Էքմեքչյան

**Վիեննա**

- 1. Ս. Մեսրոպ ծ. վրդ. Գրիգորյան

**Անգլիա**

- 1. Ս. Ներսես եպս. Պոզապալյան
- 2. Գևորգ Թահոս
- 3. Տեր և տիկին Սարգիս-Աստղիկ Զյուրքճյան
- 4. Միսոն Ալեքսանյան
- 5. Արթին Գալաթյան
- 6. Տիկին Նազելի Ծախենտյան

**ԺԲ. Ռումինիա**

- 1. Ս. Տիրայր եպս. Մարտիկյան

**ԺԳ. Բուլղարիա**

- 1. Ս. Մեսրոպ քհն. Բենիկյան
- 2. Օմնիկ Ասլանյան
- 3. Օմնիկ Զյուրտյան

**ԺԴ. Հունաստան**

- 1. Տեր և տիկին Պարսամ Բետսեյան
- 2. Տեր և տիկին Ստեփան Ֆեսճյան
- 3. Տեր և տիկին Սարգիս Խաչատրյան
- 4. Տիկին Զարեղ Գալքաթյան

**ԺԵ. Եգիպտոսի հայոց թեմ**

- 1. Ս. Ներսես ծ. վրդ. Բապունյան
- 2. Վահան Զեքչենյան
- 3. Տեր և տիկին Վահան Ալեքսանյան

**ԺԶ. Դամասկոսի հայոց թեմ**

- 1. Ս. Ոսկան ծ. վրդ. Գալքալյան

**ԺԷ. Իրաքի հայոց թեմ**


- 1. Ս. Աստղիկ արքեպ. Ղազարյան
- 2. Արամ Մեթյան
- 3. Դոկտ. Հասարթ Միքայելյան

**ԺԸ. Հնդկաստանի հայոց թեմ (Կալկաթա)**

- 1. Ս. Հակոբ քհն. Գյուկչյան
- 2. Ադամս Ներսես Մկրտիչ
- 3. Կարո Մարտին

**ԺԹ. Ավստրալիայի և Նոր Զելանդիայի հայոց թեմ**

- 1. Ս. Գարեգին եպս. Գազանճյան
- 2. Տեր և տիկին Կոստան Տեր-Ստեփանյան



### ԵՊԻՍԿՈՊՈՍԱԿԱՆ ՁԵՌՆԱԴՐՈՒԹՅՈՒՆ ՄԱՅՐ ՏԱՃԱՐՈՒՄ

Սրբալույս մեռոնի օրհնության և Հայոց Հայրապետի գահակալության 20-ամյակին նվիրված հանդիսությունները Մայր Աթոռում եզրափակվեցին եպիսկոպոսական ձեռնադրությամբ:

Վեհափառ Հայրապետը հոկտեմբերի 17-ին, կիրակի օրը, Մայր տաճարում ս. պա-

տարագ է մատուցում և եպիսկոպոս ձեռնադրում Երուսաղեմի սրբոց Հակոբյանց միաբանության անդամներ տ. Կյուրեղ ծ. վրդ. Գաբիկյանին և տ. Դավիթ ծ. վրդ. Սահակյանին:

Ծաբաթ օրը, երեկոյան ժամերգությունից հետո, Մայր տաճարում կատարվում է նոր-



Մի պահ ձեռնադրությունից

ընծաների «ընտրություն և ուխտադրություն» ըստ սահմանի Հայց. եկեղեցւոյ:

Իջման ս. սեղանի առաջ նորընծաներն ուխտում են անխտոր և անսայթաք ընթացաւ հայ եկեղեցու ուղղափառ վարդապետութեան ճանապարհով ու հավատարիմ լինել սրբոյ Էջմիածնի մինչև ցվախճան կենաց իրեանց, կալ մնալ հլու հպատակութեամբ ի ներքոյ իշխանութեան և հրամանաց սրբոյ կաթողիկէ Մայր Աթոռոյս, ծառայել երկիրդի Տեառն, յօգուտ և ի փառս անուան սրբոյ Էջմիածնի:

շնորհում եպիսկոպոսական յոթ աստիճաններ: Խարտավիլակի պաշտոնը կատարում է տ. Կոմիտաս արքեպ. Տեր-Ստեփաննաւոր:

Ապա ս. պատարագը շարունակվում է Ավագ խորանի վրա, մինչև Ճաշոց գրքի ընթերցումը, որից հետո շարունակվում է ձեռնադրութեան կարգը:

Մայր տաճարի կամարների տակ հնչում է «Աստուածային և երկնատր շնորհ, որ միշտ լնու զպէտս սպասարորութեան առաքելական եկեղեցւոյ, կոչէ զԿիրեղ և զԴա-



Մի պահ ձեռնադրութեանից

Ապա, եպիսկոպոսացման երդումնագրի ընթերցումից հետո, նորընծաները ստորագրում են այն: Մայր տաճարի լուսարարապետ տ. Հուսիկ եպս. Սանթորյանն ու Ծիրակի թեմի առաջնորդ տ. Նարեկ եպիսկոպոս Ծաբարյանը վկայում են ուխտադրությունը:

Կիրակի օրը, ժամը 11-ին, Վեհափառ Հայրապետը Մայր տաճարի ս. Ստեփանոսի սեղանի առաջ, Իրեն արքեպեպոսակոսութեամբ և տ. Գևորգ եպիսկոպոսներին ու բազմած Հայրապետական Աթոռի վրա, սկսում է ձեռնադրութեան կարգը և աղոթքով ու օրհնութեամբ, ըստ ձեռնադրութեան Մաշտոցի հրահանգի,

իթ վարդապետունս ի քահանայութենէ յեպիսկոպոսութիւն» շարականը, մինչ նորընծաները ծնրադիր ու դէմքերը դարձրած դեպի հավատացյալները, հրաժարվում են աշխարհից:

Սույն կոչման շարականը կրկնվում է երեք անգամ: Ապա Վեհափառ Հայրապետը կատարում է օծման կարգը: Համապատասխան աղոթքներով ներընծաներին տրվում են եպիսկոպոսական գավազան և մատանի՝ ի նշան եկեղեցու իշխանավորի շնորհված հեղինակութեան:

Վեհափառ Հայրապետը համբուրում է նորաստեղծ արքայանքների ճակատները և, ներշնչված օրվա խորհրդով, Իր հայրական



պատգամներն ու հորդորներն է տալիս նրանց, շնորհավորում օրվա շնորհաբաշխությունը՝ շեշտելով եպիսկոպոսական իշխանության հոգևոր նշանակությունը եկեղեցու նվիրապետության մեջ ըստ առաքելական կանոնների և հայրապետահաստատ հրահանգների:


Ժամը 15-ին, ի պատիվ հայ եկեղեցու նորապսակ երկու իշխանավորների, տրվում է ճաշկերույթ, Վեհարանի սեղանատանը:


Վեհափառ Հայրապետը մի անգամ ևս շնորհավորում է նորապսակ տ. Կյուրեղ և տ. Դավիթ եպիսկոպոսներին՝ տալով նրանց եպիսկոպոսական պանակե, որպես եպիսկոպոսական իշխանության արտաքին նշան, և ցանկանում նրանց տեսնել հայ ե-

կեղեցու ու Մայր Աթոռի նվիրյալ և լավագույն ծառայողների շարքում:

Այնուհետև Հայոց Հայրապետին ողորած շնորհակալական և երախտագիտական որդիական ջերմ խոսք են ասում նորապսակ սրբազանները՝ վերանորոգելով իրենց ուխտը՝ աննահանջ սիրով և անմնացորդ նվիրումով ծառայելու Մայր Աթոռին, ս. Հակոբյանց վանքին, հայ եկեղեցուն ու հայ ժողովրդին, Հայոց Հայրապետի և տ. Եղիշե սրբազան պատրիարքի օրինակով, Նրանց անմիջական ղեկավարության և օրհնության ներքո:

Ընդունելությունն ավարտվում է Հայոց Հայրապետի «Պահպանիչ»-ով:





## ԳԵՐԱԾՆՈՐՀ Տ. ԿՅՈՒՐԵՂ ԵՊԻՍԿՈՊՈՍ ԳԱԲԻԿՅԱՆ

Ավագանի անունով Գեղամ: Ծնվել է 1921 թվականին Երուսաղեմում, սեբաստացի ծանոթ մտավորական-քանասեր Կարապետ-Ազնիվ Գաբիկյանների ընտանիքի հարկի տակ:

Իր նախնական կրթությունը ստացել է Երուսաղեմի հայոց սրբոց Թարգմանչաց վարժարանում, որի ընթացքն ավարտել է 1936 թվականին: Այնուհետև հետևել է Երուսաղեմի հայոց Ժառանգավորաց վարժարանի և ընծայարանի եռամյա դասընթացներին:

1950 թվականին սարկավագ է ձեռնադրվել, 1951-ին՝ կուսակրոն քահանա՝ վերանվանվելով տ. Կյուրեղ արեղա: 1954-ին ստացել է վարդապետական աստիճան:

1952 թվականին նշանակվել է սրբոց Թարգմանչաց վարժարանի տեսուչ և ուսուցիչ, պաշտոն, որը վարում է մինչև այսօր մեծ արդյունավորությամբ ու բարեխղճությամբ:

Թարգմանչաց վարժարանը նրա տեսչության օրով և նրա անդույ ջանքերի շնորհիվ դարձավ տիպար ու օրինակելի, ինքնաբավ հայկական երկրորդական վարժարան:

Բացի կրթական գործից, տ. Կյուրեղ վարդապետը կատարել է շնորհակալ ու պատասխանատու աշխատանքներ սրբոց Հակոբյանց վանքում՝ որպես լուսահան, վերահսկիչ սուրբ Տեղյաց և սուրբ Հարության տաճարի վերանորոգությանց, ս. Աթոռի Ավիրակ Հարավային և Հյուսիսային Ամերիկաներում, Տնօրեն ժողովի և սուրբ Աթոռի գանձատան հանձնաժողովի անդամ:

1967 թվականին Մայր Աթոռում ստացել է ծայրագույն վարդապետական աստիճան՝ Վեհափառ Հայրապետի շնորհաբաշխու-

թյամբ:


1976 թվականի սեպտեմբերի 25-ից հոկտեմբերի 5-ը, որպես Երուսաղեմի հայոց պատրիարքության պատգամավոր, մաս-



նակցել է ս. Էջմիածնում սրբալույս մեռոնի օրհնության և Վեհափառ Հայրապետի գահակալության 20-ամյակին Ավիրված հանդիսություններին:

Հոկտեմբերի 17-ին, կիրակի օրը, ձեռնադրվել է եպիսկոպոս՝ ձեռամբ Հայոց Հայրապետի:





## ԳԵՐԱՇՆՈՐՀ Տ. ԴԱՎԻԹ ԵՊԻՍԿՈՊՈՍ ՍԱՀԱԿՅԱՆ

Ավագանի անունով Գրիգոր: Ծնվել է 1935 թվականին Երուսաղեմում, սեբաստացի հավատավոր ընտանիքի հարկի տակ:

Նախնական կրթությունը ստացել է տեղի հայոց ս. Թարգմանչաց վարժարանում: 1943—1951 թվականներին սովորել է Երուսաղեմի Terra Santa վարժարանում և այնտեղ էլ ստացել իր միջնակարգ կրթությունը:



1951 թվականին ընդունվել է Երուսաղեմի հայոց սրբոց Հակոբյանց վանքի Ժառանգավորաց վարժարան, որի դասարանական բաժինն ավարտել է 1954-ին:

Նույն թվականին սարկավագ է ձեռնադրվել տ. Եղիշե արքեպ. Տերտերյանի կողմից: Իր ուսումը շարունակել է ընծայարանում 1954—1957 թվականներին և կուսակրոն քահանա է ձեռնարդվել 1957 թվականին՝ ձեռամբ տ. Տիրան արքեպ.

Ներսյանի՝ վերանվանվելով տ. Դավիթ արքեպ:

1957—1960 թվականներին նշանակվել է տեսուչ Կյուլպենկյան մատենադարանի և վանքի տպարանի, միաժամանակ ուսուցչական պաշտոն վարելով Ժառանգավորաց և Թարգմանչաց վարժարաններում:

Եղել է անդամ Տնօրեն ժողովի: 1960 թվականին նշանակվել է հոգևոր հովիվ Ամմասի և շրջակայքի հայոց և տեսուչ տեղի Հեթումյան վարժարանի:

1960 թվականին վարդապետական աստիճան է ստացել տ. Եղիշե պատրիարքից: 1961—1962 թվականներին եղել է հոգևոր հովիվ հարդադի հայոց և մեկ տարի էլ վարել՝ Կալկաթայի հայոց այցելու հովվի պաշտոն:

1963—1973 թվականներին պաշտոնավարել է Լիոն քաղաքում՝ որպես քաղաքի և շրջակայքի հովիվ: 1965 թվականին Մայր Աթոռում ստացել է ծայրագույն վարդապետական աստիճան ձեռամբ Վեհապետ Հայրապետի:


1973—1976 թվականներին պաշտոնավարել է որպես հոգևոր հովիվ Ծվնցարիայի հայոց:

1976-ի հուլիսից նշանակվել է Լիոնի և շրջակայքի հայոց հոգևոր հովիվ և հայրապետական պատվիրակի փոխանորդ:

1976 թվականի հոկտեմբերի 17-ին եպիսկոպոս է ձեռնադրվել Մայր Աթոռում Հայոց Հայրապետի շնորհաբաշխությամբ:

«Էջմիածին» ամսագրի խմբագրությունը ջերմորեն շնորհավորում է հայ եկեղեցու նորապսակ իշխանավորներին՝ տ. Կյուրեղ և տ. Դավիթ եպիսկոպոսներին՝ մաղթելով, որ նրանք հետապնդեն ևս անմնացորդ նվիրումով ծառայեն Հայոց Հայրապետի օրհնությանն աներո՝ ի պայծառություն Մայր Աթոռ ս. Էջմիածնի, ս. Հակոբյանց առաքելական Աթոռի, Հայաստանյայց եկեղեցու և ի մխիթարություն հայ հավատացյալ ժողովրդի՝ արդարացնելով իրենց վրա դրված Ամենայն Հայոց Հայրապետի և ամենապատիվ տ. Եղիշե արքայան պատրիարքի հույսերը:





**«ԿՐՈՆԱԿԱՆ ԳՈՐԾԻՉՆԵՐԸ ՀԱՆՈՒՆ ԿԱՅՈՒՆ  
ԽԱՂԱՂՈՒԹՅԱՆ, ԶԻՆԱԹԱՓՄԱՆ ԵՎ ԺՈՂՈՎՈՒՐԴՆԵՐԻ  
ՄԻՋԵՎ ԱՐԴԱՐ ՀԱՐԱԲԵՐՈՒԹՅՈՒՆՆԵՐԻ» ՀԱՍՏԱՏՄԱՆ  
ԹԵՄԱՅՈՎ ՀԱՄԱԾԽԱՐՀԱՅԻՆ ԿՈՆՖԵՐԱՆՍԻ  
ՆԱԽԱՊԱՏՐԱՍՏԱԿԱՆ ԿՈՄԻՏԵԻ ԱԾԽԱՏԱՆՔՆԵՐԸ  
ՄՈՍԿՎԱՅՈՒՄ**

Սույն թվականի սեպտեմբերի 28-ից 30-ը Մոսկվայում տեղի ունեցավ «Կրոնական գործիչները հանուն կայուն խաղաղության, զինաթափման և ժողովուրդների միջև արդար հարաբերությունների» հաստատման թեմայով համաշխարհային կոնֆերանսի նախապատրաստական աշխատանքների երկրորդ փուլի նստաշրջանը:

Հայաստանյայց առաքելական եկեղեցու կողմից այդ աշխատանքներին մասնակցեց ս. Էջմիածնի հոգևոր ճեմարանի փոխ-տեսուչ տ. Անանիա վարդապետ Արարաջյանը:

Կոնֆերանսի նախապատրաստական կոմիտեի նիստերին իրենց մասնակցությունը բերեցին աշխարհի տարբեր ծայրերից եկած շուրջ 50 պատվիրակներ:

Կոմիտեն, որի նախագահն է ռուս պրավոսլավ եկեղեցու ներկայացուցիչ, նրա արտաքին հարաբերությունների բաժնի վարիչ Յուվենալի միտրոպոլիտը, հատուկ խմբերի բաժանեց այն հրատապ խնդիրները, որոնք պետք է դառնան գալիք կոնֆերանսի զբլխավոր հարցերը: Այդ խմբերն են.

ա) Խաղաղության գործի համար միջկրոնական համագործակցության հիմքերը.

բ) Միջազգային լարվածության թուլացում.

գ) հակամարտությունների և անհասկացողությունների բնագավառներ.

դ) ՄԱԿ-ի և նրա հաստատությունների դերը խաղաղության հաստատման գործում.

ե) Զինաթափման խնդիրներ.

զ) Կրոնական մոտեցում մարդկային անձնավորությունը.

է) Մարդու իրավունքները.

ը) Ժողովուրդների տեղաբաշխման, գաղթի և շրջապատող միջավայրի խնդիրներ:

Ժողովի մասնակիցներն ուրախությամբ ընդունեցին այն լուրը, որ որոշ եկեղեցիների հոգևոր պետեր, ելնելով խաղաղության պահպանման և ամրապնդման ցանկությունից, իրենց վրա են վերցրել առաջիկա կոնֆերանսի կազմակերպման և անցկացման պատասխանատվությունը՝ որպես անդամներ նրա պատվավոր նախագահության:



Պատվավոր նախագահության անդամ է նաև Ամենայն Հայոց Հայրապետը:

Կոմիտեն որոշեց 1977 թվականի մարտի 15-ից 17-ը Մոսկվայում անցկացնել նախապատրաստական կոմիտեի հաջորդ վերջին նստաշրջանը: Իսկ Խաղաղության համաշխարհային կոնֆերանսը կգումարվի դարձյալ Մոսկվայում, նույն թվականի հունիսի 6-ից 10-ը:

Նիստերի ավարտից հետո «Ուկրաինա» հյուրանոցի մեծ դահլիճում տեղի ունեցավ հարցազրույց կոմիտեի նիստերի մասնակից պատվիրակների և միութենական ու օտարերկրյա թղթակիցների միջև:

Հարցազրույցից հետո Մոսկվայի և համայն Ռուսիո Նորին Սրբություն Պիմեն Պատրիարքի կողմից ժողովի մասնակիցների պատվին տրվեց ճաշկերույթ:

ԱՆԱՆԻԱ ՎԱՐԴԱՊԵՏ ԱՐԱԲԱԶՅԱՆ



Հ. Ս. ԱՆԱՍՅԱՆ

**ՄԻ ՆՈՐԱՀԱՅՏ ՄԵՌՈՆԵՐԳՈՒԹՅՈՒՆ ԵՎ Ա  
(Թովմաս Ագուլեցու անտիպ տաղերից)**

1969 թվականին, Էջմիածնի Մայր Աթո-  
նում տեղի ունեցած մեծագույնների առթիվ,  
մենք հրատարակել էինք ԺԸ դարի առաջին  
կեսի տաղերգու Թովմաս Ագուլեցու մի եր-  
կարաշունչ բանաստեղծությունը՝ «Բան ու-  
նաչափ վասն սրբալոյս մեռոնի», հանելով  
Երևանի պետական Մատենադարանի № 25  
ձեռագրից<sup>1</sup>: Հեղինակի այս գործը ուներ և  
իր հիշատակարանը, որի համաձայն շարա-  
դրված էր 1729 թվականին, հետևաբար՝  
Կարապետ Ուլնեցու կաթողիկոսության օ-  
րով կատարված մեռոնների առթիվ:

Մեր այդ հրատարակությունից հետո Նո-  
րայր եպս. Պողարյանի ցուցակի միջոցով  
իրագել էինք դարձել, որ Երուսաղեմի №  
536 ձեռագիրը պարունակում է Թովմաս  
Ագուլեցու գրչին պատկանող մի շարք ան-  
տիպ ուրիշ գործեր, որոնց թվում մեռոնին  
նվիրված մի այլ գովերգություն՝ «Տաղ ի  
վերայ սրբալոյս մեռոնի»<sup>2</sup>: Ուստի, հետա-  
մուտ լինելով հավաքելու Թովմաս Ագուլեցու  
բոլոր տաղերը, վերջերս դիմել էինք Թահե  
արքեպ. Աննայանին, որը Երուսաղեմից սի-  
րահոժար կերպով մեզ ուղարկեց № 536 ձե-

նագրի այդ նյութերի լուսապատճենները, և  
դրանով այսօր հնարավորություն ունենք  
հրատարակության հանձնելու հեղինակի  
այս նորահայտ մեռոններգությունը ևս՝ Էջ-  
միածնում տեղի ունեցող նոր մեռոնների  
քի (1976 թ. սեպտ. 26) առթիվ:

Ձեռագրում ոչ մի տվյալ չկա այն մասին,  
թե հեղինակը ո՞ր թվականին է գրել իր այս  
տաղը:

Բնագիրը հրատարակում ենք նույնու-  
թյամբ, ինչպես որ է ձեռագրում: Որպես  
գրչական վրեպ՝ ուղղել ենք միայն մեկ  
բառ. գուդ-ը դարձրել ենք գուտ (տուն 11,  
տող 3). իսկ երկու բառ վերականգնել ենք՝  
բաց թողնված տառի լրացմամբ. կամեալ-  
կա[զ]մեալ (տուն 1, տող 1) և ձանի  
ձա[յ]նի (տուն 7, տող 3): Մեկ բառ հա-  
մարում ենք անձանոթ. ծալեցեալ (տուն  
8, տող 3): Անձանոթի կերպարանք ունի  
ևս քոց բառը, որ գտնվում է հետևյալ  
նախադասության մեջ.

**Քոց կամակի յօրինակի ընթացեալ** (տուն  
6, տող 3):

Բայց գտնում ենք, որ քոց-ը անձանոթ  
բառ չէ, այլ պարզապես քո ստացական  
դերանվան հոգնակի տրականն է՝ «քոնե-  
րին» (քո [հավատացյալ]ներին), արևմտյան  
հայերենով՝ «քուկիններուդ»: Դա հասկա-  
նալի է դառնում հաջորդող բառերի լուսա-  
բանմամբ: Կամակ նշանակում է «ախոր-  
ժելի իր», «հիվանդի սրտի ուզած ուտելի-

<sup>1</sup> Հ. Ս. Անասյան, Թովմաս Ագուլեցին և նրա մե-  
ռոններգությունը, «Էջմիածին» (ամս.), 1969, № 6  
և № 8-ԺԱ:

<sup>2</sup> Նորայր եպս. Պողարյան, Մայր ցուցակ ձեռա-  
գրաց Սրբոց Յակոբեանց, հտ. Բ, Երուսաղեմ, 1967,  
էջ 553—554:

քր»<sup>3</sup>. օրինակ նշանակում է «նմանություն»<sup>4</sup> և ըստ այսմ՝ յօրինակի նշանակում է «ըստ նմանության», «որպես». իսկ ընթացեալ՝ «տարվելով-բաշխվելով»: Ուրեմն՝ նախադասության թարգմանությունը կլինի այսպես. «Որպես կամակ՝ տարվելով-բաշխվելով քո [հավատացյալ]ներին...»:

Հեղինակը մի քանի տեղ բացատրական հոլովի ի նախդիրը կրճատել է՝ հարմարվելու համար տաղաչափության պահանջներին. չարեաց, վերին շնորհաց, հրեշտակաց և քէն փխ. ի չարեաց, ի վերին շնորհաց, ի հրեշտակաց և ի քէն (տուն 2, տող 3. տուն 8, տող 1 և 2. տուն 10, տող 4):

**ՏԱՂ Ի ՎԵՐԱՅ ՍՐԲԱԼՈՅՍ ՄԵՌՈՆԻՆ Ի ՆՈՅՆ ԹՈՎՄԱՍ ՏԱՌԱՊԵՆԱԼ ՔԱՀԱՆԱՅԷ (Ձեռ. № 536)**

1. Թագ լուսեղէն կա[զ]մեալ հրեղէն հրաշացեալ, Երևանոյ տղայոց պատճառ շնորհաց սուրբ մտոն. Իւր միտեղէն բան յանեղէն սքանչացեալ, Հիմըն Հայոց հեղեալ լերկնից սուրբ մտոն:

2. Որակդ է իւր ծառ բազմաճիւղ բարձրացեալ, Դեղ ներգործող մեղաց սըրբող քաղցրացեալ, Դիւաց վանող չարեաց փըրկող գորացեալ, Մարդկանց ծընող շնորհաց բաշխող սուրբ մտոն:

3. Վիրաց դու դեղ զարմանազեղ զանձ բացեալ, Զէնըդ գորեղ մանկանց նորեղ սանձ կացեալ,

<sup>3</sup> Հմմտ. «Նոր բառգիրք հայկազեան լեզուի», հտ. Ա, Վեներտիկ, 1836, էջ 1039: Սահակ վրդ. Ամատուցի, Հայոց բառ ու բան, Վաղարշապատ, 1912, էջ 326: Հր. Աճառչան, Հայերէն գաւտական բառարան (Լեմինյան ազգագրական ժողովածու, հտ. Թ), Թիֆլիս, 1913, էջ 542:

<sup>4</sup> «Նոր բառգիրք հայկազեան լեզուի», հտ. Բ, Վեներտիկ, 1837, էջ 1034:

Իբր ըզկանթեղ մեզ լուսազեղ կազմեցեալ, Դայծառ բիրեղ շնորհօք համեղ սուրբ մտոն:

4. Մայր ամենից քրիստոնէից ծանուցեալ, Թիկունք վեհից թագ արքայից կացուցեալ, Ծաղկանց մեծից շնորհօք լերկնից մածուցեալ, Տեառն բոլորից դու կամակից սուրբ մտոն:

5. Այս անըման զըմուռ շուշան գերացեալ, Խունկ պալասան հրիկ պատուական գորացեալ, Կիճամոնն այն ընդ հալուէին եռացեալ, Իւր սըրբազան կենաց մարդկան սուրբ մտոն:

6. Սէր յոգնակի կեանք բազմակի քեւ լըցեալ, Անմահ այգի դրախտ յայտնակի դու բացեալ, Քոց կամակի յօրինակի ընթացեալ, Առնուք հանդէս յաղթանակի սուրբ մտոն:

7. Իւծման կերպի աճման ոճի լիացեալ, Հոգւոյն շնորհի կենաց բանի միացեալ, Վերնոց ձա[ն]նի երգարանի հիացեալ, Դու իւր ազնի Տեառն պատի սուրբ մտոն:

8. Ռախճան կենաց վերին շնորհաց փայլեցեալ, Եւ հրեշտակաց հրեղէն գորաց մայլեցեալ, Անհուն բարեաց հրաշագործաց ծալլեցեալ, Վանիչ դիւաց հալիչ մեղաց սուրբ մտոն:

9. Իբր ըզճագունք մատաղ մանկունք ծընեցեալ, Անգին ակունք հօրն որդեկունք զըրեցեալ, Արք հըմտագունք սուրբք իմաստունք քեւ լըցեալ, Ամենեցունց բոլոր թիկունք սուրբ մտոն:

10. Յաւոց հընար յոյժ օգտակար յայտնեցեալ, Որք են տըկար քեւ առնուն կար գորացեալ, Որք զան յօժար խորհըրդաբար օծեցեալ, Առնուն քէն ճար լինին արդար սուրբ մտոն:

11. Էին անմիտ հոգւոյն հրանիտ դու կեցեալ, Ըզմիտք մեր բութ լեսանի քոյդ սըրեցեալ, Ընդ ծաղկանց միտ շնորհք սուրբ եւ գուտ  
նըմլեցեալ,  
Առ Թովմայս փուտ շարժեալ ի գութ սուրբ մտոն:





## ՄԱՅՐ ԱԹՈՒՈՒՄ

ԵԿԵՂԵՑԱԿԱՆ ԲԵՄ. ԼՈՒՐԵՐ

**Հոկտեմբերի 8-ին, կիրակի.**—Այսօր Մայր տաճարում ս. պատարագ է մատուցում Անգլիայի հայրապետական պատվիրակ ու Լոնդոնի հայոց հոգևոր տեսուչ տ. Ներսես եպս. Պոզապայանը և քարոզում «Ապաի-նեցաք ի խաչ քո» շարականի բնաբանով, վեր հանելով խաչի խորհրդի կարևորու-թյունը մեղավորի փրկագործության ճանա-պարհի վրա:

\* \* \*

**Հոկտեմբերի 9-ին, շաբաթ.**—Սրբոց Թարգմանչաց վարդապետացն մերոց՝ Մես-րոպայ, Եղիշեի, Մովսիսի Կերթողի, Դա-թի Անչաղոս փիլիսոփային, Գրիգորի Նա-րեկացուն և Ներսիսի Կլայեցուն:

Այսօր Օշականի ս. Մեսրոպ Մաշտոց ե-կեղեցում ս. պատարագ է մատուցում ուխ-տավորաբար Մայր Աթոռում գտնվող տ. Կյուրեղ ծ. վրդ. Գաբիկյանը և քարոզում «Մի երկնչիր հօտ փոքրիկ» (Ղուկ. ԺԲ 32) բնաբանով:

Ս. պատարագին ներկա են լինում Մայր Աթոռի միաբանությունն ու սարկավագաց դասը՝ լուսարարապետ տ. Հուսիկ եպիսկո-պոսի գլխավորությամբ:

Հավարտ ս. պատարագի կատարվում է հոգեհանգիստ հայ մշակույթի հին և նոր վաստակավորների հիշատակին:

\* \* \*

**Հոկտեմբերի 10-ին, կիրակի.**—Այսօր Մայր տաճարում ս. պատարագ է մատու-ցում Ռումիհիայի և Բուդղարիայի հայոց միացյալ թեմերի առաջնորդ տ. Տիրայր եպս. Մարտիկյանն ու քարոզում «Ժողովուր-դի մը գիտակցությունը իր նշանագրերուն մեջ կկայանա» Ֆրանց Վերֆելի խոսքի բնաբանով:

Հավարտ ս. պատարագի, Վեհափառ Հայրապետի նախագահությամբ, կատար-վում է հոգեհանգիստ՝ ի հիշատակ 1915 թ. Հաճնի հերոսամարտի զոհվածների:

Այսօր լրանում է նաև վեհամայր Սիրա-նուշ Պալճյանի մահվան երկրորդ տարե-լիցը: Այս առթիվ ևս կատարվում է հոգե-հանգստյան պաշտոն:

\* \* \*

**Նույն օրը, ս. պատարագից հետո, կա-տարվեց քացունը Վեհարանի այգում Վե-համոր հիշատակին կանգնեցված աղքատ-հուշարձանի, որն ունի հետևյալ արձանա-գրությունը. «Ի ՅԻԾԱՏԱԿ ՎԵՀԱՄԱՅՐ ՍԻ-ՐԱՆՈՅԾ ՊԱԼՃԵԱՆԻ 1884—1974, ՊԵՅ-ՐՈՒԹԻ ԿՐՕՆԱՍԷՐ ՏԻԿՆԱՆՑ ԿՈՂ-ՄԻՑ»:**

\* \* \*

**Հոկտեմբերի 18-ին, երկուշաբթի.**—Այսօր Վեհափառ Հայրապետին են այցելում ե-թովպացի մի խումբ զրոսաշրջիկներ և ա-ջահամբույրով ստանում Նորին Սրբության օրհնանքը:

\* \* \*

**Նույն օրը, երեկոյան ժամը 20.30-ին, հոգևոր ճեմարանի հանդիսությունների սրահում Երուսաղեմի սրբոց Հակոբյանց վանքի մասին բանախոսում է տ. Կյուրեղ եպս. Գաբիկյանը և մոզական լապտերով ցուցադրում Երուսաղեմի հայոց պատմա-կան սրբավայրերի նկարները, ինչպես նաև հայոց վանքում պահվող ձեռագրերի և ե-կեղեցական արվեստի ընտիր նմուշներ:**

**Հոկտեմբերի 20-ին, չորեքշաբթի.**—Այսօր, երեկոյան ժամը 20.30-ին, հոգևոր Ընկերության հանդիսությունների դահլիճում, տ. Դավիթ եպս. Սահակյանը բանախոսում է «Եկեղեցին այսօրվա աշխարհին մեջ» թեմայի շուրջ: Վերջում սրբազան հայրը խոսում է նաև Հայաստանյայց եկեղեցու մասին՝ ծանրանալով միաժամանակ Ֆրանսիայում և Եվրոպայում գտնվող հայ եկեղեցիների գործունեության վրա:

**Հոկտեմբերի 21-ին, հինգշաբթի.**—Այսօր, երեկոյան ժամը 19-ին, Վեհաբանում, Վեհափառ Հայրապետի նախագահությամբ, գումարվում է Մայր Աթոռին առընթեր Իրավագիտական հանձնաժողովի հերթական նիստը:

**Հոկտեմբերի 24-ին, կիրակի.**—Այսօր Մայր տաճարում ս. պատարագ է մատուցում Նոր Նախիջևանի և Ռուսաստանի հայոց թեմի առաջնորդական փոխանորդ տ. Տիրան վրդ. Կյուրեղյանը:

**Հոկտեմբերի 31-ին, կիրակի.**—Այսօր Մայր տաճարում ս. պատարագ է մատուցում տ. Անանիա վրդ. Արաբաջյանը և քարոզում «Եւ ծանցուք... եւ եկեացէ մեզ իբրեւ զանձրեւ կանուխ և զանագան յերկրի» (Ովսէէ 2 3) բնաբանով:

**Նոյեմբերի 2-ին, երեքշաբթի.**—Այսօր, երեկոյան ժամը 19-ին, Երևանի հայրապետական վիլլայում, Վեհափառ Հայրապետի նախագահությամբ, գումարվում է Գերագույն հոգևոր խորհրդի հերթական նիստը:

Սույն ժողովին, Վեհափառ Հայրապետի կարգադրությամբ, ներկա է լինում նաև Արևմտյան Գերմանիայի հոգևոր հովիվ և Մայր Աթոռի երիտասարդ միաբան տ. Գարեգին արք. Ներսիսյանը, որն ուխտավորաբար գտնվում էր Մայր Աթոռում:

Արևմտյան Գերմանիան մտնում է Արևմտյան Եվրոպայի հայրապետական պատվիրակության հոգևոր իրավասության ներքո:

Տ. Գարեգին արքեպիսկոպոստը հաստատեց ժողովի հանգամանորեն զեկուցում է Արևմտյան

Գերմանիայի ինը քաղաքների, այդ թվում՝ մանսֆելդի, Քյոլնի, Մյունխենի, Բեռլինի, Համբուրգի, Ան-Մայնի Ֆրանկֆուրտի հայ համայնքների գործունեության մասին: Այսօր Արևմտյան Գերմանիայի ինը քաղաքներում ապրում է շուրջ յոթ հազար հայություն:

Գերագույն հոգևոր խորհուրդն իր գոհունակությունն է արձանագրում տ. Գարեգին արք. Ներսիսյանի այս առթիվ տված զեկուցման համար:

**Նոյեմբերի 7-ին, կիրակի.**—Այսօր Մայր տաճարում ս. պատարագ է մատուցում տ. Գարեգին արք. Ներսիսյանը և քարոզում «Հաւատք քո կեցուցին զքեզ» (Մարկոս Ժ 52) բնաբանով:

**Նոյեմբերի 14-ին, կիրակի.**—Այսօր, առավոտյան ժամը 11-ին, Մայր տաճարում ս. պատարագ մատուցեց և 1975 թվականի հոգևոր Ընկերության շրջանավարտ Հակոբ սրկ. Գլընճյանին կուսակրոն քահանա ձեռնադրեց լուսարարապետ տ. Հուսիկ եպս. Սանթրոյանը:

Ժաքաթ օրը, երեկոյան ժամերգությունից հետո, տեղի ունեցավ նորընծայի կոչման արարողությունը և ուղղափառ դավանության հրապարակային քննությունը:

Կիրակի օրը, ս. պատարագի ընթացքում, կատարվեց նորընծայի ձեռնադրության և կոչման, իսկ երեկոյան՝ վեղարի տվչության կարգը:

Ժամը 15-ին Վեհաբանի սեղանատանը Վեհափառ Հայրապետը քարեհանում է Իրեն սեղանակից դարձնել Մայր Աթոռի միաբանությանը և Գերագույն հոգևոր խորհրդի անդամներին:

Այդ օրը լրանում էր նաև տ. Հուսիկ եպս. Սանթրոյանի և տ. Մամբրե վրդ. Մարգարյանի քահանայական ձեռնադրության 20-ամյակը: Այս ուրախ առիթով Վեհափառ Հայրապետը ջերմորեն շնորհակալորում է Մայր տաճարի լուսարարապետ տ. Հուսիկ եպիսկոպոսի և փոխ-լուսարարապետ տ. Մամբրե վարդապետի քահանայական ձեռնադրության տարեդարձը և նրանց մաշտոյան քաջատոջությունն ու, Իր քարձր ուշադրությանն արժանացնելով նրանց աթոռանվեր գործունեությունը, տ. Հուսիկ եպիսկոպոսին նվիրում է եպիսկոպոսական մի թանկագին մատանի, իսկ տ. Մամբրե վարդապետին՝ ոսկյա մի ժամացույց:



Տ. Հուսիկ եպիսկոպոսը Վեհափառ Հայրապետին ուղղյալ որդիական շնորհակալական և երախտագիտական ջերմ խոսք է ասում՝ իր և տ. Մամբրե վարդապետի կողմից:

առարկաների ուսուցմանը, դասախոսություն է կարդում «Միստիկականությունը եկեղեցու կյանքում» թեմայով:  
Դասախոսությանը ներկա է լինում նաև Վեհափառ Հայրապետը:



Մի պահ ձեռնադրությունից

Վեհափառ Հայրապետը շնորհավորում է նաև նորապսակ տ. Հակոբ կուսակրոն քահանայի ձեռնադրությունը և մաղթում, որ նա Տիրոջ Այգում լինի արժանավոր սպասավոր, «մշակ առանց ամօթոյ»:

Տ. Հակոբ քին. Գրլընճյանը ևս հանդես է գալիս իր հոգևոր Հոր և Պետին ուղղյալ որդիական երախտագիտական ու շնորհակալական ջերմ խոսքով:

\*  
\*  
\*

Նոյեմբերի 17-ին, չորեքշաբթի.—Այսօր, երեկոյան ժամը 20-ին, Վեհաբանում տեղի է ունենում միաբանական հերթական հավաքույթ, որտեղ Նյու-Յորքից Մայր Աթոռ ժամանած բարեշնորհ Վազգեն սրկ. Ասատըրյանը, որը հետևում է հոգևոր ճեմարանում հայագիտական և հայրենագիտական

Նոյեմբերի 19-ին, ուրբաթ.—Այսօր, երեկոյան ժամը 19-ին, Երևանի հայրապետական վիլլայում, Վեհափառ Հայրապետի նախագահությամբ, գումարվում է Գերագույն հոգևոր խորհրդի հերթական նիստը:


\*  
\*  
\*

Նոյեմբերի 21-ին, կիրակի.—Ընծայումն ս. Աստուածածնի. Բարեկենդան յիսնակի պահոց.

Այսօր Մայր տաճարում ս. պատարագ է մատուցում տ. Մոսիկ վրդ. Սարգսյանը և քարոզում «Երանի ամենեցուն, ոչ երկնչին ի Տեառնէ եւ գևան ի ճանապարհս նորս» (Սաղմ. ԾԻԾ) բնաբանով:

Ս. Պատարագին ներկա է լինում նաև Վեհափառ Հայրապետը:





## Տ. ՀԱԿՈՒ ԱՐԵՂԱ ԳԸԼԸՆԾՅԱՆ

Ավագանի անունով նույնպես Հակոբ: Ծնվել է 1955 թվականին Քեսապ (Սիրիա) քաղաքում: Սովորել է տեղի Ուսումնասիրաց միացյալ վարժարանում: 1968—1972 թվականներին սովորել է Անթիլիասի դպրեվանքում: 1973 թվականին ընդունվել է Էջմիածնի հոգևոր ճեմարան, որի լսարանական բաժինն ավարտել է 1975 թվականին՝ փայլուն հաջողությամբ: Ավարտաճանի թեման է եղել «Եկեղեցական կանոններն ու պաշտամունքը», որը պաշտպանել է 1976 թվականի մայիսին «գերազանց» գնահատականով:

1974 թվականի դեկտեմբերին սարկավագ է ձեռնադրվել տ. Հուսիկ եպս. Սանթորյանի ձեռամբ և դարձել Մայր Աթոռ ս. Էջմիածնի միաբան:


1975 թվականից սկսած աշխատում է «Էջմիածին» ամսագրի խմբագրությունում որպես քարտուղար:

1976 թվականի նոյեմբերի 14-ին, կիրակի օրը, Հակոբ արկ. Գըրընճյանը կուսակրոն քահանա ձեռնադրվեց Մայր տաճարում՝ ձեռամբ լուսարարապետ տ. Հուսիկ եպս. Սանթորյանի:

«Էջմիածին» ամսագրի խմբագրությունը ջերմորեն շնորհավորում է նորընծա տ. Հակոբ արք. Գըրընճյանին և նրան մաղթում հաջողություն՝ իր ընտրած և սիրած հոգևոր

ասպարեզի ծառայության մեջ՝ ի մխիթարություն վեհափառ Հայրապետի:





ԲՈՎԱՆ ԴԱԿՈՒԹՅՈՒՆ

Վեհափառ Հայրապետի խոսքը Վեհարանում՝ Իր գահակալության քսանամյակին նվիրված հանդիսավոր նիստի ժամանակ . . . . .	8
ՀՍՄԸ Միմիստրների սովետին առընթեր հայ եկեղեցու գործերի խորհրդի նախագահ պրն. Սարգիս Գասպարյանի ողջույնի խոսքը . . . . .	9
ՍՍՀՄ Միմիստրների սովետին առընթեր կրոնների գործերի խորհրդի նախագահ պրն. Վլադիմիր Կուրոլեռովի շնորհավորական հեռագիրը . . . . .	11
Գերագույն հոգևոր խորհրդի զեկուցագիրը Վեհափառ Հայրապետի քսանամյա գոր- ծունեության մասին . . . . .	12
Հաղորդագրություն . . . . .	27
ԱՐԹՈՒՆ ՀԱՏԻՏՅԱՆ	
ՊԱՐԳԵՎ ԾԱՀԱՍԶՅԱՆ	
Հանդիսություններ Մայր Աթոռում՝ արքայույս մեռնի օրհնության և Վեհա- փառ Հայրապետի գահակալության քսանամյակի առիթով . . . . .	31
Օրհնություն արքայույս մեռնի . . . . .	38
Հոբելյանական հանդիսավոր նիստ . . . . .	47
Պաշտոնական ընդունելություն . . . . .	75
Այց Ծիծեռնակաբերդի Հայ մահատակաց հուշարձան . . . . .	81
Հոբելյանական խաչքարի բացում Վեհարանի բակում . . . . .	84
Եպիսկոպոսաց խորհրդակցական ժողովի գումարում Մայր Աթոռում . . . . .	88
Երևանի ս. Սարգիս վերակառուցված սուաջնորդանիստ եկեղեցու նավակա- տիքն ու օծումը . . . . .	89
1976 թվականին արքայույս մեռնի օրհնության և Վեհափառ Հայրապետի գահա- կալության 20-ամյակի հանդիսություններին մասնակցող պատգամավորների ցուցակ . . . . .	98
Եպիսկոպոսական ձեռնադրություն Մայր տաճարում . . . . .	100
Գերաշնորհ տ. Կյուրեղ եպիսկոպոս Գաբրիելյան . . . . .	103
Գերաշնորհ տ. Դավիթ եպիսկոպոս Սահակյան . . . . .	104
ԱՆԱՆԻԱ ՎԱՐԴԱՊԵՏ ԱՐԱԲԱԶՅԱՆ—«Կրոնական գործիչները համուն կայուն խաղաղության, զինաթափման և ժողովուրդների միջև արդար հարաբերու- թյունների» հաստատման թեմայով համաշխարհային կոնֆերանսի նախապատ- րաստական կոմիտեի աշխատանքները Մոսկվայում . . . . .	105
Հ. Ս. ԱՆԱՍՅԱՆ—Մի նորահայտ մեռնեագություն ևս . . . . .	106
ՄԱՅՐ ԱԹՈՒՈՒՄ—Եկեղեցական քեմ. լուրեր . . . . .	108
Տ. Հակոբ արեղա Գլըղնյան . . . . .	111

ԽՄԲԱԳՐՈՒԹՅԱՆ ՀԱՍՑԵՆ

ՀԱՅԿԱԿԱՆ ՍՍՀ, ԷՉՄԻԱԾԻՆ

«ԷՉՄԻԱԾԻՆ» ԱՄՍԱԳՐԻ ԽՄԲԱԳՐՈՒԹՅՈՒՆ

Армянская ССР, Эчмиадзин, Редакция журнала «Эчмиадзин».  
Rédaction de la revue «Etchmiadzine», Etchmiadzine. Arménie, URSS

Հանձնված է արտադրության 19.10.76 թ., ստորագրված է տպագրության 7.12.1976 թ.:  
Տպագրական 7 մամուլ + 10 ներդիր, թուղթ 60x84/8, պատվեր 816:

Մայր Աթոռ ս. Էջմիածնի տպարան, 1976 թ.

